

ASO GAFUA, 26 IANUARI 2015

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: I le agaga ma tulaga aloaia, ou te ofo alofa atu ma ou faatalofa atu i le paia ma le mamalu maualuga o le Maota Fono ma le Palemene i leni taeao fou. Alafai maia i faguga lelei, le soifua manuia ma le soifua maua le paia ma le mamalu o sui usufono uma o le Palemene aemaise lau Afioga i le Taitai o le Malo ma le paia o le Kapeneta. Le mamalu foi o lea tala-na-atoa i lau Afioga i le Taitai o le Itu Agai aemaise le paia maualuga o le Palemene nei. Ua faamalo le folau, malo le soifua manuia, ua malo le onosai, ua faamalo foi le taupati mai aua le faaauauina o a tatou galuega.

E manatu o le la vaiaso ua tuanai atu, tatou te faafetaia pea le alofa o le Atua ona ua faataunuu nisi o fuafuaga ua pasia aloaia le Tala Faatatau Faaopoopo o le Tupe (Nu.1) 2014/2015, ae ua tatou taunuu mai i leni vaiaso fou, o le agaga ma le faamoemoe ina ia papa aveloa ma faaauauina pea a tatou polokalame tuua. E pei lava ona ou taumafai e faamalamalama atu i le paia o le tatou Maota, e fai lava sina feoloolo o a tatou galuega, o Tulafono Tau Faaofi, o Tulafono Tau Faaofi Toe Teuteu, o Lipoti ma tulaga uma o mea e tataua ona tatou faagasolo i ai, e pei o le agaga lena ua toe faaauau ai le tatou Fonotaga i leni vaiaso. E i ai le talitonuga, ia lava mai le onosai ma le faapalepale i lo tatou Maota. O nei Tulafono uma o Tulafono ua tataua ona tuuina atu e pasia e le Palemene ma tuuina atu loa i aao o le Taitai o le Malo aemaise le Kapeneta aua le faatinoina o mafuaaga tataua ma faaiuga fai ua tataua ona faagaioi i le tulaga e tataua ona i ai i totonu o Matagaluega a le Malo. O lea e i ai le talitonuga o le a amata a tatou galuega i leni vaiaso, e tatalo atu i le paia ma le mamalu o le Palemene ina ia tatou galulue faatasi aua le faaauauina o a tatou galuega i leni vaiaso.

E faapai atu foi i le tapuaiga a Samoa i leni taeao fou, Samoa e le atunuu, o oe lava o le ao mamala e leai se isi na te toe auililiina ou sa ma faiga aua e tumau, a o le tatalo a lau Palemene, ia mau mai pea le toovae ma mau i iumaea le tapuaiga a lo tatou atunuu, a o alo Taitai o le Malo mo le faaauauina o galuega ua faapea ona faatulagaina.

Le Aufai Tatalo foi ma le latou matafaioi, ia i le Atua pea le viiga, le faamanu ma le faaneetaga ma outou tatalo leleoa ina ia manuia faiva o lau Palemene aemaise galuega a Samoa i leni aso.

TUUNA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P.2014/2015 Nu.193, Lipoti Faaletausaga a le Iunivesite Aoao o Samoa mo le Tausaga 2013-2014.
2. P.P.2014/2015 Nu.194, Lipoti Faaletausaga a le Ofisa o le Komesina o Faiga Palota 2012-2013.

TULAFONO TAU FAAOFI O TEUTEUGA O LE TULAFONO O LE FAAPUTUGATUPE MO LE LUMANAI MANUIA O TAGATA 2014 – faitauga faalua

FOFOGA FETALAI: Mo le silafia e lenei Palemene, o le Tulafono Tau Faaofi lenei sa faia lona faitauga muamua i le Aso Fono 19/8/2014. Tulai mai lau Afioga i le Palemia ma le Minisita o Tupe.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014 i lona faitauga faalua ma ou te fia tautala faamalamalama i ai.*

Faaluaina e le Sui Palemia ma le Minisita mo Fesootaiga ma Faamatalaga Tekonolosi.

FOFOGA FETALAI: Tulai mai lau Afioga i le Palemia e te saunua faamalamalama i le Tulafono Tau Faaofi.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, talu mai ona faatuina le Tulafono lenei i le 1972, sa faapea lava ona fono le Komiti Faatonu ma fai Teuteuga ina ia faafaigofie atili ma faaleleia atili le faatinoga o le auaunaga mo le aufai saofaga. O le uiga o lea mea, e ui ina faapea o le faaputugatupe lenei e faaleleia atili ai tupe a i latou e malolo mai ritaea ona i ai lea o se vaegatupe e tua i ai, ae e tele lava le anoano o le mau tuatuagia faale-tupe e tulai mai i lea taimi ma lea taimi e moomia ai se fesoasoani.

O le tulaga lava ia i faletupe e faatuina i totonu o le atunuu aua tatou te Tutoatasi na o le tasi lava le faletupe, na o le faletupe a le atunuu o le Bank of Western Samoa. Ona alu alu lea taunuu mai i le 1974, ona faatu lea o le lala i totonu lava o le Faletupe o Samoa i Sisifo mo atinae, mulimuli ane lea ua vavaeese le vaega lena ma amata ai loa ona faatulai mai le Faletupe o le Atinae e agai i ai le tóatele o nai o tatou tagata mo le atinae. Aua e le faigofie gaoioiga a faletupe masani o feafaatauaiga e pei o le Bank of Western Samoa ona e fai lava sina tulaga faigata o a latou puipuiga, aemaise lava o fanua. E tatau ona i ai sou fasi fanua e noatia ai ma e tatau ona i ai ni tagata latou te faamaonia, a alu alu ua le totogia ona toso atu lea o latou ia e pei ni manu papalagi foi ia ua noanoa atu e totogi ai nonogatupe nei.

Ua ala ona ou taua mea ia ona o le faigofie ia o le mea foi lea o le moomia e o tatou tagata o ni nonogatupe, o loa e aumai ni tagata e noatia ai ma latou faamaonia. E manatu lava e faigofie, aemaise lava o mea lava nei o faipule e muamua lava o i ai tagata o itumalo. O le tele foi la o faipule ua le toe talitonuina e faletupe ona o le tulaga lena e uma loa lava le faiga palota ua pau, e fiu e toe tulituli. O isi lava foi ua tofu i le falepuipui ona o mea lava ia i aitalafu le tologia. E tele lava tagata e o atu loa lava i faletupe e fia nono se tupe ona o se faalavelave, tapa mai loa, “Alu e sue mai se isi e faamaonia,” sau loa i le faipule.

Na ona ou faasilasila atu, o mea nei o faipule ua le toe talitonuina ma ua le toe talia e ni faletupe, aemaise lava pe a latalata atu i le faiga palota. Aua a pauu uma nei tatou, o fea la le mea a toe tua i ai e toe totogi ai mea ia? A o le tulaga lena o lea ua ou tau atua i mea sa sau ai tatou. O lea la ua le tasi le faletupe na amata mai ai le tatou Tutoatasi i le silia ma le 50 tausaga talu ai, a o lea ua tele faletupe. Ona oo mai loa lea i le 1972 faatu loa le faaputugatupe lenei, e le i faigofie. Ou te manatua pe a oo ina fono le matou Komiti o le Faaputugatupe mo le Lumanai Manuia o Tagata (NPF), aua e i ai lava le Matagaluega o Tupe. O se tulaga faigata tele le uunaiina o le faaputugatupe lenei o le NPF. Ona o le agaga lava lenei o o tatou tagata, e le fiafia i lea mea o le teu o tupe, ae mananao e maua loa le tupe tala loa. E le fiafia la i le teuina o ni tupe mo le lumanai ona o le tele o o tatou faalavelave fai, aemaise foi o le tulaga i maliu aemaise foi o aoga a fanau. Ona sau sau ai lea, tupu ae foi se manatu o le a fai se faaputugatupe a le Palemene latou aua o le tofi mamalu lenei, afai e uma atu le Palemene lenei ona le toe sau lea, ae ia mamalu pea le sui usufono sa avea ma Tootoo. A o le mea ua matauina i isi faipule, e le toe faipule loa vaai atu ua tutu mai ma le tootoo ma ua te i lava ua lavalava mai le siapo ona sau lea nofonofo i lalo o le pulu la le e i gatai, ae faatalitali ni faamasinoga e faalavelave ai e sue ai le lumanai. Ona manatu ai foi lea o le Vaega lenei a le HRPP ma le Afioga Tofilau Eti Alesana, e le tataua ona soifua ai faapea tagata sa avea ma Taitai o le atunuu, ae ia fai foi se latou faaputugatupe.

O le taimi nei la, o lea ua 10 pasene le saofaga a tatou 10 pasene le Malo. A o lea o lo o i ai foi isi Teuteuga o lo o mulimuli mai lea ua siitia ai o tatou tagata mai le 5 pasene i le 20+ tausaga talu ai i le 6 pasene i le tausaga nei, ae 7 pasene i le tausaga fou. O lona uiga, e tasi le sene mai le tala (\$) lea o le a sii, ona oo lea i le tausaga fou sii le sene ma o le Teuteuga lena o le a mulimuli mai pe a uma le tapenaga ona o lea ua uma ona pasia e le Kapeneta, ae a oo i se taimi ona aumai foi lea i totonu o le Maota nei ina ia vave ona maua foi se faaopoopoga i saofaga a i latou o le aufai saofaga. Aua a leai le sene lena e tasi e faaopoopo a le tagata fai saofaga, e leai foi se sene e sao a le faipisinisi, aua e le mafai ona nofo nofo lava le faipisinisi uunai e latou le siitia o le saofaga; aua foi e gau ai latou i le sene mai le tala (\$) Na o le Malo o lo o i ai le vaaiga mamao lena ina ia faaleleia atili pea saofaga mo nai o tatou tagata faigaluega.

O le Teuteuga la lea ua taoto mai nei i luma, o nisi o Teuteuga o le faasologa o Teuteuga ia e sau faapei o le tulaga o le fesoasoani e ave i faalavelave fai e tai pei o maliu. O lea la ua faataatia mai, a faapea e tulai mai se maliu ona mafai lea ona fai le fesoasoani e mafai ona tala i tua le seleni, le death benefit mo le fai saofaga ua sili atu ona tele. E le pei o le mea sa i ai e tusa ma le masina e tasi o lau saofaga e le tele ni pusaapa e mafai ona faatau ai e lou

toalua o le a faia lou lauava, a o le a tutusa le fesoasoani ma le saofaga ua lua tausaga. O lona uiga ua tele le fesoasoani lea o le a maua mo le taimi o le maliu. Muamua atu, e tusa ma le saofaga i le masina e tasi, a o lea ua le tasi le saofaga a o lea ua 24 masina o lona uiga ua lua tausaga, ona lava ai lea o le fuafuaga a le toalua e fai ai le lauava mo le faisaofaga ua maliu.

O isi Teuteuga na o lo o aumai, muamua, o le tusia o le teugatupe e sui ese mai ai e faasino i le toina i tua. O lona uiga o mea ia o teugatupe e mafai ona credit loa, tuu loa i totonu o lau teugatupe. O le taua o le mea lea, o le vave ona tuu i ai o le vave foi lena ona maua le tului ma saga televave ai ona alu i luga lau teugatupe. Ia o le isi tulaga lava ia mo fua faatatau o tului e tatau ona totogi i luga o teugatupe ma le faagasologa o tinoitupe a le sui ma le fuafuaina o sea tului, o lena o lo o sau i le faa-Peretania, provide for the interest rate payable members accounts and cash flows and calculation of such interests. I le tulaga o faamaumauga i lau teugatupe, e le na o tupe e alu i totonu, ae tatau foi ona i ai ma tupe e sau i fafo. O le faasologa la lea o tupe ulufale ma tupe e alu ese mai totonu, a oo lona i le taimi e charge ai, ia ona faapena lea ona take into consideration ia le movement lea o cash in cash out, ina ia atagia ai le mea e tatau ona i ai le tului a le sui.

O le vaega tolu, o lena ua uma ona ou talanoa atu i le siitia maualuga o le fesoasoani i le taimi e oti ai ma le saofaga na o le tasi le masina i le saofaga e lua tausaga, ua tele, ua faigofie ai ona sue ni povi, e sue ai ma ni pusaapa e faatino ai le lauava, i le tagata lava lea e leai lava se isi mea e tua i ai. O lena foi o lo o i ai ma tulaga e faasino i le penefiti a latou ia le aumatutua e tuu i ai le avanoa ia lava, ina ia tatau ai ona tala i tua ia a latou faaputugatupe. O le tulaga faapea, e i ai lava isi taimi e umi lava ona taatiatia ai i totonu, a taatiatia taatiatia ai lava ia ona lavea loa lea, o le tele ia o faaputugatupe faapena ua alu i lalo o le faaupuga, ua le iloa po o ai e ana ia tupe. O le mea la lena e taatitia ai lava ma taatitia ai lava ua le tala i tua. O le fautuaga foi la i le Faalapotopotoga e tatau ona proactive latou, aua le tuu umia, ae saili, aua e tatau lava ona maua e tatau ona ave i ai ia seleni nei, ae le na o le taatitia ai lava i totonu, e mafai lava ona maua i latou....o le isi mea e faafaigata o tagata foi ia e o i fafo, o le tutu atu lava o i fafo a o lea e i ai a latou teugatupe i totonu o le Fund. O isi faalavelave e tutupu mai i ina o mea o ituaiga pisinisi foi ia e aumai ia tupe i totonu ae le aumaiga o faamatalaga, ae po o ai e agai tonu i ai ia saofaga nei, a o le isi mafuaaga e mafua ai le mea lena, o pisinisi ua tipi ia saofaga a tagata ona nonofo lea ma faaoga saofaga a tagata ona ua faaletonu le latou tulaga tau tupe, ia ona uma lea po o ua tausaga po o ua lua tausaga ae faatoa gaoioi ina ua tuliloa atu e le NPF. Ua i ai foi la faasalaga o kamupani ua faapena ona le amiotonu i le faatinoga, ae maua ai e solomua lava mea o pisinisi pepe, leaga le faafoega, e maua ai ia i latou na, ua aapa i tupe a le aufai saofaga o la e faapea le aufai saofaga o lea ua aumai i i le NPF, a o la ua latou faaogaina. O le mea la lena o lea taua ai ia aiaiga faapenei pei ona avatu.

Ma le aiaiga mulimuli o lo o i ai le tulaga lena e pei ona aiaia e le Kapeneta, e le toe tele ni pule lua, e tasi lava le pule lua. O le faaiuga lena a le Kapeneta e le faapea, e i ai le Deputy ae toe i ai foi ma ni Assistant, e tasi lava le pule lua ua le iloa po o le a le mea o le a faalupe ai le Deputy a o le a le mea o le a faalupe ai ia le Assistant. O le isi tulaga faigata o le i ai o le mea lena o le Deputy toe i ai le Assistant, ona o le tulaga lena pei ua i ai se malamalamaaga, a avanoa loa le Pule Sili ona otometi lava lea o le see atu o

le Deputy i luga, e le o se itu lelei pe afai e faavasivasi le Deputy ae sili atu ona atamamai le vaega lea e i lalo i le tulaga o le Assistant. O le faavae lena na faatino ai le tofamamao a le Kapeneta, aveese ia nei mea ma le soona tele o mea e tau fufulu. Afai lava o le Assistant, ae aua ia ne i toe faia ia mea o Deputies ma le tele o le fenumiai.

Lau Afioga i le Fofoga Fetalai, e faamoemoe ua matua manino lelei le faamatalaga, o le a vave ai foi ona faagasolo le tatou galuega, ou te faamanatu atu, e tatou te faatau pepe foi lava nanei o lo o faaauau pea le lafo i le taimi o le 3:00 agai i le 7:00, pe a tuua foi i le 1:00 i le tulaga masani. Ia ae ala lava ona umi a tatou mataupu, ia o mataupu faigofie ae tatou te nonofo lava ma faafaigata. Lau Afioga i le Fofoga Fetalai, ia manuia le Fono.

FOFOGA FETALAI: Ia manatu ua faafofoga ma le manino le paia ma le mamalu o le tatou Maota i le tatou Tulafono Tau Faaofi muamua. O lea ua opea i le Maota le faamalamalamaga a le Afioga i le Palemia o le Minisita foi lea o le Matagaluega.

Ia o tatou tu ma aga masani, o le taimi lenei o a tatou felafolafoaiga pe a i ai se sui usufono e fia saunoa. Ia afai lava o lea ua maua ia leaga o lea ua...ia tulai muamua mai ia ia le sui usufono mo Faasaleleaga Nu. 2, ia ona sosoo ai lea ma le sui usufono mo Faleata Sisifo ma le sui usufono mo Aana Alofi Nu. 3.

Tulai mai lau Afioga i le sui usufono mamalu mo Faasaleleaga Nu. 2.

Susuga PAPALII LIO FAAVAIVAIOMANU TAEU MASIPAU (Faasaleleaga Nu. 2): Faafetai i lau Afioga i le Fofoga Fetalai faapea foi le paia o le Maota, faafetai foi mo le taulaga molia i lenei taeao fou aemaise foi o le aso amatalia o lenei vaiaso i a tatou galuega. E au faatasi foi lenei usugafono i le faafetai le viiga ma le faamanu i le Atua, ua taitai manuia mai le soifua o lau Afioga faapea foi le mamalu o le Palemene mo lenei aso fou i le amatalia o a tatou galuega mo lenei vaiaso.

E fia faaalua foi se manatu i lenei Tulafono Tau Faaofi, e talitonu foi o se Tulafono Tau Faaofi taua ma le aoga. E talitonu lava e tau lava le igoa o le Tulafono o le aoga o le Tulafono Tau Faaofi o le Lumanai Manuia o Tagata. O lenei vaavaai ma le matau ma le faalogologo foi i le saunoaga a le Afioga i le Palemia, ia e faamaonia foi e lou nei sui usufono le taua o lenei faaputugatupe aua lava le lumanai manuia o tatou tagata. E fia faatauaina foi se lagona o lenei sui usufono i se vaega lea e tusa o le pasene o saofaga a le aufai saofaga, o lea pei ona maua o lea o le a sii atu mai le 5% agai i le 6%, ia e fuafua mo le lumanai.....

FOFOGA FETALAI: Malie le sui usufono mamalu, se i tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e le o aumaia i le Tulafono Tau Faaofi lea le mea lena, o lea sa ou fai atu e i ai le Tulafono mulimuli e aumai ai. Ae a pe a malie le sui usufono, tatou agai pea i le Tulafono Tau Faaofi lea, ae se i aumai le Tulafono lena ia ona tatou agai lea i ai, leaga e leai ni sene o i ai i i i le mea lea, o lo o i ai ia Tulafono o lo o mulimuli mai. E ala ona ou tulai atu leaga o lea a tuu le maa ae maa i aau. Ae se i taatia pea se i aumai le

Tulafono lena ia ona tatou fisaofaga lea i ai i le tulaga o felafolafoaiga, ae o lea o le a saunoa i le sui usufono i se mataupu e le o aumaia i totonu o le Tulafono.

FOFOGA FETALAI: E manatu o lea ua maua mai e le sui usufono mamalu, ia tulai maia e faaauau le saunoaga le faamalamalamaga a le Afioga i le Palemia.

Susuga PAPANII LIO FAAVAIVAIOMANU TAEU MASIPAU: Faafetai e le umi foi se manatu, e pau lava le mea na ona matou pai i ai i le agaga faafetai, leaga e tasi lena mea o lo o taua foi i lou nei sui usufono ia lea vaega ua saunoa i ai, ia ae faafetai o lea ua maua, o lea o le a fuafua mai. O le agaga lena, o le agaga faafetai a lenei sui usufono o lena ua fuafua mai.

Ae e pau lava se matou faamatalaga e uiga i le suiga mai, o le faamanuiaga foi lea mo e maliliu, o lea ua matau atu foi i le suiga, pei ua sii mai i le tasi masina agai i le lua tausaga. Leai o le agaga o lenei sui usufono, peiseai foi lele e talitonu lava o le a umi atu lea piriota, aua peiseai o le mea sa i ai, e moni lava po o le a lava le laitiiti sa i ai le Tulafono o lo o i ai, a o le mea sili ona taua, o le maua o se fesoasoani, aua o le mea moni lava, a pasia nei le suiga o le Tulafono, o lona uiga seiloga lava la e atoa le lua tausaga o le saofaga a le sui faatoa agavaa foi lea i se faamanuiaga tau maliu. Pei o le agaga lena o lou sui usufono, ona o le taimi nei, ia pe laitiiti lava pe a, o lo o agavaa lava i latou e maliliu, pe afai o la e i ai se saofaga e tasi le masina. Ia pei lava ona i ai se agaga o lou nei sui usufono ia e manatu lava i mea nei o maliu, pei o taimi faigata ia o mafutaga o aiga.....

FOFOGA FETALAI: Malie le sui usufono, se i tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le a se i ou toe tulai atu lava o lo o i ai si tamai faasaoga i lau faamatalaga lea e avatu. O le suiga lea e i ai e faasino i le Death Benefit ma e faasinotonu lava i le lua tausaga lea, afai e le oo i ai le saofaga a o lea pei o lea ua agai i ai le sui usufono, e le mafai la ona oo i ai le aofaiga seiloga ua...lona uiga afai na o le tasi masina o lau saofaga lea e i ai, e le mafai la le tulaga lena, o lea e tumau le \$5,000. Mo sina faataitaiga, o le tagata e fou atu e le i taitai ona oo i ai le...ia e le mafai la ona entitle i le mea lena, aemaise lava se tagata o lea faatoa tasi le aso ae tupu ai se faalavelave.

Lau Afioga i le Fofoga Fetalai, o se toe teuteuga lena o lau faamatalaga lea ua avatu.

FOFOGA FETALAI: Ia tulai mai le sui usufono mamalu e faaauau le saunoaga.

Susuga PAPANII LIO FAAVAIVAIOMANU TAEU MASIPAU: Ia o lea e ese foi lau faauigaina o le tulaga lea, o lau lava tilotilo, o lea o le a suia atu i le tasi le masina agai i le lua tausaga. O lona uiga, ua le toe agavaa le tasi masina, i lau vaavaai i le suiga lea e sau nei i le Tulafono. O lona uiga mo i latou lava ua tasi le masina i le taimi lenei, e le toe agavaa, ae peiseai o le

taimi lenei o lea e matau, e tasi lea fuafuaga e maua soo pea, aemaise lava...mo se faataitaiga lau Afioga i le Fofoga Fetalai, ia o nai tina foi nei e le faigaluega ia a o le tama o le aiga ua maliu, peiseai o le tala lava lea e faalogoina pea, o se tala foi e lagona ai foi le fiafia, o se fesoasoani a le Faaputugatupe mo maliu. O lona uiga, o le uiga lena o se taumafai atu a lou sui usufono, ne i te i ua maumau lea fesoasoani taua i o tatou tagata, ae afai o le sao lea o le saunoaga a lau Afioga i le Palemia, e tumau pea i le tasi le masina, ia pei o le mea lena o lea e taumafai atu ai lou sui usufono, ne i te i ua maumau lea avanoa i o tatou tagata aemaise lava ia o taimi lava nei o maliu pei o taimi tuga na o le soifuaga, o e ua motusia le mafutaga, pei o i lava e tua i ai le tina pe a maliu faafuasei.

Ou te talitonu foi, o le isi itu lau Afioga i le Fofoga Fetalai, tasi lenei Faalapotopotoga ua tele foi lona tamaoaiga, tele ana investment, a o lea vaega o le a maua ai se fesoasoani mo e vaivai mo e foi faatoa faigaluega pe a tutupu mai ni faalavelave. Pei o le agaga tonu lena o lea e taumafai atu ai i lau faauigaina o le suiga lea ua aumai nei i luma o le Palemene.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se i toe...leaga o le a umi tele le saunoaga a le sui usufono ae pei na te le i maua mai le faasaoga lea na ou toe faamanino atu. E faigofie lava pe a ou taua o le tagata faatoa tasi le aso e galue ai, a, e na o le \$30 ia lana tupe e maua. E faamanino atu, e faigofie lava pe a ou taua o le tagata faatoa tasi le aso e galue ai, na o le \$30 lana tupe e maua. Ia, e manatua la, e sene i le \$1 e totogi. Na o le 23sene la ona faatele lea i le 5, na o le 60sene lana saofaga, ona faaopopo mai lea ma le 60sene a le Malo ona maua lea o lana \$1.20. O lea la faatoa tasi lava le aso ae oti loa. O le tulaga la i le Tulafono Tau Faaofi, seiloga e lua tausaga ma ova atu, ona oo lea o lana death benefit i le lua tausaga lea na ou taua, ae muamua atu sa na o le tasi le masina. E fua la i lau saofaga lea sa fai i totonu. E le taitai talafeaga le tagata faatoa faigaluega, pe na o le afa aso na faigaluega ai ae see i se paufai te i ua oti ai, e savali atu i le galuega ae te i ua see i se paufai ona oti ai lea, o lea e le i taitai tele sana... na o le 60sene lana saofaga, e le mafai la ona ave i ai le fesoasoani lea, a o la e lava e tumau le tulaga o le \$5,000 lea o lo o i ai nei. Ae na o le tagata la ua ova atu i le lua tausaga lana saofaga.

FOFOGA FETALAI: Ou te manatu ua manino le faamalamalaga a le Afioga i le Palemia le sui usufono mamalu. Tulai maia e faaauau lau saunoaga.

Susuga PAPALII LIO FAAVAIVAIOMANU TAEU MASIPAU: Faafetai. O le mea sili lea ua maua atu, o lo o tumau lava le \$5,000 i le taimi lenei pe afai o le a pasia lenei Tulafono Tau Faaofi. Faafetai i lau Afioga i le Fofoga Fetalai.

FOFOGA FETALAI: Malo faafetai i le sui usufono mo Faasaleleaga Nu.2. Tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa. E muamua faafetai i le Afioga i le Palemia po o le MINisita o Tupe mo lenei Tulafono Tau Faaofi. E faafetai atu foi i le Tamaitai Pule ma le Matagaluega, tele galuega lelei ua tatou vaai ua faatinoina e le Faalapotopotoga lenei mo le atinae o le atunuu, e le gata i Samoa nei ae faapea foi atunuu i fafo. Faamalo le galulue.

Ae i lenei lava Tulafono Tau Faaofi lau Afioga, e toe fia oo tasi lava i le mataupu lea na saunoa nei i ai le Afioga i le Palemia. I le suiga ua aumai nei, o le faa-fa ai lea ona suia le Tulafono Tau Faaofi, mai le 1972, 2007, 2010, o lea ua toe teuteu nei i le 2014, o lea ua faatalanoaina i le taimi nei.

Mai le 1972, pau lava le saofaga e moomia e te totogia ona e maua lea o le faamanuiaga lea pe a te i ua e maliu, e \$1. Ae oo mai i le 2007 o tumau lava lea faiga. I le 2010 la, o lea ua tuu mai i le tasi le masina.

O le uiga o lau faamatalaga lau Afioga, i lenei vaitau i le tele o galuega lelei ma le faatupulaia pea o le faaputugatupe lenei, i lou talitonuga ma lou vaivai, o lea ua toe tau foi i tua. O le 43 tausaga lenei o le Matagaluega. O lea ua...

FOFOGA FETALAI: Malie le sui usufono mamalu o saunoa se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ua matua sese mamao lea lafoga . E le o foi i tua le NPF o lea e agai i luma. O lafoga ia e atili ai le vevesi o tatou. E le mafai ona ou tuuloa se lafoga e soona alu le tapasa faapea. E te le i i ai i le tausaga e 1972 sa talanoa ai le mataupu lea, o le matua faigata. O le ala foi lena na ala ai ona... aemaise lava totonu o le Palemene lenei, o le tele lava o sui usufono na matua tetee i lenei mea, ae i ai le faiga na mafua ai ona faigofie ma talia e le Palemene. O lena e i ai le Tulafono na o sui usufono lava e mafai ona tala i tua a latou faamanuiaga, tala uma lava, ina ua uma le tolu tausaga o le Paeaiga i luga o le talitonuga e pau lava lea o le galuega a le faipule, a uma loa lava ua uma. Ia se i vaai i le le talafeagai o lena mea na fai i na ona po, o le tuufau tuutuuloloa o le toatele i tua ae sa na o le Palemene lava sa tala i tua. O le ala lena na ala ai ona toe fai nei i le 1996 le tatou NPF lea e i ai nei po o le penisione, ona o le tulaga lena, ua leai ni mea e tua i ai le faipule, ona o le tala uma i tua i le taimi e fai ai le palota.

FOFOGA FETALAI: Tulai mai le sui usufono mamalu.

Tofa LEALAILEPULE RIMONI AIAFI: Lau Afioga, faafetai. O le mea lea e agai pea i ai i le death benefit lea. O le faamanuiaga lea sa i ai, e tolu ea pe tasi le masina e te faigaluega ai ae e maliu, e maua lava lau faamanuiaga. O le mea la lea ua i ai, seiloga e lua tausaga talu ona e faigaluega, ona faatoa maua lea o lau faamanuiaga lea. O le uiga la lea o lau faamatalaga. Afai ua 43 tausaga o alu lava i le faamanuiaga lea e i ai pe \$1 pe tasi le masina ae e maliu maua lau faamanuiaga, o le a la le mea ua toe tuu ai i le lua tausaga?

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le fuafuaga alualu i luma la e i ai tagata faapitoa latou te fuafuaina mea nei o tupe totogi, fuafua, e fai loa se fuafuaga mo le talaina i tua, o latou la na e omai e vaavaai i le tulaga o le puipuiga o le fund i le mea e talafeagai ma le mea e le talafeagai. O le itu taua lava lena, e le soona faia e le Komiti o i ai nei se faiga pe afai o lea ua tupu foi lava le aofai o le toatele, e na o sina pasene lava o ni tupe e nono i tua, e faitau miliona ma miliona. O lona uiga, o le tiute lena o le Komiti la e i ai nei, e matua vaai totoa i ni auala e preserve, puipui ai le fund ina ia faaauau pea. E le faia i ni tulaga foi lea o le faamalie o tagata, ae fai i le tulaga e mafai ona tapa atu tagata, a o la e lava e i ai le fund e mafai ona aumai ai le fesoasoani, i lo le alu i le mea foi lea o le fia lelei, ae uma ane ua leai se mea, ua leai se fund e tapa i ai.

Lau Afioga, o le tulaga lena o lea ou te... e le o i ai Tuivalea i totonu e pulea le fund, e vaai atu lava i le mea e oti ai le fund ae fai lava.

FOFOGA FETALAI: Ou te manatu le sui usufono mamalu ua malamalama le mataupu, o lea foi ua folasia lou finagalo, e manatu foi o lea ua oo le fautuaga, o lea foi ua saunoa le Malo e ala i lo latou manau sa feliuliuai mamafa i ai lo latou finagalo. Ou te manatu ua manino ma malamalama, ae taatia maia lou finagalo ae see i se isi mataupu.

Tofa LEALAILEPULE RIMONI AIAFI: Lau Afioga, faafetai. Leai e taua le vaega lea, ona o le fund, e tai pei lava o le insurance. A pay nei lau insurance nei ae e oti taeao, leaga o lea e faauiga... o le faaupuga o le tatou teugatupe lea, o le Lumanai Manuia o Tagata. O lou lumanai la e le faapea seiloga e 55 tausaga ona faatoa lumanai lea. E amata atu lava taeao, talaatu taeao....

FOFOGA FETALAI: O lea ua maua lou finagalo Lealailepule, tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e pei lava ona ou taumafai e tau atu, o le natura lea o tatou, e maua loa lava le tupe faaoga nei, ae seasea tupu ae se agaga foi lea e teu mo le lumanai. O le ala lena e ala ai ona laa le Malo i totonu, o le Malo e tataua ona vaaimamao mo le agai i luma. O le ala foi la lea o lea e mafai ai ona ave le fesoasoani o avanoa ia i nogatupe ia e fai pea. Muamua atu sa laitiiti lava le vaega sa mafai ona nono, ona alu alu lava lea tele le pasene, sa faaopopo mai lava i teuteuga ia sa fai i aso ua tuanai, e faaopopo ma faaopopo ma faaopopo ina ia mafai ai ona tele se tupe nono. O nei la, o isi tagata ua oo i le 80% ua aofia atu ai ma le saoga a le Malo. Ona oo ane lea i le taimi e moomia ai le tala atu i tua, toetititi lava leai se tupe. O le upu foi faapea o le tatou atunuu e tausi e fanau matua, e leai se mea e tau popole ai, e le faapena uma fanau, e le faapena uma fanau. A lele e oo lava i le tupe lea o penisione lea e ave, lea tou te lauga mai ai ua tauau ina faalagolago i ai isi fanau matutua ua le o e faigaluega, a ua faalagolago mai i le penisione lea e avatu e tausasami ai foi ma latou, ma aai ai ma fai ai alofa ma taulaga. A o le mea na avatu, e mo matua, a o lea ua avatu e le na o matua, a o lea ua tausi ai ma fanau a fanau ma fanau a fanau a fanau.

Lau Afioga i le Fofoga Fetalai, se o tatou uma o Samoa, tatou te le o nonofo i se isi paneta, o lea tatou te iloa uma lava mea o lo o tutupu.

Tofa LEALAILEPULE RIMONI AIAFI: Lau Afioga, o mea uma ia e saunoa mai ai le Afioga i le Palemia, e le i taua i lau lauga, e sao, mea ia o pasene ma le talaga i tua. E tasi lava le mea lea ou te tautala i ai, se i tagai i ai, o le vaega lea o le death benefit.

Tofa Hon Tuuu Anasii Leota (Siumu): O se mea e fia faamalamalama lau Afioga i le Fofoga Fetalai i le saunoaga a le sui usufono mo Faleata Sisifo.

FOFOGA FETALAI: Malie le sui usufono mo Faleata Sisifo se i tuu atu le avanoa i le sui usufono mo Siumu.

Tofa Hon Tuuu Anasii Leota: Lau Afioga i le Fofoga Fetalai ua ou tulai atu e fia faafesili i le sui usufono mamalu o lo o saunoa, po ua ia silafia pe fia tagata faisaofaga ua maliliu i le taitasi le aso na faigaluega ai ua mafua ai le teuteuga lea ua popole ai le Malo. Po ua ia silafia le aofai o tagata faapea ua.... Ma lou faaaloalo.

FOFOGA FETALAI: Onosai mai le sui usufono se i tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te agai sao atu lava i le sui usufono lea e tautala, e tu fua le sui usufono mo Siumu e faatupu manatu faavalevatea ma aumai a latou fesili faavalevatea.

Lau Afioga i le Fofoga Fetalai, o le a tauau foi ina pisa tatou ona o le agai atu i mataupu ia. O lea na avatu lau faamalamalama e faamalamalama ai i sui usufono e faigata ona faamalamalama e pei o le sui usufono mo Siumu. O lena lea na ala ai ona avatu le aso e tasi ina ia malamalama ai.

FOFOGA FETALAI: Tulai mai Lealailepule ou te manatu ua manino... Tulai mai le sui usufono mamalu mo Siumu.

Tofa Hon Tuuu Anasii Leota: Lau Afioga i le Fofoga Fetalai, ou te tulai atu ma le faaaloalo leaga o lea ua saunoa le Afioga i le Palemia i ia ituaiga saunoaga faapea o le faavalevatea. O lea ou te tulai atu ou te fesili ou te fia malamalama foi au ia. Ma lou faaaloalo, a o ituaiga saunoaga nei, se ou te matua faanoanoa tele.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o au lea e agai i o, e le o i i Tuivalea. Ia agai le faasao i le o lo o saunoa. E te le o faasaoa le o lo o saunoa o lea e te faasaoa le faasao. Ua leva ona e Minisita, ae saga pogisa soo faapea. Ua leva ona e le toe i ai i le HRPP. O le a le mea e te le faamavae mai ai?

FOFOGA FETALAI: Malie le sui usufono mo Siumu... Malie o lea ua ou fai atua le faaiuga o le mataupu.

Tofa Hon Tuuu Anasii Leota: Lau Afioga i le Fofoga Fetalai, ua ou lagona le faanoanoa i lenei taeao i ia ituaiga saunoaga faapea. Ae ou te le o malamalama la. O lea ou te talanoa sao lava i le sui usufono, ou te le o agai i o.

FOFOGA FETALAI: Malie Tuuu, o lea ua ou maua lou finagalo. Na ala foi ona tuu atu le avanoa e le Fofoga Fetalai ona o le fia faapupula atili o le faamoemoe.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e manino lava lau faamatalaga, o le faamalamalamaina o le mataupu i le sui usufono o lo o lagaina le fesili. E le o oo i ai sana mataupu i le mea lea, a o fesili ia e te faatupua, o mea o ituaiga fesili e faatupu ai manatu alualua. Ua e vaai i ai faatoa e sau nei lava ananafi i totonu o le Maota. E faapea lava e puaoa ia te au le vaai i mea uma e te tu ai? O lea e agai le mataupu i o i le sui usufono.

FOFOGA FETALAI: Ia, malie ia le tofa i lau Afioga i le Palemia, e manatu ua manino ma malamalama le faamoemoe. Tuuu, o lea ua ou faauma atua le mataupu, o lea o le a tulai Lealailepule e faaauau lana saunoaga.

Tofa Hon Tuuu Anasii Leota: Ua ou faaaloalo tele i lau Afioga i le Fofoga Fetalai. Faafetai.

FOFOGA FETALAI: Malie e i ai taimi ta te fetuunai ne i te i ua see ese le mataupu. Lealailepule, o lea o le a ou fautua atu, ua faalua ona ou fai atu o lea ua manino, e le tulituliloa foi e le manatu o lea ua maua e le Kapeneta lou finagalo, ae see ese ma lea mataupu e manatu ua manino, o lea foi ua tali malamalama le Malo i le mafuaaga ua ala ai ona sui mai le faamanuiaga i le tasi le masina i le lua tausaga. Silasila foi i le mea lea na agai i ai, o le tele lava o le faamoemoe ina ia taumafai e sefe tupe a le Matagaluega ina ia taunuu tonu lava i le mea tonu o lo o i ai le upu o le lumanai manuia. Malie le sui usufono, agai i se isi mataupu mo le faamalamalamaga.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai...

FOFOGA FETALAI: Malie Palusalua.

Afioga Hon Palusalua Faapo II: O se mea e fia faamalamalamaga leaga e taua le mea lea.

FOFOGA FETALAI: O lea ua uma o lea ua ou fai atu o lea ua malamalama le saunoaga. A e fia saunoa oe ona e saunoa lea i lou taimi, ae agai pea Lealailepule o lea ua faaii mai lana saunoaga.

Tulai mai le sui usufono mamalu.

Tofa LEALAILEPULE RIMONI AIAFI: Faafetai. O le mea lenei na tatou talanoa ai i le death benefit, a o lea o le a death from the party isi tagata. O le mea lea lau Afioga, e leaga e taua ia te au, ona o le naunautai na ala ai

ona faavae e le Malo, e sao le Afioga i le Palemia ou te le i i ai i le 1972 i i, a o le mea lava na fai e outou aua le manuia o tagata lautele.

O le naunautaiiga o lou loto le mafuaaga na faatulai ai le Fund mo le manuia o tagata uma, aua afai o lea e 55 tausaga ae ou te le i oti, e tatau ona toe aumai sau ponesi aua o lea ua 55 tausaga o tipi lau death benefit, ua maua mai lau Afioga? Ae ui o lea o le a ou see ese, o la ua faafofoga mai le Afioga i le Palemia.....

FOFOGA FETALAI: Malie le sui usufono o lea ua maua lou finagalo, atonu e faatupu manatu mo se isi taimi.

Tofa LEALAILEPULE RIMONI AIAFI: Ia ona ou oo mai i le isi vaega lea o le Tulafono lau Afioga le isi Teuteuga lea ua aumai mo le Au Penisione lea faapea mai, a atoa le tausaga e tatau ona claim i totonu o le tausaga le faamanuiaaga lea. I lou talitonuga e le tatau ona i ai se pa puipui, o nai tagata lava ua tau sue pepa fanau po o ua le iloa tonu le taimi na fananau ai po o la e malaga i fafo po o le taimi ua....aua e i ai lava isi tagata e galo, ia e i ai mafuaaga faapena. Po o le a le taimi e fia claim ai, e tatau lava ona agavaa tagata e claim.....

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o mea faapena o la e i ai le uta fetalai, ae e tatau lava ona faatulafonoina le puipuiga o teugatupe, e leai ni teugatupe e tuufaatafagaloa, e tatau lava ona i ai, e manatua foi o mea nei e oo loa i mea tau tupe, ona felefele loa lea o le mafaufau o le tagata e aumai ituaiga excuses uma lava, ua tele foi tagata e o atu e tala mai le tupe ae le o latou e ana tupe, e mamao ma le na fuafua i ai ia tupe a le tagata ua maliu. O le mea la lea, e tatau lava ona fai ni puipuiga, e le tatau ona faatafagaloa. O le faamalalamalama lina lau Afioga. Po o le agaga o le sui usufono, ia faatafagaloa ia faigofie, o mea tonu lava na e faigofie ai ona le toe i ai se Fund.

FOFOGA FETALAI: Tulai mai le sui usufono mamalu.

Tofa LEALAILEPULE RIMONI AIAFI: Lau Afioga o le Tulafono o lo o i ai nei, faapea ua oo i le 66, 67 ou tausaga ae faatoa e sau claim lau penefiti i lau faitau i ai, e mafai. A o le mea lea ua faatulafono mai i i, i totonu o le tausaga talu ona e entitle i ai i le penefiti lenei, o le popolega la lina ia te au, ne i te i ua oo atu i luga ua sili ni ou tausaga, ae foi mai faapea sa tatau ona claim i totonu o le tausaga lea lau penefiti. E manatua foi o le tupe lea e ave i le NPF, o le tupe mai le Malo, o le tupe a tatou, o le a le tatau ona totogi se fee e lease ai e le NPF le tupe lea.

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le o se mea leaga le vave tala o le tupe e faaoga, e le o se mea leaga. Ae ou te le iloa lava po o le a le mea e saga nofonofa ai le sui usufono i i, e le o se mea leaga le mea lea o le vave tala i tua, aua o le tuutuu i totonu e tele lava mea e ono tutupu ai. E manatua foi na ou fai atu, se o le mea lea o le tiapolo e fealuai solo, e powerful tele le mea o le faaosoosoga, ia nofonofa nofonofa lava le isi tilotilo soo atu i le tupe, ia e le uma lava le tagovale, o le mea lena o le tagovale e i ai lava i tagata uma o le lalolagi lena e mai lava i le foafoaga le tatou lalolagi, so o se ituaiga solitulafono, sa i ai lava i le amataga e toe oo lava i le faaiuga o i ai lava, e le o mafai ona....e faigata tele ona soloia. A o le vave ona ave i tua, o le vave foi lena ona faaoga e le tagata lana seleni, ia e le o se mea leaga la.

FOFOGA FETALAI: Tulai mai le sui usufono mamalu.

Tofa LEALAILLEPULE RIMONI AIAFI: O lea e feteenai le finagalo o le Afioga i le Palemia ma le aumaiga o le Tulafono. O le Tulafono Tau Faaofi o lo o i ai i le taimi nei, e le o manino mai le tulaga lea, a faapea e 65 ou tausaga e te le alu atu, e le afaina, pe 66 pe 67 foi lele ona e alu atu loa claim o lea ua e entitle i le penefiti lea e \$100 i le masina. A o lea la ua aumai nei le suiga fou lea, o so o se tagata lava ua entitle i le penefiti, e tataua ona claim within one year, a, e tataua ona aumai i tua i totonu o le tausaga. Ou te le o malamalama tonu la, pe aisea ua fai ai lea vaega? Po o le a le mea ua ala ai ona faapea i totonu o le tausaga.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, a lea ua ou faamatala atua, o le manaia ia o le mea o le entitle loa o oe tala i tua lau tupe, ma o le tulaga lena masani, e seasea e maua se isi o faaumiumi ona....e vagana la tagata foi ia e masani ona o i fafo ia o isi lava po o le le iloa o le mea e tataua ona fai. A o le manaia ia o le vave ona aumai i tua, o le mea muamua e faafaigofie ai galuega a le NPF, lona lua, ia o le a le mea e saga tuutuu ai i totonu ae aumai loa e faaoga? O lea e i ai isi teugatupe e sili atu ona tele lau tupe e maua ai pe a ave e teu ai, tai pei o le UTOS. Ae ou te le iloa po o le a le mea e ala ai ona saga umiumi ona talanoa lena mataupu, pei se mataupu leaga, a o le manaia ia o le maua loa o lau seleni aumai loa i tua. O le tele o tagata e o atu ia te au, o le mea lena. O le a le mea e taofiofi ai le maua o tupe ae le tala mai i tua? Ae ese le mea lea e tulai mai ai le sui usufono, e le manao e vave tala mai i tua ae tuutuu ai pea i totonu. O le puipuiga lena ina ia faafaigofie galuega ma iloa tonu vave ai le tagata e ana le seleni ma le tagovale ai se isi o le Ofisa o le NPF.

FOFOGA FETALAI: E manatu ua malamalama, ia faafetai Leala.

Tofa LEALAILLEPULE RIMONI AIAFI: Faafetai lava. E le o se manaoga o au lau Afioga o le manaoga o le Tulafono lea e taumafai e faamatala, e eseese, o lea na saunao le Afioga i le Palemia i le malaga i fafo, aua tasi lena mea sa tatou laga foi talu ai i le Tulafono, a, e 30 aso o le entitle e manatua foi isi atunuu e tai lua, tolu masina e o ai nai tagata e tafafao, o tagata ua matutua e o e tafafao, pe mafai ona tuutuu atu i tua i le tolu masina,

pe ono masina e o, aua o le mea lea e tupu e otometi lava le tipi o le penisone pe a o atu ae maua mai le records mai le malae vaalele e 30 aso, ona alu lea o le loomatua foi mai e lua masina e alu atu e tala lana penisone ua le maua, a, ona faapea lea ua tipi, ae le iloa aua e tatau ona toe foi mai toe alu i o i le ofisa tau i ai o ia lea ua toe sau, a? O lona uiga o le faamatalaga, afai e otometi le tipi, e tatau foi la ona toe otometi le restate, toe totogi le tupe a le tagata aua e le iloa e nai tagata mea nei.

Ona ou oo mai lea i i i pasene ia e totogi i tupe foi ia a tagata o le a tala i tua, ou te talitonu ou te lagolagoina le finagalo o le Matagaluega, ina ia fuafua lau interest i le tausaga e tala ai i tua lau tupe. O vaega taua ia i lau tilotilo i ai ma aso e ave ai i tua faamanuiaga. Ae o tatou i i i le vaega lea, e talitonu o le a...e tele isi mataupu lau Afioga, leaga o lea ou te vaai atu i le Afioga i le...ia tuuaia ia, ae ui o lea, o nei lava manatu e avatu e faatupu manatu i le Malo ma le tulaga e i ai ma le mafuaaga na faatu ai tatou tupe nei ia mo le manuia lautele o tagata, e le faatali se i 55 tausaga, e amata atu lava i le taimi e togī sao ai nai tagata i a latou mea fai i le atinaeina o latou aiga, ia se i oo i le.....ae faafetai foi i le Afioga i le Tamaitai Pule ma le Matagaluega i le tele o galuega lelei o lo o faatino. O mea lava ia e avatu e faatupu manatu e toe matimati ai le faufausiaina o le tatou Tulafono ma penefiti o tatou tagata i le agai i luma. Ia ma le faaalalo lava, faafetai.

FOFOGA FETALAI: Malo faafetai. Tulai mai le sui usufono mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Faafetai lava i lau Afioga i le Fofoga Fetalai mo le avanoa.

Lau Afioga i le Fofoga Fetalai e le tele foi ni manatu i le Tulafono Tau Faaofi, e lagolagoina le taumafaiga ina ia faaleleia e le gata i le aoina o seleni a o le faaaogaina foi o seleni o le tatou NPF mo atinae o le tatou atunuu, aemaise o tatou tagata lautele. E pau lava nai fautuaga o le tuualalo e mafai ona toe silasila i ai le Pulega lau Afioga aemaise lava i le iloiloaina o lenei Tulafono Tau Faaofi.

Muamua lau Afioga i le Fofoga Fetalai, e toe paia lava se leo i le vaega e taua o le Death Benefit. O le tuualalo lau Afioga i le Fofoga Fetalai ona e matauina ua tele tele le lua tausaga, pe mafai ona toe tagatagai i ai pe amata i le ono masina po o le tausaga e tasi ae iloilo ma fai ni a tatou statistics foi lea e iloa ai, pe toatele moni ni tagata o lo o faapea ona maliliu i totonu o le ono masina po o le tausaga, o lou lea talitonuga lau Afioga i le Fofoga Fetalai, ona e i ai foi nisi o alo ma fanau e tele ina aoga i fafo pe nonofo foi i fafo, ia e foi mai e moni faatoa lafo le NPF i totonu o le tasi tausaga talu ona faigaluega ma lafo le NPF ae ua loa foi lo latou soifua ma ua tele lo latou tautua i lo tatou atunuu. E le gata foi i lea, e moni lava e tasi le masina po o le tasi le....o lea taimi umi o lo o tele foi nisi e le i faigaluega muamua, ae sa le gata e faifaatoaga po o nisi sa auai, ae o lo o faapea pea ona contribute i le tatou economy. O lea e avatu ai le tuualalo pe mafai ona toe iloilo pe toe liuliu le tofa, pe mafai ona amata mai i le ono masina po o le tausaga e maua ai le penefiti ae koletī, ia e mafai lava ona toe sii i le tausaga o i luma pe afai e iloa mai i le tatou Tulafono, e moni lava o lo o tele se gau a le tatou NPF

ona o le tele o tagata foi o le tatou atunuu o maliliu ae le i atoa se tausaga po o le lua tausaga o fai a latou lafoga.

Lau Afioga i le Fofoga Fetalai, e avatu foi le tuualalo i le vaega e pei ona saunoa ai nisi o sui usufono i le vaega lea ona o le tele foi o tina ma tama matutua o lo o autovaa atu pe o i ni faalavelave e tasi pe lua pe tolu aso e malaga ese atu ai ona o ni tuatuagia foi po o ni vaaiga o fomai i atunuu i fafo ae ua lusi atoa ai le penefiti o latou penisione lea i lea masina. Pe mafai ona iloilo ina i le Tulafono ina ia pe i lalo ifo o le tolu masina e tuua ai lo tatou atunuu, ona faatoa taofia lea o le penisione, se i toe foi mai foi ona toe update laia, ona o lou talitonuga lau Afioga, atonu foi e tele le galuega faatino i totonu o le Pulega i tagata taitoatasi e tailua tai tolu aso i le tele o le tatou atunuu aemaise lava i latou ua matutua, ia o lo o faapea ona o atu i fafo e asia fanau ae i lalo ifo o le tolu masina, po o ni aso po o ni nai vaiaso.

Lau Afioga i le Fofoga Fetalai o le vaega mulimuli o se tuualalo, o le vaega lea o lea ua faataoto mai i le Tulafono i le faiga o le interest, ia e talitonu e tatalo foi lava pe mafai ona toe liuliu le tofa, ia a o le tele lava o tatou interest i totonu o faletupe, aemaise foi o lo o fai ai se loan a se tagata, o lo o fai lava le interest i luga o lau paleni la e i ai, peitai ane i le matau atu i le Tulafono o lo o ua aumai nei, ia o le interest e toese mai i lau loan la e i ai i totonu o le NPF mai lau saofaga. Ia o le tatalo lava, o lea o lo o manaia le vaega o lo o i ai nei, e interest i luga o lau total amount la e i ai, ae le afaina o lo o togitogi, vagana tagata...o lou lava talitonuga afai e i ai nisi ua lua pe tausaga e le o totogiina ia a latou loan, atonu la e mafai ona tilotilo i ai e aveese mai ai i i, afai e regular pea ia payments a tagata i a latou loan, e taua lava le ave foi o le tatou faamuamua i ai ia faia pea le interest i luga o le total o le latou saofaga. O le fesoasoani atu lea lau Afioga i le Fofoga Fetalai.

FOFOGA FETALAI: Malo, e manatu o lea ua toalua ai i i sui usufono o lea e faasolo le tatou Tulafono Tau Faaofi. E taua uma finagalo o lea e maua e le Nofoa le aanoa o finagalo ua tuuina mai. E pau lava lea o le tatalo a le Nofoa, e manatu, ia aua ne i tatou toe asa se ogasami ua uma ona asa. O la ua e matauina ua uma ona tali manino le Malo i folasaga lea sa saunoa i ai le sui usufono mo Faleata Sisifo, e taua manatu, o lea ua momoli le feau, ia na ona fautua atu mo le faasaoina o le tatou taimi, e manatu ua lava totoga manatu sa fai muamua e nisi sui usufono. Ae silasila i mea e le i afea e sui usufono muamua. O le agaga lena o lea e avatu, e taua foi finagalo faapea o le aveesea o le penefiti pe a alu i fafo, o le itu taua ia automatic le aveese automatic le toe faaulu. O le itu ou te talosaga atu i sui usufono, aumai mataupu e le i laga e le tatou Tulafono Tau Faaofi e agai ai i luma le tatou Fonotaga ma le folasaga.

Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai, faafetai foi mo le fautuaga, ia pei o mataupu lava ia sa fia fautua ai, aemaise lava pei ona saunoa lau Afioga i le Fofoga Fetalai, ae na ona faufautua pea se i toe tagai ane lava i le tatou penefiti.

E pau le mataupu lea ou te fia lauga atu ai lau Afioga i le Fofoga Fetalai, sa taua e le Afioga i le Palemia i se lauga foi ua tuanai atu, le vaega lea o le faatauva o Matagaluega, ave foi lele o vaega e faatauva. E leai na ona

faataatia atu se manatu, po o le a se...pe le o i ai se fuafuaga a le Malo e i ai se isi kamupani po o se isi Matagaluega e latou te aoina lea foi vaega o le faamanuiaga, tai pei o atunuu foi ia i fafo e fa, tailua, tai tolu ia kamupani e mafai ona e alu i ai e tuu i ai lau saofaga, e filifili la i luga o faamanuia ia, afai e te vaai atu e te le fiafia tele i le NPF ia latou faamanuiaga, e maua le avanoa e mafai ai ona alu i le isi vaega e ave i ai lau faamanuiaga. Na ona fautuaga foi lea e na ona faataatia atu i luma o le Kapeneta ma le Malo, se i toe tagai ane i lea vaega ae ou te faapipii atu pea i le fautuaga lea i lau Afioga i le Palemia po o le Afioga i le Minisita, se i tagai ane lava i le masina lea, ua fai lava sina mamao tele o le lua tausaga lea ua tuu i ai. Ma le faaloalo lava.

FOFOGA FETALAI: Malo faafetai. O le talosaga mulimuli a le Nofoa sui usufono mamalu, se i saunoa sao i le tatou Tulafono Tau Faaofi. Ou te talitonu e tauama pea i le tulaga ina ia limataitaiina le tatou Fonotaga, aumai lo outou finagalo faaalua ma fautuaga i luga o le tatou suiga ua i ai. Ia, lafo atu le avanoa.

Tulai mai le sui mulimuli mo se sui usufono e fia saunoa. Tulai mai le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, e le umi foi se manatu. Na pau lava o lea, o lauga faalauaitele lea tatou te i ai, o lauga faalauaitele i le NPF. Lau Afioga i le Fofoga Fetalai, o lea foi la o le a ou lauga faalauaitele, aua e le malaese i ina malaese i ina.

FOFOGA FETALAI: Malie le Taitai o le Itu Agai se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o se mea e fia faasao. O le lauga faalauaitele, ae lauga tonu lava i le NPF mea ia o lo o aumai i le Tulafono Tau Faaofi. Ae a aumai loa mea e le i aumaia i le Tulafono Tau Faaofi o lea e faamoemoe e aumai i le... o le ala lena o lea sa ou tutulai atu ai foi i isi sui usufono, agai mai pea i le Tulafono Tau Faaofi lea. Na ala ona ou taua isi fuafuaga na, mo le silafia, e i ai le taimi e aumai ai le Tulafono Tau Faaofi lena ona tatou taufai veloaso lea i ai. Ae ala ona matou tutulai atu, e agai ese loa ma le Tulafono Tau Faaofi, ona faigata loa lea ona matou nofonono.

FOFOGA FETALAI: O le ala lea lau Afioga i le Fofoga Fetalai, e manatu foi e le o po malae o oe le isi sui usufono matua o le Maota. I le tulaga o le faatulagaga ma le mea e tau o le lauga faalauaitele, o lea lava e tuutalaloa i le taimi o le tatou Tala o le Tupe ma isi mea, ae a tulai loa i tulaga tau Tulafono, e sagatonu lau o le fo i le Tulafono. Ae a tatou o loa e fai le lauga faalauaitele i se mataupu, o le a tatou toe talanoa i le NPF atoa. O le faigata lea, ae agai mai i le Tulafono Tau Faaofi lea e Toe Teuteu lau Afioga i le Taitai o le Itu Agai.

Afioga Hon PALUSALUE FAAPO II: Faafetai. O le ala lena o lou taumafai atu. O lea ou te lauga faalauaitele i le Tulafono Tau Faaofi lea. O le mea la lea lau Afioga i le Fofoga Fetalai, pei ona... e le malaese ina malaese

inei. E tatou te taumafai ina ia faia Tulafono Tau Faaofi ina ia maua ai e le atunuu le manuia. A o le mea lea ua ou maitau atu ai i i, pei o le a matele e puipui le faaputugatupe, ae o le a avea ma auala e faigata ai ona maua e nai o tatou tagata faamanuiaga.

Na pau lava lea o lou popolega e tataua ona silasila i itu e lua, aemaise lava o le fesoasoani mo nai o tatou tagata. Silasila la i le lua tausaga lea ua i ai nei? Ae faapefea le tagata faigaluega ae maliu i le tausaga, ma le 11 masina? Pe toe tasi le aso au i le lua tausaga ae le maua le faamanuiaga? O le mea tonu lava lea e ala ai ona ou tulai atu.

FOFOGA FETALAI: Malie le Taitai o le Itu Agai se i tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea foi la ua sese atoa le Taitai o le Itu Agai. O le mea lea sa ou faamatalaina atu, lea na ala ai ona taua lou tulai atu e tau atu le tagata e tasi le aso, po o le lua foi aso, po o le tolu foi aso. E le i taitai ona oo i se \$10 lana saofaga. O le mea lea e i ai le Tulafono Tau Faaofi, afai e oo lau saofaga i le tulaga o le equivalent i le lua tausaga, ona apalai lea ia te oe le mea lene. Ae muamua atu, sa na o le tasi le masina. O le uiga lene lau Afioga o le Teuteuga, ua suia atoa le mea, tasi le masina lea e i ai nei. Na o le tasi lava le masina o le tele o lau saofaga e te pai loa i ai, ona activate loa lea o le death benefit. E pei o le mea lene ua ou faalogo atu fai mai e lua tausaga. A o le mea lea e i ai nei, a fesoasoani atu ia te oe, e fesoasoani atu i le tulaga o le saofaga i le tasi le masina, a o lea la ua mafai ona oo atu i le lua tausaga, pe afai e oo atu i ai ua tele lau saofaga ua totogi. E pei o le tulaga lene, ma e tumau pea le \$5,000 lea o lo o i ai e ave i le tagata.

FOFOGA FETALAI: Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, o le a le toe finauina lea mea, leaga o lea e manino i i le Tulafono Tau Faaofi...

FOFOGA FETALAI: Malie ia lau Afioga i le Taitai o le Itu Agai, ou te manatu ua manino ma malamalama....

Afioga Hon PALUSALUE FAAPO II: Ia, na o le pau lava lea o le fautuaga e tuu atu, ua matua faigata ona agavaa nai o tatou tagata i faamanuiaga nei, ona o le saisaitia i Tulafono nei, a ua le maua ai le agaga na ala ai ona fai le Tulafono....

FOFOGA FETALAI: Malie le Taitai o le Itu Agai...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Masalo e le o maua mai e le sui usufono, e le i faapea na fai le tatou Tulafono i le 1972 e le i i ai ni puipuiga, sa i ai lava puipuiga mai le taimi lene. A o puipuiga ia e fai nei, ina ia matua faamaape ma faamaoti lelei ai le fesoasoani ina ia talafeagai ma tupe a le tagata na sao, talafeagai ma le faaaaau pea o le tupe. Aua e faigofie lava ona tatala faasoloatoa le mea lea,

o fea la le mea e oo i ai? E mafai ona uma ane le vaiaso ua leai se tupe o toe i ai, pe a tatala pei o le mea lea e te manao i ai, e tatala faasoloatoa. O le mea lea tatou te mananao i ai a tupu ae le faalavelave a ia o atu tagata o la e i ai le seleni e mafai ona faatino ai a latou fuafuaga. A o le mea lea e pei e foliga mai e te manao ia faafaigofie... O le atunuu leni, e tatala loa lava le mea faatafagaloa, e le ato le vaiaso a ua leai se tupe o totoe. Ia ona sai foi lea, a fai atu lava matou tala e tatala ona soona tatala lava lea, a o lena tou te iloa le mea e tatau ona fai, e tatau ona puipui? Ia o lea foi ua fai atu puipuiga a o lea foi ua e sai.

FOFOGA FETALAI: Ia, tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, malie o le mea fia faasao lau Afioga, leaga e ao lava ona manino lelei le tatou mataupu.

FOFOGA FETALAI: Faasao le a Lealailepule?

Tofa Lealailepule Rimoni Aiafi: O lea e saunoa le Palemia i le tuutafagaloa o le mea.

FOFOGA FETALAI: Malie o lea o le a ou toe faamanatu atu le tatou Tulafono Tumau, e faasao Palu ae le faasao oe.

Tofa Lealailepule Rimoni Aiafi: Lau Afioga Palusalua, seiloga lava e lua tausaga talu ona e faigaluega, a e oti, e sao lelei lava le saunoaga a lau Afioga, a faapea e te oti ua tasi le tausaga 11 masina ma le luasefuluiva aso, e te le entitle lava i ai, seiloga e lua tausaga talu ona e faigaluega faatoa e entitle i le \$5,000 lea e saunoa i ai le Afioga i le Palemia. Ae te manatua foi lau Afioga, a selau tagata e feoti i le tausaga, na o le \$500,000 e le taitai ila ai le NPF. Ma le faaaloalo lava.

FOFOGA FETALAI: Ia, tulai maia le sui usufono mamalu e faaiu maia le saunoaga o lea ua manino le mataupu.

Afioga Hon PALUSALUA FAAPO II: Na pau lava le mea e fia faasao ona uma loa lea o lau lauga, e leai se faamoemoe o leni Itu e faapea e tatala faasoloatoa, e leai. E fuafua a tatou Tulafono Tau Faaofi ina ne i le ausia le mafuaaga na ala ai ona fai le Tulafono Tau Faaofi. O le a le mafuaaga? Ia manuia tagata faigaluega, na pau lava lea. Ae leai se agaga e tatala ina ia tala uma. Ia manuia le Fono.

FOFOGA FETALAI: O lea ua maua lou finagalo. Malo faafetai.

Susuga Hon TUILAIPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le tulaga lava ia o le Tulafono Tau Faaofi e faatoa tatala i le taimi e litaea ai le tagata, a o lea e fai lava fuafuaga a le Komiti ina ia mafai ona faaoga e le tagata ana saofaga. A o le autu lava o le Tulafono Tau Faaofi, e leai se mea e tatalaina, seiloga e te litaea. A o le agaga o le Komiti lea e aumai nei, o lea lava e fai ma talatala malie mai ae auala i nogatupe, ma isi lava aiaiga faaopoopo e pei

o le tulaga foi lele pe afai e te alu i fafo e te le toe foi mai ona faatoa mafai lea ona tala, pe afai e te mai i se mai matuia lava. E mafai foi ona tala mai, ae o le puipuiga la, e te alu e tapa se lipoti a le fomai. E i ai ma le isi mea, afai foi e te alu e te faafaiifeau, ia e mafai foi la ona tala ai i ina. Ia silasila la i ai i le anoano o faitotoa ia e mafai ona tala mai ai seleni.

E i ai le isi tagata na sau ia te au ona fai mai lea, o le a se isi auala e mafai ai ona tala lau NPF? Ia ona ou taua lea i ai o auala e mafai ai ona tala, pe a ma le 15 tausaga talu ai, ona ou taua lea i ai. Ona fai mai lea, “O lona uiga la e mafai ona ou alu i le fomai.” Ou fai atu, “O le mea lene, o lene e te malosi, o lea ou te vaai atu o lene e te malosi.” Ona fai mai lea, “O le a ou alu pea.” E atoa ea le masina ae ou telefoni lava ua ou toe manatua faapea, se i ou toe vili lava e siaki po ua tala. Ae ou vili atu, ua tala. Ia ona ou talanoa lea i le fomai, ou fai atu i le fomai, “O le alii lea na ou follow up ina, ua tala, e le mai a o lea ua tala. O lau lava lene vaai faaletagata, e le mai, ae ata le fomai fai mai, “A faapefea, ua alu le aso o tagi i ou luma ua ou le iloa pe a faapefea ona tuli, a o lea lava e nofonono i ou luma.” Ua ala ona ou taua le tala lea, ona e i ai tagata faapena, e te fiu e faamatala i ai. O le Fono i le tausaga o lea ua ou tau manatu nei, o le tausaga e 1989, na tu ai le isi faipule i ina ma fai mai, “Tuilaepa, o lea ou te iloa le isi tagata ua tala lana NPF i luga o le tulaga ua mai, a o la e malosi. Ona ou fai atu lea i le faipule, o oe o le palama, o le fomai lea na tusia le lipoti, o le fomai, na te iloa le soifua maloloina e pei lava o Aeau lene e ataata mai i le mataupu lenei. Aua foi na o fomai e iloa le soifua o le tagata. Ae fai mai la le palama, o le tagata e le mai, a o la e ua tala lana NPF. O ai ou te talitonu i ai? Ou te talitonu i le fomai pe ou te talitonu i le palama. O lea ou te iloa le mea a le palama e fai, e alu lava ma lana suo e elieli mea o lua. Ia, ae finau mai lava. Ona ou fautuaina lea o le palama faipule, “A lua toe fetai la ma se isi o ola pea a ua tala lana NPF, ona e alu lea e te fai i ai po o le a le mea e saga ola ai ae ua leva ona tatau ona oti, e pei ona fai mai ai le fomai.”

Lau Afioga i le Fofoga Fetalai, o le tulaga lene, e tele nai auala o lea e i totonu o le Tulafono Tau Faaofi, e ese mamao lava ma le mea na i ai le uluai Tulafono, le uluai Tulafono, seiloga lava ua e oti, faatoa tala i tua. A o le tele ia o mau avanoa ia e mafai ai ona ave i tua seleni, ae ala ona fai puipuiga nei, a le puipuia mea nei, ua iloa lelei lava o tatou uiga. E sau nei lava le tagata ia te oe e talanoa mai o lea ma lea ma lea, o lou itumalo ae manaomia se \$1,000 ae alu atu, e ese mamao lava le mea na sau ai, ma le mea la e tupu. E faapena lo tatou olaga lau Afioga i le Fofoga Fetalai, e tatau ona i ai ni puipuiga ina ia malupuipuia aua e le faapea o tagata uma e faapena. E le faapena uma le toatele. O le toatele lava o tagata o le NPF, o la e latou te iloa lelei Tulafono. A o le toatele foi ia, latou te iloa lelei Tulafono ae manatu lava e moulu i lalo o le Tulafono ina ia fai le mea la e manao i ai ae le fai le mea lea e fai mai ai le Tulafono. A o Tulafono nei, o Tulafono ua uma lelei lava ona pasi atu i le Maota lenei.

FOFOGA FETALAI: Malo faafetai. E manatu ua manino ma malamalama le faatulai mai o lenei Tulafono Tau Faaofi taua. E silafia foi a maea le tatou Fono lenei ona ave lea i le Komiti, o i ina la ou te lagona e lava ai lo outou taimi e soalaupule. O lea foi ua faafofoga ma le manino ua saunoa lea tala na atoa i le Itu Agai, saunoa foi le Taitai, ou te manatu o le mea lava e tasi ma le manaoga ma le faaunautai o le Maota ina ia manuia tagata. Ou

te manatu le tatou Komiti, a ave i le Komiti toe foi mai, tele le avanoa, ae manatu ua tatau ona faagasolo.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi lenei i le Komiti o Tupe Maua ma Tupe Totogi mo le tolu masina mo le iloilo ma toe lipoti mai i le Fono Aoa.

TULAFONO TAU FAAOFI O TEUTEUGA O LE TULAFONO O LE PENISINI 2014 – faitauga muamua

FOFOGA FETALAI: Tulai mai lau Afioga i le Palemia.

Susuga Hon TUILAEPÄ FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e puupuu lava le Tulafono Tau Faaofi, o le fasi Tulafono e le o se Tulafono Tau Faaofi tele. O lea ou te tulai atu ai e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Penisini 2014 i lona faitauga muamua.*

Faaluaina e le Sui Palemia ma le Minisita mo Tina ma Tamaitai, Atinae o Nu'u ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau, o le a faatulaga le Tulafono Tau Faaofi mo le faitauga faalua i le Aso Fono lona 3 e mulimuli mai.

TULAFONO TAU FAAOFI O IUNI FAAUNETUPE 2014 – faitauga muamua

FOFOGA FETALAI: Tulai mai lau Afioga i le Sui Palemia, le Minisita mo Pisinisi, Alamanuia ma Leipa.

Tofa Hon FONOTOE NUAFESILI PIERRE LAUOFO (Minisita mo Pisinisi, Alamanuia ma Leipa): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Iuni FaauNETUPE 2014 i lona faitauga muamua.*

Faaluaina e le Minisita mo Galuega tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo le faitauga faalua i le Aso Fono Iona 3 e mulimuli mai.

**TULAFONO TAU FAAOFI O TULAGA TAGATANUU I LE
TEUFAAFAIGALUEGAINA O TUPE MAI FAFO 2014 – faitauga
muamua**

FOFOGA FETALAI: Tulai mai lau Afioga i le Sui Palemia ma le Minisita mo Pisinisi, Alamanuia ma Leipa.

Tofa Hon FONOTOE NUAFAESILI PIERRE LAUOFO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Tulaga Tagatanuu i le Teufaafaigaluegaina o Tupe mai Fafu 2014 i lona faitauga muamua.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo le faitauga faalua i le Aso Fono Iona 3 e mulimuli mai.

**TULAFONO TAU FAAOFI O TEUTEUGA O LE TULAFONO O LE
PULEGA O TAULAGA 2014 – faitauga muamua**

FOFOGA FETALAI: Tulai mai le Afioga i le Minisita mo Galuega, Felauaiga ma Atinae Eseese.

Afioga Hon MANUALESAGALALA ENOKATI POSALA (Minisita mo Galuega, Felauaiga ma Atinae Eseese): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Taulaga 2014 i lona faitauga muamua.*

Faaluaina e le Minisita mo Leoleo, Falepuipui ma Tinei Mu.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo le faitauga faalua i le Aso Fono Iona 3 e mulimuli mai.

**TULAFONO TAU FAAOFI O TEUTEUGA O LE TULAFONO O
FAALAPOTOPOTOGA A LE MALO (FAATINOGA O GALUEGA
MA LE MAFAI ONA TALI ATU) 2014 – faitauga muamua**

FOFOGA FETALAI: Tulai mai lau Afioga i le Minisita mo Galuega tau Alamanuia ma Atinae a le Malo.

Afioga Hon LAUTAFI FIO SELAFI PURCELL (Minisita mo Galuega tau Alamanuia ma Atinae a le Malo): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faalapotopotoga a le Malo (Faatinoga o Galuega ma le Mafai ona Tali atu) 2014 i lona faitauga muamua.*

Faaluaina e le Minisita mo Fesootaiga ma Faamatalaga Tekonolosi.

Na faamaonia le lafo ma faitauina le Tulafono Tau Faaofi i lona faitauga faalua.

**TULAFONO TAU FAAOFI O TEUTEUGA O LE TULAFONO O LE
FAAPUTUGATUPE MO LE LUMANAI MANUIA O TAGATA 2015 –
faitauga muamua**

FOFOGA FETALAI: Tulai mai lau Afioga i le Palemia ma le Minisita o Tupe.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 i lona faitauga muamua.*

Faaluaina e le Sui Palemia, le Minisita mo Galuega tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le Aso Fono lona 3 e mulimuli mai.

**TULAFONO TAU FAAOFI O TEUTEUGA O LE TULAFONO O
FAALAPOTOPOTOGA A LE MALO (FAATINOGA O GALUEGA
MA LE MAFAI ONA TALI ATU) 2014 – faitauga faalua**

FOFOGA FETALAI: Talu ai ona ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu o Le Ao o le

Malo i le Tulafono Tau Faaofi lenei, o lea o le a sagai atu loa le Fono Aoa o lona faitauga faalua.

Tulai mai lau Afioga i le Minisita mo Galuega tau Alamanuia ma Atinae a le Malo.

Afioga Hon LAUTAFI FIO SELAFI PURCELL (Minisita mo Galuega tau Alamanuia ma Atinae a le Malo): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faalapotopotoga a le Malo (Faatinoga o Galuega ma le Mafai ona Tali atu) 2014 i lona faitauga faalua ma ou te fia tautala faamalamalama i ai.*

Faaluaina e le Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Tulai mai lau Afioga i le Minisita e saunoa faamalamalama i le Tulafono Tau Faaofi.

Afioga Hon LAUTAFI FIO SELAFI PURCELL: Faafetai lava i lau Afioga i le Fofoga Fetalai mo le avanoa.

Lau Afioga i le Fofoga Fetalai o lenei Tulafono Tau Faaofi o Faalapotopotoga a le Malo (Faatinoga o Galuega ma le Mafai ona Tali atu) 2001 po o le Tulafono Autu lea, o lo o pulea e le Matagaluega o Tupe i le taimi nei. O mataupu lava na fuafua mo le vaavaaia ma le puleaina o Faalapotopotoga a le Malo o lo o faatinoina lea e le Minisita ma le Matagaluega o Tupe i lalo o le Tulafono Autu.

O le Teuteuga la lenei o le Tulafono o lo o taumafai atu i ai a pasia, ona aloaia ai lea faaetulafono le puleaina o Faalapotopotoga uma a le Malo i mataupu uma lava i lalo o le Matagaluega fou lenei ua faatuina. O le Teuteuga foi lenei o le a faamausaliina ai ma faamallosia le uunaia ma le siitia o le faatinoga o galuega a Matagaluega uma ma Faalapotopotoga a le Malo e oo lava i ona Komiti Faatonu, le Pulega ma aufaigaluega.

O lenei Matagaluega fou sa faatuina i le aso 25 Aperila 2014 ina ua uma ona saunoa le Afioga i le Palemia lea na tofia ai le Minisita e patino lava i Faalapotopotoga nei a le Malo. O nai vaega la nei o le Tulafono Tau Faaofi o lo o atagia i lalo o le Teuteuga.

Ua teuteuina le Tulafono Tau Faaofi e lagolagoina ai ma galulue ai le Matagaluega fou latou te mataituina galuega faatino a Faalapotopotoga e 27 a le Malo o lo o i ai nei. Ua fautuaina le Malo e ala atu i Minisita o lo o umia sea po o shareholding Ministers mo le faaleleia atili o galuega faatino aemaise o le sini autu ina ia fai saofaga ma togimaa Faalapotopotoga uma a le Malo i atinae a lo tatou atunuu.

O le Fuaiupu 2: o le suiga o le faaupuga i Minisita e fitoitonu i ai po o responsible Ministers ma avea ai Minisita o Faalapotopotoga a le Malo ma Minisita e fitoitonu i ai Faalapotopotoga e 27. O lo o i ai foi nisi o faaopoopoga o upu ma uiga fou e pei o le Pule Sili, Ofisa Sili o Pulega, le Failautusi o Tupe, Faalapotopotoga a le Malo ma le Matagaluega mo le faafaigofieina ona faatinoina ma faamalamalama lenei Tulafono Tau Faaofi.

O le Fuaiupu 3: o le faaopoopoga o le Fuaiupu 22A mo tupe faatatau a Faalapotopotoga a le Malo e patino lava i Faalapotopotoga o lo o tuuina mai a

latou tupe i Tala Faatatau o Tupe a le Malo e aofia ai Faalapotopotoga tau faamanuiaga a le Malo po o Public Beneficiaries Bodies.

Fuaiupu 4: o le suiga o le Fuaiupu 23 ina ia tatau ai i Taitaifono o so o se Faalapotopotoga a le Malo ona fautuaina le Minisita e umia sea ma Minisita e fitoitonu i ai po o le shareholding Minister ma le responsible Minister e ala lea i so o se faamatalaga i so o se mea e aafia ai tulaga tau tupe a Faalapotopotoga a le Malo ma vaega e moomia mo fautuaga o lo o aiaia foi i lalo o lea fuaiupu, ina ia silafia ai e Minisita e umia sea le gasologa o galuega e faailoa mai ai ni faaaitaui e ono aafia ai tulaga tau tupe a Faalapotopotoga a o le i oo atu i se tulaga ogaoga.

Fuaiupu 5: o le faaopoopoina o le Fuaiupu 23A ma le 23B o se vaega fou e aiaia ai Faalapotopotoga a le Malo ina ia tausisia lelei le faamauina o faamatalaga ma tusi, faapea foi aiaiga o tusi tupe a Faalapotopotoga a le Malo. O lo o faamalasia ai foi i lenei Fuaiupu ia faaopoopo le tatau ona teuina malu ma faaogaina tatau aseta a le Malo o lo o teuina i totonu o Faalapotopotoga.

Fuaiupu 6: o le suiga o le Fuaiupu 26 o le Tulafono Autu ina ia mafai ai e le Failautusi o Tupe po o le Ofisa Sili o le Pulega o le Matagaluega fou ona faatinoina se iloiloga po o se suesuega e uiga i le faatinoina o galuega ma faamaumauga a Faalapotopotoga a le Malo.

Fuaiupu 8: o le faaopoopoina lea o le Fuaiupu 27A(1)(2)(3). O le (2) e i ai ona (a) ma le (b), e tatau ai i so o se tagata ua masalomia ua i ai ni tulaga faaletonu e le gata i le Pulega o le Faalapotopotoga a le Malo po o ua i ai ni tulaga e ono aafia ai le faaogaina o tupe a le Faalapotopotoga, e tatau i lea tagata ona aloaia le faailoa mai e ala i se tusitusiga i le Failautusi o Tupe o le Pule Sili lea o le Matagaluega o Tupe ma Minisita e ana sea, o le Minisita lea o le Faalapotopotoga faapea le Minisita o Tupe lea tulaga. O tagata e faatatau i ai nei vaega fou o le Tulafono Tau Faaofi e faaoo atu a latou tusitusiga mai le Minisita ma e aafia ai foi le puipua o tagata nei i lalo o Tulafono, e le mafai ona moliaina pe faasalaina ona o le latou gaoioiga lea ua fai pe faamaonia le tuuaiga pe leai. Atonu o le vaega lea lau Afioga i le Fofoga Fetalai e i ai le faaupuga foi lea faapapalagi o le whistle blower lea e puipua i lalo o le Teuteuga fou lea.

Fuaiupu 7A: o lo o i ai le Fuaiupu 28 e oo atu i le 28D o lo o faatulafonoina ai se vaega e faasino tonu i nonogatupe a Faalapotopotoga a le Malo, ona o lenei vaega sa fai ma vaega o le Tulafono o le Pulea o Tupe, ae ona e faasino tonu lava i Faalapotopotoga ua alagatatau ai ona sii mai le Tulafono Tau Faaofi o Teuteuga nei ina ia manino atoa ai le faagasologa o galuega a Faalapotopotoga a le Malo, aemaise foi i le faamalasia faaletulafono o le Matagaluega fou latou te iloilo ina ai nonogatupe a Faalapotopotoga a le Malo po o loans aemaise tupe a le Malo e faatupe atu i Faalapotopotoga po o on lending, ina ia mautinoa le fesootai lelei o nei atinae tetele ma le anavatau a le Malo ina ia siitia lona tamaoiga ma le manuia lautele o ona tagata. E le gata i lea, a ua faamanino ai foi i totonu o le Fuaiupu 7 lenei faiga faatauofoga na aafia ai le Faalapotopotoga ina ia faamautinoa ai pea le faatasi o nei galuega ma taiala e pei ona faataatitia e le Matagaluega o Tupe.

Lau Afioga i le Fofoga Fetalai, o le suiga o le Tulafono Autu o lo o faamalasia atili ai le vaavaaia ma le mataituina o faatinoga o galuega a Faalapotopotoga e 27 a le Malo ua i ai nei. O lo o i ai foi isi Faalapotopotoga e lua lea ua faaopoopo atu i ai, ona atoa ai lea o le 29 Faalapotopotoga

Tumaoti a le tatou Malo. O Faalapotopotoga ia o le Gaming Authority lea sa faaigoa muamua o le TAB ma le Vaega lea a le SIFA, lea o le a faaopoopo mai i le 27 lea e i ai nei.

Lau Afioga o lenei Tulafono Tau Faaofi ma nei faiga a le Malo, sa tilotilo i isi a tatou atunuu lata mai, o lo o ua i ai a latou Matagaluega e patino lava i Matagaluega nei a le Malo, e i ai Toga, Fiti, Niu Sila, Ausetalia, e i ai lava a latou Minisita e faapitoa lava mo mea nei o SOEs po o Ground Entities e pei ona iloa ai i isi atunuu. O lea la na aoao uma mai ai manogi e tau fausia ai le tatou Matagaluega fou ma ana galuega fai i fuafuaga mo le agai i luma, aua o le mea sa i ai ua fai le tatou Tulafono, ae sa i lalo uma lava o le Minisita o Tupe galuega uma nei. O lea la ua faatu le Matagaluega fou, o lea la ua sii mai vaega o lea sa i lalo o le Tulafono o le Pulea o Tupe i totonu i i, atoa ai ma nai teuteuga faigofie lava na e i ai ina ia mafai ai ona tatou pulea ma vaai lelei le sao ma le pulega o Faalapotopotoga nei e 27 o lo o i ai nei e le na ma se laina. E le i ausia e le tele o Faalapotopotoga Tumaoti a le Malo le faamoemoe sa i ai ina ia fai saofaga i tausaga uma i le tatou Tupe Maua a le Malo ma tupe faaalu.

Lau Afioga i le Fofoga Fetalai, atonu e leai lava ni mea e ponatia ai lenei galuega po o lenei Tulafono Tau Faaofi. Aua afai tatou te.... Sa fesili se tasi o sui usufono po o afea e maua ai ni tupe a le malae vaalele e fesoasoani i le... sa tali le uso a Minisita, o lalo tonu la o le Tulafono Tau Faaofi lea, o le a vave lava ona maua atu le tali. E le gata o le malae vaalele, a o nisi lava foi o Faalapotopotoga tetele a le Malo, lea e tau faapitoa o Public Training Bodies.

Ia o le faamalalamalama lea lau Afioga atonu e leai lava se faafitauli o lenei Tulafono Tau Faaofi, o mea o teuteuga e le o se Tulafono Tau Faaofi fou. Ma lou faaaloalo lava.

FOFOGA FETALAI: Malo faafetai saunoa i lau Afioga i le Minisita e a ia le Tulafono Tau Faaofi, ma e talitonu foi i le faafofoga atu a le Nofoa aemaise o le faafofoga a sui usufono mamalu, ua matua manino ma malamalama le faatulai o lenei Tulafono Tau Faaofi. O le tatalo lea sa tuuina atu i le Atua, aua o lea lava e manino ma malamalama le faatulai mai o lenei Tulafono Tau Faaofi. O le tatalo lea sa tuu atu i le Atua, aua o lea lava e agiga i finagalo o sui usufono, o manatu ma lagona ina ia aua ne i tatou o e toe autago lenei vaitau, ia matua galulue Ofisa Sili o Pulega ma i latou uma ina ia sagatonu le faatulagaga o le Matagaluega, e le gata ina fiafia e pasi atu tupe i nei, a ia faasoaso ma le tatau ina ia gafatia ma gafataulimaina ina ia maua se faasiliga e fesoasoani mo le tatou Tala o le Tupe. O lea la ua faatulai mai lenei Tulafono Tau Faaofi taua, faafetai i lau Afioga.

Ona o lea ua tatou taunuu i le...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lona ua fola atu e le Minisita le Tulafono faavae. O le Tulafono faavae lea o le Matagaluega fou, ma e le o na ma le laina le faanaunautaiga o le Malo, e le gata o le Malo, ae faapea foi i le Itu Agai, i le saunoa pea, saunoa pea i le tulaga o le silasila totoa i le faagaioiga o mea nei o Faalapotopotoga Tumaoti, ina ia efficient, ina ia lelei le faafoega. O lona uiga o lea mea, ia maua a latou tupe maua, faaoga tatau aseta a le tatou Malo ina ia lelei le tautua i le atunuu, ae le gata i lona, ia maua mai ni tupe faasili e fai ma pasi mai i le Matagaluega o Tupe e faatino ai ana

auaunaga. O Malo uma lava la ua agai i le mea lea, o le specialization. Ia i ai lava se Minisita o lana ia lava lea matafaioi ina ia matua silasila totoa i le tulaga lea, ua tele tele le Matagaluega o Tupe, ae lelei ona i ai se Minisita faapitoa o lana matafaioi lea o le agai tonu lava i i. Masalo o le tausaga e 1984 o lea ou te tau tomanatu atu, na fai ai foi e le Malo o Niu Sila le mea lea, ona o le tulaga tuai lava foi lea sa tatou sau ai, ona o le tele lava o faiga faavae o lo o tatou mulimulitai ai, o mea na faataoto mai i faigamalo a Niu Sila, ona faatu ai lea e latou le Matagaluega ma le Minisita e fitoitonu lava i ai le vaaiga totoa o mea nei o Matagaluega tumaoti, aemaise lava o lea e i ai auala e mafai ai ona faasao tupe ma tilotilo foi latou i a latou sailigatupe i le mea lava lea o le fai ma... A vaai lava ua alu i luga tau o tau e talafeagai ona fai lea ma fesiitai a latou charges, a latou foi tupe maua. Ae le o le nofoai nofoai ua tea le 20 tausaga, 30 tausaga ona faatoa aumai lea o se teuteuga, aumai ua tele, ona fai lea ma mea e te i ai le Maota lenei, ma faapena foi ona faitioina ai e le mamalu o le atunuu ona ua leva ona nofononofo. O le mea la lea e taua tele ai lava le Tulafono Tau Faaofi lenei ua faatulai mai ina ia mafai ai ona tuuina atu le malosiaga faaletulafono i le Minisita ua tofia nei e agai tasi loa lona ia sa ia matua faatino ma le atoatoa le vaaiga o Faalapotopotoga nei.

Lau Afioga i le Fofoga Fetalai, o le toe faaopoopo atu lena i le saunoaga matagofie a le Minisita e tusa o lenei Tulafono faavae.

FOFOGA FETALAI: Malo faafetai. Ona o lea ua tatou taunuu i le tatou malologa, ou te manatu o le a tatou alo e fai se malologa o le taeao. E pei ona silafia e le tatou Maota, o le vaiaso lenei o lo o faamanatuina ai le 40 tausaga o se tasi foi o Faalapotopotoga a le Malo, le Kamupani Vaa. Ua logoina au o lo o i ai se faaaloalo mo la outou taumafagati i lenei taeao, na ona logo aloaia atu faapena. Faafetai le faaaloalo i le Afioga i le Minisita aemaise le paia o le Faalapotopotoga ma le Pulega.

Ou te faasilasila atu o le a faataatia ese Tualumaga a le Fono Aoa mo lana malologa masani o le taeao.

Na faataatia ese Tualumaga a le Fono Aoa mo lana malologa masani i le itula e 10:48 i le taeao ma toe faaauau i le itula e 11:21 i le taeao.

FOFOGA FETALAI: Ia, e i ai le agaga maualuga o lea ua tatou taunuu mai i le afa lona lua o lenei taeao ae le i faia le tatou malologa i le itula e tasi, ma e manatu foi o lea ua maua le faasiliga malosi aua le tatou malologa na maea nei. Sagai maia le paia ma le mamalu o le tatou Maota, e talitonu o lea ua faagasolo le tatou galuega.

E faia le tatou malologa ua maea le saunoaga faamalamalama a le Afioga i le Minisita mo Galuega Tau Alamanuia ma Atinae a le Malo, aemaise foi le agai atu o le faamalamalama a le Afioga i le Palemia ina ia manino ma malamalama lelei tulaga o lenei Tulafono Tau Faaofi taua ua faatulai mai, ona manatu ai lea o le a avatu le avanoa lenei i le tatou tulaga masani mo ni finagalo i le tatou Tulafono Tau Faaofi.

Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai. E momoli atu foi le faafetai i lau Afioga i le Minisita mo le Tulafono Tau Faaofi. E talia e lenei sui usufono le tele o vaega o le Tulafono Tau Faaofi. Faafetai lava i le Ofisa foi ma le mamalu o le Matagaluega ua faatino ai le Tulafono Tau Faaofi lenei, e pei o se Tulafono Tau Faaofi foi lea e taumafai e puipui ai lea vaega.

E lua vaega o le Tulafono Tau Faaofi ou te fia lauga ai. O le mea muamua, o le vaega lea sa saunoa ai le Minisita i le faapapalagi o le whistle blower po o le vaega lea o lea ua puipuia ai le tagata foi lea e moliaina se mea o tupu i totonu o le Matagaluega. Lau Afioga i le Fofoga Fetalai, o le vaega lea, e manaia le vaega o le Tulafono Tau Faaofi, ae i ai lava lou popolega i le vaega lea o le Tulafono Tau Faaofi i le puipuia lea o le vafealoai i totonu o le Matagaluega.

Silasila lau Afioga i le Fofoga Fetalai, o le Tulafono Tau Faaofi lea ua faataatia mai, o lea ua puipuia ai se tasi e moliaina se mea o faaletonu i totonu o le Matagaluega, pe molia ai se tagata faigaluega, aemaise lava i totonu o le va lea o tagata faigaluega. E i ai mea e ono tutupu mai ai, e ono tupu mai ai se vevesi i totonu o le Matagaluega. O le mea lenei o le moliaga o se mataupu faapenei, e tau le faatulafonoina. A i ai lava le tagata ia e faamaoni i totonu o le Matagaluega po o se tagata e faamaoni i le tautuaina o le atunuu ua silafia pe silasila atu ua i ai se faaletonu i totonu o le Matagaluega, o la e tele lava le avanoa o le Tulafono e alu ai e fai sana talosaga, a o lea ua faataga mai. O le popolega lea e ia te au i le Tulafono Tau Faaofi lenei, o lea ua i ai le mea foi lea e le toe aafia ai le o le a faia lea vaega, e le aafia i le Tulafono Tau Faaofi. Ae o se vaega lelei le vaega lea....

FOFOGA FETALAI: Malie le sui usufono se i tuu atu i le faamalamalama a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, e sao lelei lava le sui usufono i le mea lea. Ae i ai mea ua tutupu ua afaina ai latou ia, ma o mea foi na o lea e lipoti mai i nusipepa fai mai e a ma a ma a, ua fefefe tagata e tautatala. E leai lava se mea o le a fefefe ai fua tagata e tautatala i ni mea o la e faaletonu. Ae i ai le... o le case lata mai nei lava na tupu ai le mea lea, o le mea lea na fai ai le Komisi Suesue e faasaga i leoleo i le Pulega. E i ai la le tina na nofo ma fai le tusi ona aumai lea ave publish, ae leai se igoa. Ma e faigata ona iloa pe sao ia mea pe leai, aua o le leai o se igoa e tupu ai le masalosalo pe moni nei moliaga, a o lea lava e i ai auala e mafai ona fai ai, tai pei o le Ombudsman, e mafai ona sulufai i ai tagata. A o le tele o tagata, latou te le iloa mea ia, o le aiatatau lea a latou. Ua alu alu le mea ua uma ona ou ave aua na avatu foi ia te au le tusi, o lea lava sa fai mai ai au tautalaga i luga ina ua fesiligia au e le media i le case lea. Ou fai atu, “O au ou te le iloa pe moni nei mea aua e le o tusia mai ai ni igoa o ni tagata.” Ae sa ou ave i le tatou Ombudsman se i tilotilo pea i ai, toetiiti lava atoa le tausaga e le i mafai se faiga i ai, ae toe alu atu loa le tusi lona lua, o le eseese la o le tusi lea, ua alu atu loa ma le leoleo lea ua tuli. Ia, ona ou ave foi lea i le Ombudsman se i tilotilo i ai, o le mafuaaga lea na fai ai loa le Komisi Suesue ma fai ai loa ma fesuaiga ia. Ae o le iuga o le mataupu lena, o le faaiuga a le Kapeneta, ia toe faafaigaluega le leoleo lea, o la e sa lelei lana mea na fai, aua ana le faia lana tusi lena, e le

iloa foi e le Kapeneta ma le lautele mea o lo o fai i Tafaigata. E i ai lava la le itu lelei o le mea lea, e ui e i ai foi ona itu faalelelei lea ua e sau tonu ai lava. A o tulaga lava ia, e i ai lava le tofa ma le faautaga mamao e mafai ai ona soalaupule mea nei ma le aafia ai o tagata faigaluega. Ae i le tulaga la, e fai si inaina o le Pule o lo o aafia ma fai ai loa se faaiuga matuia tele, e pei o le mea lena o lea e mafua ai le vaega lea o le Tulafono Tau Faaofi mo le puipuiga, a o la e foi e i ai le tatou Ombudsman e sulufai i ai tagata i tulaga lea, ae sao lelei lava le mataupu lea e laga e le sui usufono, e faamalo atu foi i le saunoaga.

FOFOGA FETALAI: Malo, tulai mai le sui usufono mamalu e faaauau le saunoaga.

Tofa AVEAU TUALA LEPALE NIKO PALAMO: Faafetai, e faafetai atu foi i le Afioga i le Palemia mo le amanaia foi o se manatu.

O le vaega lona lua la o lea ua saunoa le Afioga i le Palemia, ia o lou popolega lava o le vafealoai i totonu o Matagaluega aua o lea ua ave le avanoa lea. O le vaega lona lua o le Tulafono Tau Faaofi ou te fia talanoa i ai, o le vaega lea o faaunegatupe ia e faataga i Faalapotopotoga laiti ia po o Matagaluega ia o le...manaia ia o le vaega i luga o le Tulafono lea e i ai le avanoa o le tupe mai le Malo, lea e i ai le avanoa e tagatagai i ai le Matagaluega o Tupe, a o le vaega fou lea ua faaopoopo mai i lalo ifo o le vaega o le Tulafono Tau Faaofi lea, e leai se avanoa faapena, o lea ua ave tuu saoloto le avanoa i le Board po o le Matagaluega, e o ai lava latou e sue mai se mea e loan ai pe aumai ai se tupe. O le popolega la lea e i ai fai mai le Tulafono.....

FOFOGA FETALAI: Malie le sui usufono, se i tuu atu le avanoa i le faamalamalamaga a le Afioga i le Minisita.

Afioga Hon Lautafi Fio Selafi Purcell: Lau Afioga i le Fofoga Fetalai, o le mea e fia faamalamalama atu o le vaega lea, ne i te i ua eseese le interpretation o le faamatalaga ma le manatu o le sui usufono. O vaega ia Faalapotopotoga a le Malo, e o i private foi ia pe o i se bank, a, e o e loan mai ai ni a latou tupe, ae muamua la aumai le latou manatu lea i le Matagaluega fou lena ona sailiili lea ma le Matagaluega o Tupe, pe fetai ia le latou nonogatupe lea o le a o e fai ia ma tulaga uma, pe mafai ona latou totogia i le taimi lea o le a fuafua ai, afai e fai atu tulaga faapea ae e maua foi lea....e le tataua ona fai le nonogatupe lea, ia o le fautuaga lena e ave i ai, aua le faia lena nonogatupe, sue se isi auala, faafetai.

FOFOGA FETALAI: E manatu ua malamalama le folasaga. Tulai mai le sui usufono mamalu.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, e sao lelei le Afioga i le Minisita. O le popolega lea ia au i le vaega lea o le Tulafono, o lea ua ave le avanoa, pei ona ou taumafai atu, manaia le vaega muamua o le Tulafono, e mafai ai ona loan mai totonu o le Malo pe manaomia se fesoasoani mai totonu o le Malo. I lalo la o le vaega lea, e mafai ona liable ai le Malo, e mafai foi ona ave muamua i le Ofisa o

Tupe, pe fetai le mea lea e manao ai le vaega lea e fai le faaunegatupe lea, a o le vaega lea e i lalo ifo o le Tulafono, o lea fai mai, e mafai ona o le Faalapotopotoga lea e loan mai e so o se tagata private lend foi lea e aumai ai se tupe i totonu, e le liable ai la le Malo i le vaega lea, e le liable ai le Malo i le vaega lea. O lea la ou te popole ai, o ai la e tuu i ai le vaega lea pe a te i ua le mafai e le Board, aua o lea e sau.....

FOFOGA FETALAI: O lea ua maua le finagalo o le sui usufono, se i tulai atu le Afioga i le Minisita.

Afioga Hon Lautafi Fio Selafi Purcell: Lau Afioga i le Fofoga Fetalai, e manatua foi o public bodies nei e tele lava le sea a le Malo o lo o i ai, e leai la se faapea e le aafia ai le Malo i totonu i i, pei foi ona ou fai atu, o totonu o le Matagaluega fou leneni, o le a develop le framework e tilotilo tonu lava i mea nei o private, borrow nisi Faalapotopotoga ia tumaoti, e le faapea...o lea ua tuu lava le avanoa, afai e i ai se lend e mafai ona latou nono maia se tupe i se tului maualalo mai i le Faalapotopotoga, o le avanoa la lea e tuu i ai, e tuu foi le avanoa i Board Members e faaoga le latou initiative e le faapea o le a faatalitali lava seiloga e loan atu e le Malo se tupe. A i ai se lend e iloa e latou e mafai ona maua ai se latou feutagaiga, maua ai ni tului mama mo le Faalapotopotoga, ia ona o lea e faatoai i ai, ae o le a set up i lalo o le Ministry fou i le Monetary Functions ia se magnesium, e tataua lava ioe atu Matagaluega, faatoa faatino lea o nonogatupe faapenei, ma lou faaaloalo lava.

FOFOGA FETALAI: Tulai mai le sui usufono.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, faafetai i lau Afioga i le Fofoga Fetalai. Leai e saolele lava lau saunoaga, o lea e manino lava le Tulafono Tau Faaofi, e le noatia le Malo ma le atunuu i le vaega lea ou te talanoa atu ai, e le o se mea leaga foi la ia au, e le o fai atu sou manatu e aua le o e fai lea vaega. Pau lava lou popolega, po o ai la e liable i le vaega lea, aua o lea e sau, e le noatia ai. O ai la e noatia ai? E noatia ai le Board, pe noatia ai le.....

FOFOGA FETALAI: O lea ua manino le sui usufono mo Faleata Sasae, ia se i tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le policy lava a le Malo e tusa lava pe noatia pe le noatia ae aumai lava i le Kapeneta e fai ai le faaiuga, o le puipuiga lena e tapa ai foi ma le lipoti a le tatou Matagaluega o Tupe, e mafai ai ona siaki pe talafeagai, pe le talafeagai le nonogatupe lea, na faataoto mai lava le iuga lea ou te tau manatua nei o le tausaga e 1989 na faataatia mai ai e le Kapeneta mea ia. A o le agaga tonu o le Tulafono pei ona saunoa le Afioga i le Minisita, ia tau uunai le agaga foi lea aua le ola faalagolago mea nei o Faalapotopotoga, ia taumafai latou e faaoga metotia o lo o ia i latou e mafai ai ona fai a latou nonogatupe, e le o ni nonogatupe tetele, a o nonogatupe e gafatia. O le ala foi lena a aumai i le Kapeneta e tapa e le Kapeneta ia ni studies sa fai, i le gafatia e fua i a latou tupe maua ona service ia le loan o le a fai. Ae manatua foi, o le tele o Faalapotopotoga nei o la e i ai latou Aseta, e le

tau guarantee la e le Malo, e i ai a latou Aseta e mafai ona faaaoga mo le noatia ai o a latou nonogatupe, o mea foi na e tilotilo i ai Faletupe, o le latou tupe e maua e fua i tausaga ua tuanai, ia matou Aseta e mafai ai ona talatala mai. E tele lava o tupe nei, o mea o OD, e faagaoioi ai overdraft limit ina ia faagaoioi ai le Faalapotopotoga, ina ia aua ne i alu alu nofo lea, e le gata foi i lea, a o latou tupe maua, ina ia silasila totoa i le faagaoioiga o latou tupe maua, aua ne i ola faalagolago mai i le Malo, o lea foi e tele mea ia e faafeagai ma le Malo. O le taua o le itu lena, e aveese ai le ola faalagolago, ae faaaoga le faautautaga tataua e fai ai a latou suegatupe ia ma faalelei ai le latou Tala o le Tupe.

FOFOGA FETALAI: Malo faafetai, e manatu ua manino lea mataupu le sui usufono mo Faleata Sasae, ae faasolo mai i nisi o mataupu.

Tofa AVEAU TUALA LEPALE NIKO PALAMO: Faafetai. E pei o le agaga tonu lava lea na ala ai ona avatu le manatu, pe i ai se leo a le Kapeneta i totonu o le vaega lea e ave i ai le mea lea, pe i ai foi sina fautuaga e aumai i le Matagaluega o Tupe e faatino ai le vaega lea faatoa faatino ai, ae le o i ai se agaga e taofi le vaega lea, pau lava lea o se mea ina ia mautinoa ai, o la e alu i ala fua o galuega e pei ona i ai. Ia na o le pau lea o manatu lau Afioga i le Fofoga Fetalai, faafetai lava.

FOFOGA FETALAI: Malo faafetai i le sui usufono mamalu. Ia malie se i toe avatu le avanoa i le Afioga i le Minisita.

Afioga Hon Lautafi Fio Selafi Purcell: Lau Afioga i le Fofoga Fetalai, se i toe faaopoopo atu lava, o le vaega lea sa saunoa i ai le sui usufono mamalu, o le vaega lea o le Tulafono Tau Faaofi lea e sii sao mai lava o le Public Finance Management Act, e le o ni mea fou la, o mea lava sa i le isi Tulafono o lea na ona aumai lava tuu atoa i totonu i i, leaga o le vaega lea sa faatino mai e le Matagaluega o Tupe, lea o le a faatino e le Matagaluega lenei. E le faapea o se Teuteuga fou mea ia o mea o la e sii mai i le isi Tulafono i le isi Tulafono, o aiaiga lava nei e masani ai. Ma le faaaloalo lava.

FOFOGA FETALAI: O lea ua maua e le sui usufono le auga o lona finagalo pe i ai se final say o le talia o le tuuina atu o le nonogatupe i fafo, o lea ua tali manino le Taitai o le Malo, o mea uma lava e pasia e le Kapeneta e le i faia se mea e tasi. Tulai mai le sui usufono mo Gagaemauga Nu. 2, ona sosoo ai lea ma se tasi o sui usufono mo Salega, Afioga Afualo Wood Uti Salele.

Tofa LEVAOPOLO TALATONU (Gagaemauga Nu. 2): Faafetai lava i lau Afioga i le Fofoga Fetalai mo le avanoa. E manatu foi e le umi se matou tala i i le Teuteuga lea o le Tulafono Tau Faaofi o lo o manino lava ia le tele o vaega.

O se Tulafono Tau Faaofi ua leva ona tataua ona tatou agai i ai, ona o le tulaga foi o le tele foi o tiute tauave ia o le Ofisa o Tupe, aua o le mea moni lava, ia e tele lava ina i ai foi nai faasea i le tatou Ofisa o Tupe ona o le tulaga o le tau slack laitiiti a latou galuega, ia a o lea lava e manino i le tatou lava iloa, o le tele lava o tiute tauave ma ua talafeagai foi la le vaega fou lea.

Na pau lava sina vaega lea lau Afioga i le Fofoga Fetalai e tau avatu ai se manatu, i mea lava ia o le lipotiina o solitulafono. E i ai lava le manatu, e a pe a lipoti i le Ombudsman, ia po o le tulaga foi lea ona oso atu laia e fai le faaiuga i i le Ofisa Sili ia po o le Afioga i le Minisita, e mafua ona o se tulaga ina ia auiliili lelei se suesuega i tulaga uma ia ua tagisa atu ai ia se tagata faigaluega. Ona fai uma laia e le Ombudsman na vaega, ia ona lafo loa lea agai i o i le Faatonusili po o le Faauluuluga o le Matagaluega ma le Afioga i le Minisita e fai i ai se recommendation mo le Kapeneta. Na pau lava la si vaega foi lea ou te vaai atu i ai, o lo o faapea mai e leai se faasalaga i tuuaiga i so o se tagata, ou te manatu au ia o le a faatele ai ia galuega i mea ia pe a faapea o le a tuu saoloto ia le tagata e tiga lava ona le mautinoa se mea e tupu i totonu o le Matagaluega, ae o le a alu lava e molitu lea vaega ma alu ai le taimi.

O le isi vaega e mafua ai ona ou talanoa atu i le vaega lea, ia o lea e tatou te amata iinei, a avatu se faasea a sui usufono i tulaga o ni mea piopio po o a ni tulaga e faalelelei ai ia se Matagaluega ma mea uma, o lea lava e tapa faamaumauga a sui usufono, e molimauina ai le sao ma le faamaoni o sana mau. O le uiga la o lau faamatalaga i le tulaga lea, o le alu ai o le taimi ae avatu e tiga lava ona le sao a o la ua alu ai lava ma le taimi o le ofisa i suesuega.

O le isi vaega lau Afioga i le Fofoga Fetalai o le vaega mulimuli lea, o lea foi ua ou vaai atu i i o le fautuaga lea i lau Afioga i le Minisita, e vaai atu i i o le isi tiute o le vaega fou lea o le silasila i le okaina o oloa a so o se Matagaluega o lea e i lalo o le 28, e i ai le manatu lau Afioga i le Fofoga Fetalai ona ua feoloolo foi sina experience ua maua i lenei mea i le okaina o tatou mea, o lea e faaoga ai le tatou system po o le formula lea o le CIF. O le tele o le aufaipisinisi lea e agai mai fafo ma folafola mai i le tatou Matagaluega, o latou e mafai ona latou okaina mai a, o le faataitaiga pei o ni PV paipa foi ia mo le water authority, tasi na mea taugata. O le mea la e omai ai latou e aumai ma le mea lena o le CIF, ioe, o lea la ua tatou totogi atu ai e le gata o le cost, o le insurance ia latou ia ma le freight. Ae i ai lava le system lelei e faasaoina ai tupe a le tatou atunuu e faaoga ai le FOB le Freedom Board, o le mafuaaga e ala ai ona ou fai atu lau Afioga i le Fofoga Fetalai, e ui lava o le CIF pe a faapea e faaletonu se oloa ua charge se supplier la e aumai ai, a o la foi e maua le oloa a le FOB e charge ai le kamupani vaa ua faaleagaina ai ni oloa a lo tatou atunuu, afai la tatou te alu pea i le CIF, o la e tatou te totogia ni insurance i o i suppliers la e i o, e maua fua le latou tupe, ae oo mai foi la i, toe fai le insure pe tasi ea pe lua pasene a le tatou Custom lea e maua ai foi nai a tatou seleni. Pei la o le ala lena e avatu ai faafautuaga ia faamalosia foi ma silasila totoa i mea ia e lua, ona e tele lava le tatou gau lea e tatou te gau ai nei i le aufaipisinisi lea e omai e fia feola mai i totonu o le tatou atunuu. Ma le agaga faaaloalo, faafetai.

FOFOGA FETALAI: Malo faafetai. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le fetau le FOB, e tatau lava ona tauave pea le CIF, leaga o i ina lea e faavae ai le tiute. A tatou alu i le FOB, o lena ou te iloa le agaga na e te fai mai ai, e mama ai au tiute pe a aumai. A o le mafuaaga lena e faaoga ai le CIF ia talafeagai lelei e access ai

le duty mo le Malo ia lava le tulaga ia atagia tonu ai le tiute e tatau ona totogi, aua o le tau uma lava lea e alu i le tagata lea e aumaia le mea, aua o le tau sao lava, o le cost na totogi i o, tuu i ai ma le freight na aumai ai, a, ia ma lana insure, o le tau sao lena. O le tau sao la lena e tatau ona faavae ai le tiute. Ae ave la le FOB, ia ona tupu loa lea o le faalavelave ua leai mea na e lua, ia ona laitiiti ai loa lea o le tiute e totogi. E le sao lea mataupu. Na ala ona fai mea ia ina ia atagia tonu ai tiute e tatau ona ao e le Malo.

Tofa Levaopolo Talatonu: Lau Afioga i le Fofoga Fetalai, e leai e le o maua tele mai foi e le Palemia le tulaga lea. A faapea nei ua sau se supplier i o e tau mai le aofai atoa o le oka lea ua aumai, e sau i luga o le CIF, o le insurance la lena e nofo i o. O le mea lea e fai i tai e le tatou Customs e fesili po o le a le cost, o le a le freight? Ona culcuate lea o le 2% o le tatou insurance i tai. E ese la le insurance i o lea tatou te totogia i o i le supplier, ese le tatou insurance. Ou te le o fai atu e le tatau ona faia se insurance mo a tatou tupe, ae faafetai lava.

FOFOGA FETALAI: O lea ua maua le finagalo o le sui usufono atonu foi e faatupu manatu.

Tulai mai le Afioga i le Minisita.

Afioga Hon LAUTAFI FIO SELAFI PURCELL: Na o le faaopoopo atu lava i le fesili a le sui usufono mamalu.

Atonu o lena ua faamalamalama atu e le Afioga i le Palemia, ae silasila foi, tasi lea vaega o le Tulafono e sii sao mai lava i lalo o le tatou Public Finance Management Act lea e i ai nei. O lea foi e i ai provisions aua e le faapea e tuufauina lava le o e enter i totonu o konekarate nei e aumai ai oloa. O lea e i ai le provision lea e mafai ai e le Matagaluega o Tupe po o le Financial Secretary ona faatulai mai se framework e mulimulitai ai Faalapotopotoga i feutagaiga i tulaga ia e te saunoa i ai. Atonu la o le puipuiga lena e iloa ai po o le a tonu lava po o le CIF po o le FOA po o le a ea le mea lena e te saunoa mai ai, o lea e puipua i lalo i inei i le vaega lea, ma le faaaloalo lava.

O le vaega lona lua lea sa saunoa i ai le sui usufono, e pei lava o le mea lava lea i le puipuiga o i latou nei e faia se faamatalaga. Ia silafia foi e le faapea a aumai loa se tusi a le tagata lea i Minisita ma le CEO a le Matagaluega ona fai loa lea o le suesuega. E leai, e i ai saililiga preliminary work e silasila i ai po o le a le mamafa o lenei tuuaiga ua fai mai. Aua e pei o mea nei e pei o se mea ua masalomia. E pei o se mea foi lenei ua amata ona masalosalo tagata e pei lava ua i ai se mea ua faaletonu i lana ia silasila i totonu o le Matagaluega, ona e pei ua ese le mea lea ua i ai ua alu ese mai fuafuaga autasi po o le corporate plan, ae ua ese le mea ua alu i ai fuafuaga a le Matagaluega ma le Pule Sili. E le faapea la a aumai fai loa le suesuega. E i ai foi auala e tatau ai ona mautinoa e shareholding Ministers e anoa tuuaiga ia ua aumai. Afai lava e preliminary enquiry e leai lava se mea o faaletonu, o i ina e uma ai, ae a i ai nisi tulaga i tua atu ona tilotilo loa lea o Minisita po o shareholding Ministers e toalua ma le CEO, po o le a le isi sitepu, pe fai e le Matagaluega po o le a se isi tulaga faapena. O lea foi e i ai le tatou Ombudsman e mafai foi ona refer i ai na te faia se tulaga faapena.

Ma lou faaaloalo lava lau Afioga i le Fofoga Fetalai.

FOFOGA FETALAI: Malo lava faafetai.

Tofa Levaopolo Talatonu: Lau Afioga i le Fofoga Fetalai, faamolemole lava. E pei o le agaga autu lava ia o se lagona vaivai, o le manumanu i le taimi aua o lea e saoloto e leai se faasalaga pe afai ua alu ma se lipoti e le talafeagai. O le mea la e popole ai ina ne i te i ua 2000 aua e tóatele le afaigaluega, ne i te i ua 500 masalosaloga o tagata masalosalo ona laina atu lea i lou ofisa, faafetai.

FOFOGA FETALAI: Ia tuu maia, e manatu o lea e tau faafoe le Tulafono Tau Faaofi, a o le a iloa lava pe a tatou oo i ai.

Tulai mai se tasi o sui usufono mo Salega, Afioga Afualo Wood Uti Salele.

Afioga AFUALO WOOD UTI SALELE (Salega): Faafetai lava i lau Afioga i le Fofoga Fetalai mo le avanoa. E faafetai foi i sui usufono ua maea ona sausaunoa i le amataga o le taeao aemaise foi o le afuafua mai i lenei vaega mulimuli o le taeao.

Ua faafetai i lau Afioga i le Minisita mo le Tulafono Tau Faaofi manino lea ua taoto. E moni lava au e le faigofie aemaise o lea ua vaelua atu ia te oe le tele o matafaioi lea sa i lalo o le Afioga i le Minisita o Tupe. E le faigofie la lou faatinoina o le galuega, a tele atu foi ni a matou tala, ia onosai. O fautuaga lava e fesoasoani ia te oe aua e mamafatu. E pei o lea sa tauave mai lava e le Minisita o Tupe aemaise foi o le Palemia ona o le agaga ina ia mautinoa ua lelei faatino le auunaga. Aua o le upu moni lava ia i le silasila i ai i le Tulafono Tau Faaofi e 27, a o lea o le a faaopoopo atu i ai ma le isi 2 ua 29. E le alu i lalo ae alu i luga, sa ou faapea lava au e toese, a o iinei e iloa ai le tele o le faatuatuga o le Tulafono Tau Faaofi lea ua avatu i lau Afioga e le Minisita o Tupe.

Ona pau lava sina vaega e agai i ai lau faamatalaga e fesoasoani atu ai, o le taua tele o lenei Tulafono Tau Faaofi ina ia mafai ai ona toe tapue le agaga tonu lava na ala ai ona faatu e le Malo le Faalapotopotoga tumaoti lenei a le Malo, e le gata ina ia fesoasoani mai o le latou sao lea i le Tulafono i le 7% lea, ae e mafai foi ona lelei ai ona faatino le auunaga i le aupito sili ona lelei i se tau taugofie mo le atunuu. O tulaga uma na aua atonu o lea e i ai isi itutino tumaoti ua latou ausia e ave lau faamalo i ai. E pei mo se faataitaiga, o lea foi e faamanatu le 40 tausaga o le Kamupani Vaa, e pei e tele lava lo latou sao ma e i ai foi isi itutino. A o le tóatele lava ou te le iloa po o le faatalale o i latou o lea e tulai mai i le foe, po o le taumafai ae ona ua pau lava o lenei vaitau ona o lea foi e faatauva ma Faalapotopotoga ma isi pisinisi tumaoti.

O le fautuaga lau Afioga i le Minisita, se i silasila totoa ane ia faaoga le avanoa lenei i le Tulafono Tau Faaofi ia mafai ai o a uma lava vaega i lalo o Faalapotopotoga tumaoti nei, e mafai ai ona toe fau ni avanoa fou mo galuega, aua o le tele ia o le malosiaga lea ua avatu ia te oe, aemaise lava e amatamea le Malo ina ia faatupu ae ia aua ne i oo i se tulaga foi lea o le a faatauva ai ma pisinisi tumaoti, ae ia fesoasoani lau Matagaluega ina ia mautinoa ua galulue faatasi. A i ai foi ni vaega o la e galueaiina mo auunaga lautele i Faalapotopotoga ia e faaono faamatuu i ai, aua e te fefe e fai aua e manuia uma ai tatou. Ou te talitonu foi a faamatuu i tua nisi vaega, e le gata ona o le a faamalie nisi vaega ia e i lalo o le faiga paaga lea, a o le a mafai ai foi ona tali mai Faalapotopotoga ma pisinisi tumaoti ina ia tulai mai i se

tulaga e tatau ona i ai. A o tatou i le Malo lava ia, e tatau ona amatamea ina ia silasila totoa i ai, ma ia aua foi ne i i ai se feteenaiga i le va o auaunaga o lo o faatino i Matagaluega. E moni o lea e silasila totoa i ai, ae o lo o matauina pea e tatau lava ona iloilo, aemaise sa saunoa manino foi i ai le Afioga i le Palemia aua o le tele o isi Tulafono ia e i ai i lalo, ua tatau ona toe vave faafou ma toe teuteu ina ia mautinoa ua ogatasi ma lenei vaitau, ma saga faatupu ai pea le agaga tauivi lea i totonu e le gata o Matagaluega ae faapea le atunuu i Faalapotopotoga ma pisinisi tumaoti, ona maua ai lea o se mea mautu mo tatou. Aua o le sini atoatoa o lenei Tulafono Tau Faaofi e le gata o tatou o tausī mea a le atunuu, tatou te vaavaaia ma teuteu ma silasila totoa foi i avanoa e faaleleia atili ai meatotino nei. E mavae atu tatou ae gasolo mai augatupulaga, a o lo o malutia meatotino a le atunuu ma le tausiga o le atunuu e ala i Tulafono.

Ua faafetai foi i le tofa a le Afioga i le Palemia ona o lea ua taoto mai. E moni lava matou te faasea i le le fai sao o le tele o Matagaluega, a o le mea e tatau ona fai aua o lea ua folau le sa o le Kapeneta aemaise o lau Afioga i le Minisita, o lea ua pue tonu lava le ala matagi lea e ui ai lou sa ina ia mautinoa ua tali mai i manaoga ia tau tamaoaiga o le atunuu, ae sili ai manaoga tau i le tausiga mo le manuia o Samoa.

O lau fesoasoani atu lea, ia faamanuia le Atua ia te oe ma lou tulai mai, faafetai.

Afioga Hon LAUTAFI FIO SELAFI PURCELL: Lau Afioga i le Fofoga Fetalai, e faafetai atu i le sui usufono mamalu.....

FOFOGA FETALAI: Tulai mai lau Afioga i le Minisita.

Afioga Hon LAUTAFI FIO SELAFI PURCELL: O le tulaga lea e pei ona saunoa i ai le sui usufono mamalu i gaoioiga o le Tulafono Tau Faaofi lenei e uiga i le maua ai lea o galuega, o le manatu lena o le Malo. E le mafai ona faapea e fai ni tulaga o Tulafono ma le faaleleia, ae le maua ai ni galuega. O le aua lava latou o le Tulafono Tau Faaofi ia faaleleia atili le agai i luma o Matagaluega nei i ona vaega uma atoatoa in all aspects, i le maua ai o galuega ma tulaga uma faapena, o itu na o lea e tilotilo i ai le Matagaluega fou lenei.

O le vaega lea sa e taua e faamatuu atu nisi vaega i tua, o itu na o lea foi ua oo i ai le manatu o le Malo i le Palemia ma le Kapeneta. O lo o i ai le pepa o lo o i ai nei e tilotilo tonu ai lava i tulaga ia. E pei foi ona ou taua i le isi taimi, ina ua i ai fuafuaga i le tulaga lea e tilotilo i ai le Kapeneta, ona fai lea o le latou faaiuga.

Ma lou faaaloalo lava lau Afioga i le Fofoga Fetalai.

FOFOGA FETALAI: Malo lava. Papalii e te fia saunoa i le Tulafono Tau Faaofi?

Susuga Papalii Lio Faavaivaiomanu Taeu Masipau: O lea lava lau Afioga i le Fofoga Fetalai.

FOFOGA FETALAI: Malie la se i faasolo mai ona ou tuuina atu lea o le avanoa o lea e faasolo avanoa o le felafolafoaiga.

E faapena oe Taefu? O le a tulai muamua mai Papalii Lio Faavaivaiomanu Taeu Masipau ona sosoo mai ai lea ma Papalii Niko Lee Hang, o le Afioga Taefu ona faaiu lea e le Afioga Toeolesulusulu.

Tulai mai lau Afioga i le sui usufono mamalu.

Susuga PAPANII LIO FAAVAIVAIOMANU TAEU MASIPAU: E lagolagoina foi e lenei sui usufono lenei Tulafono Tau Faaofi. E faafetai ai i lau Afioga i le Minisita ma le faamoemoe taua ua faatulai mai ai lenei Tulafono Tau Faaofi e pei ona saunoa i ai nisi sui usufono.

E talitonu o mea uma lava e naunau i le lelei, e tatau foi ona i ai ni luitau. O lau lava lui lau Afioga i le Fofoga Fetalai ma lau Afioga i le Minisita aemaise foi o lau Minisita Lagolago, Susuga Papaliitele aua o Papaliitele e saunoa so o lava i le tulaga lenei. E talitonu o se lui tele lea i lau Afioga i le Minisita faapea foi lau Minisita Lagolago, aemaise foi o Faalapotopotoga o lo o faafofoga mai. O Tulafono lava ia e lelei ma e leai lava se Tulafono e faaletonu. Po o a uma lava suiga tatou te taumafai i ai, ae a le mulimulitai ai ma usitaia ma faaoga, e leai lava se taunuuga, ae ou te talitonu po o a lava suiga o taumafai i ai i tatou, o le faanaunautaiga lava ia taunuu i se taunuuga lelei ma faamaoni i ai.

Ua saunoa foi nisi sui usufono, e manatu ua silafia foi e lau Afioga i le Fofoga Fetalai ma le paia o lenei Maota, e 27 le aofai o a tatou Faalapotopotoga, ae a tuu i ai ma le lua lea ua 29. O le a lava se tulaga e oo i ai le mafai, e tatau lava ona fai so tatou sao aemaise lava e pei ona saunoa lau Afioga i le Minisita. O le mea lava e faamamafa e lou sui usufono, ia tilotilo i a tatou Tala o Tupe lea e i ai i tausaga uma ma tausaga uma ina ia kava le mea lea i le va o tupe maua ma tupe faaalu, lea e faaoga ai nonogatupe tai \$100milionia i tausaga uma. O le lui lena i lau Afioga i le Minisita ma Faalapotopotoga o faafofoga mai, e tatau ona oo atu i le isi Paeaiga lea ua le toe faatumuina i na mea a o le a faatumu i sao mai Faalapotopotoga.

O lau lea fesoasoani atu lau Afioga i le Fofoga Fetalai.

FOFOGA FETALAI: Malo faafetai. Tulai mai lau Susuga Hon Papaliitele Niko Lee Hang.

Susuga Hon PAPANIIITELE NIKO LEE HANG (Palota Taitoatasi): E muamua ona ou faafetai atu i lau Afioga i le Fofoga Fetalai mo le avanoa. E puupuu lava foi se manatu i le Tulafono Tau Faaofi ma e muamua ona faamauina le agaga faafetai i le Afioga i le Palemia ma le Kapeneta i le faatulai mai o lenei Tulafono Tau Faaofi e faatuina ai se Matagaluega fou. E pei ona saunoa le Afioga i le Palemia, o lea ua specialise ai i inei se Matagaluega ua taitaiina e le Afioga i le Minisita, ina ia toe silasila totoa i le faagaioiga o galuega a SOEs. Ou te talitonu e taua le Tulafono Tau Faaofi lea ua faatulai mai aua o le a avea le Matagaluega fou lea, o le a silasila totoa i performances a Faalapotopotoga ina ia ausia le tulaga o le faamoemoe. E i ai le pasene o lo o faatulai mai i lea Tulafono Tau Faaofi ma e tatau ona ausia uma lava e Faalapotopotoga, aemaise o le vaega lea o Public Trading Bodies. Ou te iloa o le taua lea o le Tulafono Tau Faaofi lea aua e faamoemoe foi le Malo i tupe mama mai Faalapotopotoga nei ua taua o Public Trading Bodies e maua mai ai ni tupe mama e ave ai so latou sao by way of dividend e fesoasoani ai i Tala o Tupe a le Malo, ae faafetai ua tulai mai lea tulaga. Ou

te iloa ma ou te talitonu, o le a ma galulue faatasi ai ma le Afioga i le Minisita e tau faamalosiā le tulaga lea ma taumafai ai Faalapotopotoga ia e le o galulue e uunai i latou ina ia faapena ona ausia fuafuaga ia a le Malo.

O le isi mea lau Afioga i le Fofoga Fetalai i le taua o lenei Tulafono Tau Faaofi, o le a silasila ai foi le Matagaluega fou aemaise lau Afioga i le Minisita i Faauluuluga e le o achieve ina targets a le Malo ona fai lea i ai o se fuafuaga, a le perform ona tatau lea ona malolo mai pe a ua lelavava ae tuuina atu ni tagata o lo o lelei ma atamamai foi e taumafai ia ausia fuafuaga ia a le Malo. Faafetai foi i lenei Tulafono Tau Faaofi, masalo o lea ua toe faamanatu ai i i le tulaga lea e masani ona ou lauga ai i le le aumaia o Annual Reports ma Financial Statements i totonu o le Palemene pei ona moomia i lalo o lenei Tulafono Tau Faaofi. Ae faafetai o lea ua... ua tatou ona silafia e le Palemene le tulaga o tatou Faalapotopotoga Tumaoti ia i a latou gaoioiga ma ni tupe mama o maua, ona lauga lea o sui usufono i se tulaga e toe faaleleia atili ai pe a o faaletonu le auunaga.

O lau matau o le tele o Faalapotopotoga ia e le o maua ni tupe mama, e tatau ona maua ni tupe mama. E le o faaoga tatau tupe maua, ua tele ina fai nisi galuega faatino e invest solo, ae mautinoa e le lava se return e maua mai. Ae pei o le tulaga la lea o le a silasila i ai le Afioga i le Minisita ma au nei ina ia faamalosiā aemaise le Taitaifono ma sui o Komiti Faatonu ina ia silasila totoa latou i le faagaoioiga o Pulega ia a Faalapotopotoga ina ia taumafai ona i ai ni tupe mama ina ia ausia ai le fuafuaga faataatia a le tatou Malo.

E pei o le tulaga lea lau Afioga e momoli ai le faafetai ma le faamalo i le Afioga i le Palemia ma le Kapeneta i lenei Tulafono Tau Faaofi taua tele. Ma lou faaloalo lava.

FOFOGA FETALAI: Malo faafetai. Ia, tulai mai le sui usufono mo Falelatai ma Samatau.

Afioga TAEFU LEMI (Falelatai ma Samatau): Faafetai i lau Afioga i le Fofoga Fetalai. Ua tulai atu foi ma le agaga faaloalo e fia faamauina le agaga faafetai lava i le Tulafono Tau Faaofi lenei, aemaise foi o le momoli o le agaga faafetai i le Afioga i le Minisita. O Faalapotopotoga a le Malo lau Afioga i le Fofoga Fetalai, e le fou, ua leva ona i ai, ae na pau lava le mea fou lea e i i o lau Afioga i le Minisita ma lau Matagaluega fou. Ae ua tatau ma onomea. O se laasaga foi e pei e foliga mai ua leva ona tatau ona fai, ae le i nofoai foi le tatou Malo i la matou matau, aua o lea lava sa i ai le unit lea i totonu o le Matagaluega o Tupe o le SOEMU po o le State on Enterprises Monetary Unit. O latou la ia sa faia ituaiga galuega nei e tau faamaopoopo mai a tatou Faalapotopotoga ma faamaumauga. Ia, ou te lagona o le suiga lea ua faia e le Tulafono Tau Faaofi lea, o le faamalosiā ma faamalosi atili ma faamausali le faavae o le SOEMU lea o le a taua nei i le igoa fou lea e sili ai ona aloaia ma faauluulu i lau Afioga i le Minisita. Ou te talitonu lava au, ua leva ona folau lo tatou sa ma tapenapena le tatou Faalapotopotoga. Ou te manatua o le mea sa i ai, sa pule lava foi le Faalapotopotoga ia i le totogi o le Faauluuluga o le Faalapotopotoga ona laasia lea e le Malo ma tuumatamaga foi lenei vaega o le auunaga. Ae pei o nai tulaga na e iloa ai ua leva lava ona taumafai le tatou Malo. Silasila i Komiti Faafoe, o lea foi ua i ai le suiga o composition o Komiti ina ia mautinoa ua mausali lea vaega. E i ai le talitonuga lau Afioga i le Fofoga Fetalai, e i ai a tatou Faalapotopotoga ua too

independent tele, ua tutoatasi tele, ua tauau ina fai lava a latou faaiuga e aunoa ma le manatu i le tatou Malo ma le taitaiga a le Kapeneta ma le faamalumaluga. Ua tele le latou focus, ua amata ona mei ese ma le latou core function na ala ai ona faavae mai le amataga. A o le mea lena ou te faafetaia ai le suiga lea ua i ai nei, aua o lea o le a toe faatonutonu folau le Tulafono Tau Faaofi lea, ma lau Afioga i le Minisita, i le faatinoina o galuega a Faalapotopotoga.

Lau Afioga i le Minisita, na ona... e le aoaia e Laupua Tamafaiga ae na ona tuualalo lava a aoga lelei, aua e i ai lou talitonuga, e i ai nai Faalapotopotoga e pei e foliga mai o le a ova resource, e te alu atu i luma i le Ofisa ae toetiiti sii le isi tagata faigaluega i le isi tagata faigaluega. Taatia atu i lau Afioga, ta te sau i lalo i le car park e saili solo se car park, ua tumu ai taavale a le Matagaluega. Ae taatia atu pea i lau Afioga e faia se tatou resource utilization plan, e aafia atu ai ma human resources ina ia kava uma ma na vaega o le auaunaga. Ae ou te talitonu lava ua lava tapena lau Afioga i le Minisita mo le tulaga lea. E leai se Faalapotopotoga lau Afioga i le Fofoga Fetalai e faavaeina e aunoa ma se Tulafono, Tulafono Autu, Tulafono Faatonutonu, ona fai foi lea o Regulations ma policies ma procedures ma mea faapena. E leai se Faalapotopotoga e oge ma mea na, a o le faatinoga, o i ina lea e tau maua ai le mataituina e Faalapotopotoga o na mea uma ua i ai. Ae ua tata nei i Faalapotopotoga uma a le Malo ona i ai mea na o plans e faagaoioi ai le Faalapotopotoga, strategic plan, corporate plan, annual plan ma mea faapena, e incorporate i totonu mea uma lava ia e moomia e le Tulafono lea, ina ia mautinoa o sao ma uli le folauga a Samoa.

O le faanaunautaga ia ita nei lau Afioga i le Fofoga Fetalai, ia maua ni tupe faasao e fesoasoani i le Tala o le Tupe lea na tatou vavao ai i lena vaiaso, ia maua se sao o Faalapotopotoga a le Malo e fesoasoani ai i le faatupega o le tatou Tala o le Tupe.

Lau Afioga i le Fofoga Fetalai, o nai manatu na. Faafetai.

FOFOGA FETALAI: Malo faafetai i le sui usufono mamalu. Ia faaiu maia le saunoaga i le Afioga ia Toeolesulusulu. Tulai maia le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. Ia, e muamua lava e faamauina le lagolagoina e lou sui usufono o le Tulafono Tau Faaofi pei ona faataatia nei. Lua, o le auala faanatinati pei ona saunoa le tele o sui usufono, e taua ma ua alagatatau foi ona faatino loa ina ia mafai ona faatinoina aemaise tiute o le Minisita o lo o i ai nei. Na pau lea lau Afioga i le Fofoga Fetalai. O moomooga ma le tuualalo i le faagasologa ma le faatinoina o lenei Tulafono Tau Faaofi, e talosagaina ai le Minisita aemaise foi o le Faalapotopotoga po o le Pulega o le a feagai ma le faatinoina o lenei Tulafono Tau Faaofi ina ia tagatagai i ai, atonu foi e aoga mo le lumanai, ia i ai nisi o suiga po o nisi o vaega e ono faaleleia atili ai.

Muamua lau Afioga i le Fofoga Fetalai, pei ona taua foi le tulaga lea... Faafetai o lea ua matauina ua faamamafa mai i le Tulafono Tau Faaofi le faatinoina lea o lipoti i le tolu masina talu ona maea le financial year, aemaise lava o Lipoti o faaunegatupe po o tupe foi e avatu e le Malo e faatinoina ai nisi o galuega. E matauina foi o lea... ona o le tasi o vaega o le Tulafono Tau

Faaofi, pe ono tatau ona tuu foi i ai i totonu i i ma le vaega o lo o faaupuina ai le faataatiaina mai lea o Annu Reports pei ona taua e nisi. Ou te talitonu atonu foi e aoga le tuu sao i ai i totonu i le faatauaina o le aumai o Annual Reports lea i totonu o se vaitaimi talafeagai ma nisi o Lipoti o lo o manaomia e le Pulega.

Lau Afioga o le vaega lona lua, o le vaega lea atonu e mafai pe a oo i le taimi e faatinoina ai lenei Tulafono Tau Faaofi ona o lou sui usufono lau Afioga i le Fofoga Fetalai, ou te faale o malamalama tele i le faatinoina o le Faalapotopotoga lenei, ona o lo o taoto pea lea tele o SOEs i lalo o isi Minisita. O lau tau matau atu la e au e pei ona tau faamalamalama mai e le Minisita, a i ai ni faaiuga i atinae o le Pulega, e pei e fai i totonu o le Pulega ona ave lea i le Board. A uma le Board i le taimi nei ona ave lea i le Kapeneta. A o fea tonu la e i ai i le va lea, pe maea ona ave lea i le shareholding Minister ona toe ave foi lea iloilo e le Public Enterprise a le Ministry lea ona faatoa oo ai lea i totonu o le Kapeneta? Pe ua ono complicate pe ua tele tele foi auala e feuitai ai, po o le a sona aafiaga, se i silasila i ai, se aafiaga pe ono faatuai ai pe ono lavelave ai foi i le eseese o vaavaaiga i le tulaga o Minisita aemaise foi o Pulega ina ia fesoasoani ai foi i Pulega taitasi ia streamline le faiga o galuega, ona e talitonu o le faanaunautaiga lea o lo o i ai le tatou Malo.

Ma le vaega mulimuli lau Afioga, o le vaega o lo o faamatala mai ai foi i le tatou Tulafono Tau Faaofi, le vaega foi lea o le faiga o konekarate i totonu o Pulega mo galuega faaleleia i totonu o Pulega. E le o malamalama lelei lou sui usufono ona o lo o faamatala mai e faaoga pea Treasury instructions. Ae o le tele foi o nisi i le matau i nisi o Pulega, o lo o fai lava e latou faaiuga i a latou iloiloga. Ou te talitonu atonu foi e mafai ona tilotilo i ai pe ao ona tuu i ai ma le process o le ave i le Tenders Board pe faamalosi mai i totonu o le Tulafono Tau Faaofi ina ia follow ai foi lea process po o lavea i totonu o Treasury instructions vaega ia, o le faatauaina lea o le ave pea i le Board, ona e i ai nisi o Pulega foi e le o mafai ona faatinoina lea galuega i nisi o galuega sa faatino ua tuanai. Faafetai lau Afioga i le Fofoga Fetalai.

FOFOGA FETALAI: Ia, se malie lava lau Afioga i le Minisita o lea ua fai lau faaiuga a o lea e matau atu... E le afaina, faafetai le manatu mai.

Tulai mai lau Afioga i le Minisita e ana le Tulafono Tau Faaofi.

Afioga Hon LAUTAFI FIO SELAFI PURCELL: Faafetai i lau Afioga i le Fofoga Fetalai. Atonu o lea ua tilotilo atu ua uma faafesili sa fai i lenei Tulafono Tau Faaofi, ae faafetai atu i sui usufono mamalu sa saunoa. Ia, e i ai lava le naunautaiga o le Tulafono Tau Faaofi lenei ma le Faalapotopotoga lenei, o le a tilotilo uma lava i mea ia sa outou saunoa mai ai, o vaega uma lava na lea sa saunoa i ai sui usufono mamalu i ona tulaga uma. E pei ona ou fai atu i le taimi ua fano, o le Tulafono Tau Faaofi lenei e tilotilo i le faagaoioiga o Faalapotopotoga Tumaoti i lona aotelega. O mea uma lava la o lea e aofia i totonu o le faagaoioiga o Faalapotopotoga nei, o lea o le a tilotilo maoti lava i ai le Faalapotopotoga fou lenei, i tulaga uma lava o le faatauina, pei o mea ia o... lea sa saunoa ai le isi sui usufono i konekarate, o nogatupe, o relationship foi lea i tulaga o Minisita o lo o i ai nei ma le faagaoioiga ia efficiency. E pei o le isi matafaioi tele lona lea o le a mataitu, o le improve o

le efficiency and streamline processes, ia aua ne i tulai i le tulaga foi lea e toso ai lava, toso ai lava se mataupu pe faalua ona fai se mea e tasi.

A o le tulaga i saunoaga, faafetai tele atu i manatu. A o le tulaga lena e i ai le Tulafono Tau Faaofi lenei, e leai lava se mea e le o aafia i saunoaga e le o faapea e le o i ai se tulaga i lalo i i. O le isi foi tulaga faapea o le Tenders Board, o la e lava e fai i le taimi nei. O mea lava e i ai le vaegatupe e faaalu i luga atu, e tataua lava ona aumai i le Tenders Board ona oo atu ai lea i le Kapeneta. Po o a lava ni tulaga faapena, o lea lava e i lalo o isi Tulafono lena faatonuga i Faalapotopotoga a le Malo.

Lau Afioga i le Fofoga Fetalai, faafetai tele mo manatu ua faaalua. Manuia le Tulafono Tau Faaofi fou. Soifua.

FOFOGA FETALAI: Malo faafetai i le saunoaga faamalamalama a lau Afioga i le Minisita e ala i finagalo o sui usufono fou. Ia, o oulua mama na, you are the new Minister with the new portfolio, atoa ai foi ma lau Minisita Lagolago fou, ia sagai ane ai o le tai aua le faatinoina o lenei Tulafono Tau Faaofi taua.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faalapotopotoga a le Malo (Faatinoga o Galuega ma le Mafai ona Tali atu) 2014 i lona faitauga faalua.

TULAFONO TAU FAAOFI O TEUTEUGA O LE TULAFONO O FAALAPOTOPOTOGA A LE MALO (FAATINOGA O GALUEGA MA LE MAFAI ONA TALI ATU) 2014 – iloiloga auiliili

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati, ua maea foi ona sainia e Lana Afioga Mamalu i Le Ao o le Malo e uiga i le Tulafono Tau Faaofi lenei, o lea o le a sagai atu loa le Fono Aoa mo le iloiloga auiliili.

E tusa ai ma le Tulafono Tumau 102, e amata le iloiloga auiliili i le Fuaiupu 2.

FUAIUPU 2: Ua teuteuina le fuaiupu 2.

Faamaonia.

FUAIUPU 3: Ua faaofiina le fuaiupu 22A.

Faamaonia.

FUAIUPU 4: Ua teuteuina le fuaiupu 23.

Faamaonia.

FUAIUPU 5: Ua faaofiina fuaiupu 23A ma le 23B fou.

Faamaonia.

FUAIUPU 6: Ua teuteuina le fuaiupu 26.

Faamaonia.

FUAIUPU 7: Ua faaofiina le fuaiupu 27A fou.

Faamaonia.

FUAIUPU 8: Ua faaofiina le Vaega VIIA fou.

Afioga TOEOLESULUSULU CEDRIC POSE SALESA SCHUSTER:
Lau Afioga i le Fofoga Fetalai.....

FOFOGA FETALAI: O le a le Fuaiupu?

Afioga TOEOLESULUSULU CEDRIC POSE SALESA SCHUSTER:
O le Fuaiupu 8 faamolemole po o le 6, o le 6A po o le 7A faamolemole lava
lau Afioga ona o lea e matau atu.....

FOFOGA FETALAI: O le 7.

Afioga TOEOLESULUSULU CEDRIC POSE SALESA SCHUSTER:
O le 7A.

FOFOGA FETALAI: O le 7A.

Faamaonia le Fuaiupu 8.

FUAIUPU 9: Teuteuga faatupulaia i le Tulafono o le Pulega o Tupe a le Malo 2001.

Faamaonia.

FUAIUPU 10: Teuteuga lautele.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Faalapotopotoga a le Malo (Faatinoga o Galuega ma le Mafai ona Tali Atu) 2014.

FOFOGA FETALAI: O lo o i ai se faasaoga a le Minisita i le Fuaiupu 1 o le Tulafono, tulai mai lau Afioga i le Minisita.

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu le Faasaoga i le Fuaiupu 1 e faapea:

“FAASAOGA:

Ia aveese le fuainumera “2014” ma suia i le fuainumera “2015” ma faitauina ai le Tulafono e faapea:

**TEUTEUGA O LE TULAFONO O FAALAPOTOPOTOGA
A LE MALO (FAATINOGA O GALUEGA MA LE MAFAI
ONA TALI ATU) 2015.”**

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Faalapotopotoga a le Malo (Faatinoga o Galuega ma le Mafai ona Tali atu) 2015 faatasi ma Faasaoga.

**TULAFONO TAU FAAOFI O TEUTEUGA O LE TULAFONO O
FAALAPOTOPOTOGA A LE MALO (FAATINOGA O GALUEGA
MA LE MAFAI ONA TALI ATU) 2015 – faitauga faatolu**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo e uiga i le Tulafono Tau Faaofi lenei, o lea o le a sagai atu loa le Fono Aoao i le faitauga faatolu.

Tulai mai lau Afioga i le Minisita mo Galuega tau Alamanuia ma Atinae a le Malo.

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faalapotopotoga a le Malo (Faatinoga o Galuega ma le Mafai ona Tali atu) 2015 i lona faitauga faatolu.*

Faaluaina e le Minisita mo Tina ma Tamaitai, Atinae o Nuu ma Afioaga ma Agafesootai ma le Minisita mo Fesootaiga ma Faamatalaga Tekonolosi.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofa Faitulafono.

**TULAFONO TAU FAAOFI O TEUTEUGA O LE TULAFONO O LE
FAALAPOTOPOTOGA FAAVAE TAU FATUGAO A SAMOA 2013
– iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoaofa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioaga i le Taitaifono o le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai.

Afioaga Hon GATOLOAIFAANA AMATAGA ALESANA GIDLOW (Taitaifono Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai): Lau Afioaga i le Fofoga Fetalai ou te faatu le lafo, *Ina ia faamaonia e lenei Fono Aoaofa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2013 faatasi ma Teuteuga ma Faasaoga.*

Faaluaina e se tasi o sui usufono mo Palota Taitoatasi, Susuga Hon Papaliitele Niko Lee Hang, le sui usufono mo Aleipata Itupa i Lalo, le sui usufono mo Aiga i le Tai ma se tasi o sui usufono mo Palota Taitoatasi, Afioaga Mauaiva Pat Ah Him.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoaofa le Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2013.

O le a sagai atu le Fono Aoaofa i le Iloiloga Auiliili o le Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2013.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 7.

Faamaonia.

FUAIUPU 3: Ua suia le fuaiupu 8.

FOFOGA FETALAI: O lo o i ai le Teuteuga a le Komiti i le Fuaiupu 3 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le Fuaiupu 3 e faapea:-

“TEUTEUGA:

- i) *Ia suia le fuaiupu 8(1)(a) ina ia faaopoopo i ai upu nei “e pei ona tofia e le Kapeneta i le maea ai ma feutagaiga ma le Komiti Faafoe” ma faitauina ai e faapea:*

“(8) Afaigaluega (1) O le afaigaluega o le Faalapotopotoga Faavae e aofia ai:

(a) Le Pule Sili o le Faalapotopotoga Faavae e pei ona tofia e le Kapeneta i le maea ai ma feutagaiga ma le Komiti Faafoe.”

- ii) *Ia soloia le fuaiupu 8(2) o lo o i ai nei ma suia e faapea:-*

(2) E mafai e le Komiti Faafoe ona tofia ni tagata e agavaa ma talafeagai e pei ona fuafuaina i lalo o le faafuaiupu (1)(b) ma le (c).”

Faamaonia le Teuteuga.

Faamaonia le Fuaiupu 3 e pei ona Teuteuina.

FUAIUPU 4: Soloaiga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o le Faalapotopotoga Faavae tau Fatugao a Samoa 2015.

FOFOGA FETALAI: O lo o i ai le Faasaoga, tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuainumera “2013” ma suia i le fuainumera “2015” ma faitauina ai le Igoa o le Tulafono e faapea:

**TEUTEUGA O LE TULAFONO O LE
FAALAPOTOPOTOGA FAAVAE TAU FATUGAO A
SAMOA 2015.”**

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2015 faatasi ma Teuteuga ma Faasaoga.

**TULAFONO TAU FAAOFI O TEUTEUGA O LE TULAFONO O LE
FAALAPOTOPOTOGA O SUESUEGA FAASAIENISI A SAMOA 2014
– iloiloga auilili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auilili o le Tulafono Tau Faaofi.

Talu ai ona o le le auai o le Afioga i le Taitaifono ou te tapa ai lau Afioga i le Sui Taitaifono e tulai mai.

Susuga IFOPO MATIA FILISI (Sui Taitaifono Komiti o Mataupu tau Aoga, Saienisi, Fesootaiga ma Faamatalaga Tekonolosi): Lau Afioga i le Fofoga Fetalai faafetai mo lou avanoa, e faatalofa foi i le Maota i lenei aso, ua maua foi le avanoa o le Sui Taitai e avea ai ma Taitaifono o le Komiti o Mataupu tau Aoga, Saienisi, Fesootaiga ma Faamatalaga Tekonolosi.

Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Faalapotopotoga o Suesuega Faasaienisi a Samoa 2014 faatasi ma Faasaoga.*

Faaluaina e le sui usufono mo Palauli, le sui usufono mo Falelatai & Samatau, le sui usufono mo Sagaga le Falefa, le sui usufono mo Vaa o Fonoti, ma se tasi o sui usufono mo Falealili, Tofa Tusa Misi Tupuola.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le Tulafono Tau Faaofi o Teuteuga o le Tulafono o le Faalapotopotoga o Suesuega Faasaienisi a Samoa 2014.

O le a sagai atu le Fono Aoao i le Iloiloga Auiliili o le Tulafono Tau Faaofi o Teuteuga o le Tulafono o le Faalapotopotoga o Suesuega Faasaienisi a Samoa 2014.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i lona Fuaiupu 2.

FUAIUPU 2: Ua teuteuina le Fuaiupu 4.

FOFOGA FETALAI: O lo o i ai le Faasaoga a le Komiti i le Fuaiupu 2 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti o Mataupu tau Aoga.

Susuga IFOPO MATIA FILISI: Lau Afioga i le Fofoga Fetalai ou te faatu le Faasaoga i le Fuaiupu 2 e faapea, mo na o le Gagana Samoa:-

“FAASAOGA:

Fuaiupu 4(f):

Ia soloia upu “tagata e faapogai” o lo o aliae mai ina ua tuana'i le upu “po o” a o lumanai le upu “ai” ma suia i upu “vaega e gaosia” ma faitauina ai e faapea:-

“(f)ia faia o suesuega auiliili o nakoti po o vaega e gaosia ai mo faamoemoega o suesuega ma moliaga o soligatulafono; ma”

Faamaonia le Faasaoga.

Faamaonia le Fuaiupu 2 e pei ona Faasaoina.

FUAIUPU 3: Ua teuteuina le Fuaiupu 5.

FOFOGA FETALAI: Tulai mai lau Afioga i le Taitaifono.

Susuga IFOPO MATIA FILISI: Lau Afioga i le Fofoga Fetalai ou te faatu le Faasaoga i le Fuaiupu 3 e faapea:

“FAASAOGA:

i) Fuaiupu 5(v)

Ia soloia upu “tagata e faapogai” o lo o aliae mai ina ua tuanai le upu “po o” a o lumanai le upu “ai” ma suia i upu “vaega e gaosia” ma faitauina ai e faapea:

“(v) ia faia suesuega auiliili o nakoti po o vaega e gaosia ai mo faamoemoega o suesuega ma moliaga o soligatulafono; ma”

Mafuaaga o le Faasaoga:

Faamaonia mai e le Faalapotopotoga ma le Ofisa o le Loia Sili, o le upu “precursors” e faasino tonu i vaega e gaosia mai ai le Nakoti ae lē o tagata e faapogai mai ai le Nakoti e pei ona faaaogaina i le Gagana Samoa o le Tulafono Tau Faaofi.

ii) Fuaiupu 5(4)(a) & (b)

(a) Ia soloia upu “ma suega faataitai” o lo o aliae mai ina ua tuanai le upu “auiliili” a o lumanai upu “e manaomia” ma faitauina ai le (a) e faapea:

“(a) tauaveina suesuega auiliili e manaomia o taumafa i lalo o so o se tulafono o taumafa po o isi tulafono; ma”

(b) Ia soloia upu “ma le suega faataitai” o lo o aliae mai ina ua tuanai le upu “auiliili” a o lumanai upu “o taumafa” ma faitauina ai e faapea:

“(b) tuuina atu lipoti po o tusi faamaonia e faatatau i suesuega auiliili o taumafa i lalo o le parakalafa (a).”

Faamaonia le Faasaoga.

Tofa LEALAILEPULE RIMONI AIAFI: Lau Afioga i le Fofoga Fetalai, na ou fia fesili atu i le Fuaiupu 3 lau Afioga, faamolemole.

FOFOGA FETALAI: Ia ailoga e i ai se afaina, ua matua leva ona pasi le Fuaiupu 3 a o lea faatoa e tulai mai.
O lea o le a avatu le avanoa, ae...

Tofa LEALAILEPULE RIMONI AIAFI: I le faatinoina lea o aafiaga o le siosiomaga, mea ia o EIA.

Po o le a le... manatua o mea ia o lea e fai e le MNRE.

FOFOGA FETALAI: O le MNRE o le Matagaluega lena o lea e i ai le SROS.

Tofa LEALAILEPULE RIMONI AIAFI: O le uiga lena o lau tala lau Afioga, o lea ua tuumavaevae galuega ma galuega faatino a Matagaluega, o lea ua i ai Matagaluega a le Malo e faia lea vaega, a o latou nei, o mea o suesuega tau saienitisi lea se i tatou vaai i ai pe a. O le mea lena e fia fesili atu ai i le Komiti, pe na tagai i ai pe aisea ua aafia ai fua i lalo o lea Matagaluega, o lea foi e fai e le isi Matagaluega a le Malo o lea foi ua lava ma talafeagai a latou suesuega, o le a ova suesue a tatou mea, ae leai ni mea o tino mai. Ma le faaaloalo lava.

FOFOGA FETALAI: Leai, ou te manatu o lo o manino ma malamalama, o mea tau taumafa. O le SROS foi ia o la e feagai ma taumafa ma laau ia tatou te atugalu i ai i mea tau... Ia o le a tuu atu pea ia i le Afioga i le Minisita mo Punaoa Faanatura ma le Siosiomaga.

Tofa Hon FAAMOETAULOA LEALAI AULOTO ULAITINO FAALE TUMAALII (Minisita mo Punaoa Faanatura ma le Siosiomaga): Faafetai i lau Afioga mo le avanoa. A o le mataupu lena na ou tautala ai foi i taimi ua fano. O le MNRE latou te le faia ni suesuega o le EIA, Environment Impact Assessment, e fai e faalapotopotoga foi ia i tua e tumaoti, se third body foi lea ina ia credible le tulaga o le suesuega lea. O le mea la lena, o le SROS o lo o i tua latou te faia suesuega foi nei o mea tau environment impacts. O le faamalamalama la lena o le tulaga lea.

O le tulaga foi lea i se tuuaiga faapea ua tele suesuega ae le tino mai ni mea, e leai e sese mamao lava i sini lena faaupuga. Ma lou faaaloalo lava.

Tofa LEALAILEPULE RIMONI AIAFI: Lau Afioga i le Fofoga Fetalai, leai lea la ua faamanino e le Afioga i le Minisita le tulaga faaletonu lea e i ai le Tulafono Tau Faaofi. O lea ua saunoa mai e le faia e le MNRE le EIA ona o le Matagaluega a le Malo, e le tatau foi la ona faia e le SROS aua e le o se Matagaluega Tumaoti o le Matagaluega foi a le Malo.

FOFOGA FETALAI: O lea ua manino le folasaga.

Tofa LEALAILEPULE RIMONI AIAFI: O lea la ou te iloa, e fai e le independent ae ave i le MNRE e assess e latou. Ioe. E 400 au EIA ua fai lau Afioga. Ou te malamalama lelei i le faiga o le mea e tau o le EIA, ae ave la i le... o lona uiga la a uma ona ave i le BUMA ona toe ave lea i le SROS, o le saoga lea lau Afioga?

FOFOGA FETALAI: Se i tulai mai le Afioga i le Minisita mo Punaoa Faanatura ma le Siosiomaga. O lea ua maua lou finagalo Leala.

Tofa Hon FAAMOETAULOA LEALAI AULOTO ULAITINO FAALE TUMAALII: Lau Afioga i le Fofoga Fetalai, toa mai. O le tulaga ia i le assessment, na o le SROS lava e i ai masini ia e test ai le impact o mea faapena, e tai pei la o le soil contamination foi lea i le tulaga o lapisi ma mea faapena. E latou te iloa lelei lava la le tulaga o suesuega ma le faatinoina, e

faapena la ona maua ai foi lea o le atoatoa o le tali i le tulaga o suesuega ia pei ona manaomia. Aua a avatu foi la le DC po o le Development Conceit ae aumai e faaletonu ae faitio mai le mamalu o le atunuu o lea ua issue le development conceit a o lea e faaletonu le siosiomaga lea. O ai la e pau i ai? E pau tonu lava i experts o le field lea latou te faia, ina ia atoatoa lelei le auaunaga mo le atunuu. Ma lou faaaloalo lava.

FOFOGA FETALAI: Malo faafetai.

Tofa LEALAILEPULE RIMONI AIAFI: Lau Afioga i le Fofoga Fetalai, e faamalulu atu i lau Afioga, e le faafinauina le finagalo o le Afioga i le Minisita, ae tatau ona malamalama le Maota lau Afioga ona o lea matou te iloa ma le mautinoa, o lea e i lalo o le mandate a le MNRE le faiga o mea nei. Afai la o le finagalo o le Afioga i le Minisita e ave i o e nafa ma le Vaega lea, e tatau la ona faamalamalama lelei mai lau Afioga, ona o lea o le a feteenai ai Tulafono Tau Faaofi.

FOFOGA FETALAI: E manatu o lea ua malamalama le faamalamalamaga. Vaai i ai o lea ua ou malamalama i le faamalamalamaga a le Minisita. Aua ia le atugalau lau Afioga i le sui usufono mamalu, ou te iloa o lea ua manino ma malamalama, o le Matagaluega lava e tasi, o lalo o le Siosiomaga lea e i ai le SROS ma suesuega o lo o fai.

Faamaonia le Fuaiupu 3 e pei ona faasaoina.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o le Faalapotopotoga o Suesuega Faasaienisi a Samoa 2014.

FOFOGA FETALAI: O lo o i ai le Faasaoga i le Fuaiupu 1 ma le Igoa e pei ona faaalai i le Pepa Faaopoopo o Galuega.

Tulai mai lau Afioga i le Taitaifono o le Komiti.

Susuga IFOPO MATIA FILISI: Lau Afioga i le Fofoga Fetalai ou te faatu le Faasaoga i le Fuaiupu 1 e faapea:

“FAASAOGA:

Ia aveese le fuainumea 2014 ma suia i le fuainumera 2015 ma faitauina ai e faapea:

“Teuteuga o le Tulafono o le Faalapotopotoga o Suesuega Faasaienisi a Samoa 2015.””

Faamaonia le Fuaiupu 1 ma le Igoa e pei ona faasaoina.

Na faagasolo le Tulafono Tau Faaofi o Teuteuga o le Tulafono o le Faalapotopotoga o Suesuega Faasaaienisi a Samoa 2015 faatasi ma Faasaoga.

**TULAFONO TAU FAAOFI O TEUTEUGA O LE TULAFONO O
FEFAATAUAIGA TALAFEAGAI 2013 – iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o Oloa Gaosi Tulaga Muamua, Mataupu tau Pisinisi, Alamanuia ma Leipa.

Afioga Hon LEAUPEPE TOLEAFOA APULU FAAFISI (Taitaifono, Komiti o Oloa Gaosi Tulaga Muamua, Mataupu tau Pisinisi, Alamanuia ma Leipa): Lau Afioga i le Fofoga Fetalai ou te tulai atu e faatu le lafo, *Ina ia faamaonia e leni Fono Aoa le Lipoti a le Komiti o lo o fautuaina ai, ina ia faagasolo le Tulafono Tau Faaofi o Teuteuga o le Tulafono o Fefaatauaiga Talafeagai 2013 faatasi ma le Faasaoga.*

Faaluaina e le sui usufono mo Siumu.

FOFOGA FETALAI: Ou te faasilasila atu ua faamaonia nei e le Fono Aoa le Lipoti a le Komiti o Oloa Gaosi Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Teuteuga o le Tulafono o Fefaatauaiga Talafeagai 2013.

O le a sagai atu loa le Fono Aoa i le Iloiloga Auiliili o le Tulafono Tau Faaofi o Teuteuga o le Tulafono o Fefaatauaiga Talafeagai 2013.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

FUAIUPU 2: Malosiaga lautele ma tiute tauave o le Komiti Faatino.

Faamaonia.

FUAIUPU 3: Fonotaga a le Komiti Faatino.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Fefaatauaiga Talafeagai 2013.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa e pei ona faaalua i le Pepa Faapoo o Galuega.

Tulai mai le Afioga i le Taitaifono o le Komiti.

Afioga Hon LEAUEPE TOLEAFOA APULU FAAFISI: Lau Afioga i le Fofoga Fetalai ou te tulai atu e faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuainumera ma suia i le fuainumera 2015 ma faitauina ai le igoa o le Tulafono e faapea:

“Teuteuga o le Tulafono o Fefaatauaiga Talafeagai 2015.””

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Fefaatauaiga Talafeagai 2015 faatasi ma le Faasaoga.

TULAFONO TAU FAAOFI O TEUTEUGA O LE TULAFONO O SONE TAU FOLAUGA I LE SAMI 2014 – iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti a le Komiti o Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi. Talu ai ona o le le auai mai o le Afioga i le Taitaifono o le Komiti o Mataupu tau le Va i Fafu, Fefaatauaiga ma Tupe Maua, tulai mai lau Afioga i le Sui Taitaifono o le Komiti.

Afioga AFUALO WOOD UTI SALELE: Lau Afioga i le Fofoga Fetalai ou te faatu le lafo, *Ina ia faamaonia e leni Fono Aoa le Lipoti a le Komiti o lo o fautuaina ai, ina ia faagasolo le Tulafono Tau Faaofi o Teuteuga o le Tulafono o Sone Tau Folauga i le Sami 2014 faatasi ma Teuteuga ma Faasaoga.*

Faaluaina e le sui usufono mo Faasaleleaga Nu.2.

Na faamaonia le lafo.

FOFOGA FETALAI: Ou te faasilasila atu ua faamaonia nei e le Fono Aoa le Lipoti a le Komiti o Mataupu tau le Va i Fafu, Fefaatauaiga ma Tupe

Maua i le Tulafono Tau Faaofi o Teuteuga o le Tulafono o Sone Tau Folauga i le Sami 2014.

O le a sagai atu loa le Fono Aoao i le Iloiloga Auiliili o le Tulafono Tau Faaofi o Teuteuga o le Tulafono o Sone Tau Folauga i le Sami 2014.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

FUAIUPU 2: Tulafono Autu.

Faamaonia.

FUAIUPU 3: Faamatalaina o uiga o upu.

FOFOGA FETALAI: O lo o i ai le Teuteuga a le Komiti i le fuaiupu 3 e pei ona faaalua i le Pepa Faaopoopo o Galuega.

Tulai mai lau Afioga i le Sui Taitaifono o le Komiti.

Afioga AFUALO WOOD UTI SALELE: Lau Afioga i le Fofoga Fetalai ou te faatu le Teuteuga i le fuaiupu 3 e faapea:

“TEUTEUGA:

Fuaiupu 3:

(i) *Ia faaofi le parakalafa (b) fou e faapea:*

“(b) laina faailo o le maualalo o le suasami ma”

(ii) *Ia toe faanumera le parakalafa (b) tuai e avea ma parakalafa (c) fou.”*

Faamaonia le Teuteuga.

Faamaonia le Fuaiupu 3 e pei ona Teuteuina.

FUAIUPU 4: Faailoga o le maualalo o le suasami, ata fuafuaina aloaia ma le faalauiloina atu.

Faamaonia.

FUAIUPU 5: Faamutaina mo se vaitaimi le tumau o feoaiga ma le loto lelei.

Faamaonia.

FUAIUPU 6: O le sone tuaoi.

Faamaonia.

FUAIUPU 7: Eleele Lofia o le Atunuu.

Faamaonia.

FUAIUPU 8: Tulafono Faatonutonu.

FOFOGA FETALAI: O lo o i ai le Teuteuga a le Komiti, tulai mai lau Afioga i le Taitaifono o le Komiti.

Afioga AFUALO WOOD UTI SALELE: Lau Afioga i le Fofoga Fetalai ou te faatu le Teuteuga i le Fuaiupu 8 e faapea:

“TEUTEUGA:

Fuaiupu 8:

Ina ia soloia le upu “EEZ” ma suia i upu “sone faapitoa tau le tamaoaiga.”

Faamaonia le Teuteuga.

Faamaonia le Fuaiupu 8 e pei ona Teuteuina.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Sone Tau Folauga i le Sami 2014.

FOFOGA FETALAI: O lo o i ai le Faasaoga i le Fuaiupu 1 e pei ona faaalua i le Pepa Faaopoopo o Galuega. Tulai mai lau Afioga i le Taitaifono o le Komiti.

Afioga AFUALO WOOD UTI SALELE: Lau Afioga i le Fofoga Fetalai ou te faatu le Faasaoga i le Fuaiupu 1 e faapea:

“FAASAOGA:

Fuaiupu 1(1):

Ina ia aveese le fuainumera 2014 ma suia i le fuainumera 2015 ma faitauina ai le Igoa e faapea:

TEUTEUGA O LE TULAFONO O SONE TAU FOLAUGA I LE SAMI 2015.”

Faamaonia le Faasaoga.

Faamaonia le Fuaiupu 1 e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Sone Tau Folauga i le Sami 2015 faatasi ma Teuteuga ma Faasaoga.

TULAFONO TAU FAAOFI O TEUTEUGA O LE TULAFONO O FAAMALUMALUGA E FAAMAU AI MEATOTINO TAU LE TAGATA LAVA IA 2014 – iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o Oloa Gaosi Tulaga Muamua, Mataupu tau Pisinisi, Alamanuia ma Leipa.

Afioga Hon LEAUPEPE TOLEAFOA APULU FAAFISI: Lau Afioga i le Fofoga Fetalai ou te tulai atu e faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai e faapea, ina ia faagasolo le Tulafono Tau Faaofi o Teuteuga o le Tulafono o Faamalumaluga e Faamau ai Meatotino tau le Tagata lava ia 2014, faatasi ma le Faasaoga.*

Faaluaina e le sui usufono mo Siumu, se tasi o sui usufono mo le Au Palota Taitoatasi ma le sui usufono mo Sagaga le Falefa.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Oloa Gaosi Tulaga Muamua, Mataupu tau Pisinisi,

Alamanuia ma Leipa i le Tulafono Tau Faaofi o Teuteuga o le Tulafono o Faamalumaluga e Faamau ai Meatotino tau le Tagata Lava ia 2014.

O le a sagai atu le Fono Aoa o le iloiloga auiliili o le Tulafono Tau Faaofi o Teuteuga o le Tulafono o Faamalumaluga e Faamau ai Meatotino tau le Tagata lava ia 2014.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

FUAIUPU 2: Ua teuteuina le Fuaiupu 34.

Faamaonia.

FUAIUPU 1 MA LE IGOA.

FUAIUPU 1: Igoa puupuu ma le amataga.

IGOA: Teuteuga o le Tulafono o Faamalumaluga e Faamau ai Meatotino tau le Tagata Lava ia 2014.

FOFOGA FETALAI: O lo o i ai le Faasaoga a le Komiti i le Fuaiupu 1 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon LEAUPEPE TOLEAFOA APULU FAAFISI: Lau Afioga i le Fofoga Fetalai ou te faatu le Faasaoga i le Fuaiupu 1 e faapea:

“FAASAOGA:

“Ia aveese le fuainumera 2014 ma suia i le fuainumera 2015 ma faitauina ai le Igoa o le Tulafono Tau Faaofi e faapea:

Teuteuga o le Tulafono o Faamalumaluga e Faamau ai Meatotino tau le Tagata Lava Ia 2015.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Faamalumaluga e Faamau ai Meatotino tau le Tagata Lava Ia 2015 faatasi ma Faasaoga.

P.P.2014/2015 NU.58, LIPOTI A LE KOMITI O MATAUPU TAU FAAMASINOGA, LEOLEO MA FALEPUIPUI MA FAAMASINOGA O FANUA MA SUAFA I LE P.P.2013/2014 NU.78 & P.P.2013/2014 NU.79, LIPOTI FAALETAUSAGA A LE MATAGALUEGA O LEOLEO MA FALEPUIPUI MO TAUSAGA FAALETUPE 2007 – 2008 MA LE TAUSAGA FAALETUPE 2008 – 2009 - Iloiloga

FOFOGA FETALAI: Tulai mai le Afioga i le Taitaifono o le Komiti o Mataupu tau Faamasinoga, Leoleo ma Falepuipui.

Tofa TUISA TASI PATEA (Taitaifono Komiti o Mataupu tau Faamasinoga, Leoleo ma Falepuipui & Faamasinoga o Fanua ma Suafa): Lau Afioga i le Fofoga Fetalai, ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

Faaluaina e le sui usufono mo Palauli, le sui usufono mo Aiga i le Tai ma le sui usufono mo le Vaa o Fonoti.

FOFOGA FETALAI: Tulai mai lau Afioga i le Taitaifono.

Tofa TUISA TASI PATEA: Lau Afioga i le Fofoga Fetalai, i le maea ai o iloiloga a le Komiti na faaiugafonoina ai e fautuaina le Fono Aoa ina ia faamaonia le P.P.2013/2014 Nu.78, Lipoti Faaletausaga a le Matagaluega o Leoleo ma Falepuipui mo Tausaga Faaletupe 2007-2008 ma le P.P.2013/2014 Nu.79, Lipoti Faaletausaga a le Matagaluega o Leoleo ma Falepuipui mo Tausaga Faaletupe 2008-2009.

“FAUTUAGA:

I le faia i luga o ana Sailiiliga ma lana Asiasiga, e fautuaina ai e le Komiti le Malo:-

1. **Ina ia tagai le Malo i le fuainumera o aufaigaluega o lo o galulue i le falepuipui. E talitonu le Komiti o lo o faatuputupulaia pea le aofaiga o tagata tuuina atu i le toese ae ua le gafatia e alii ma tamaitai leoleo ona tauave le tóatele o pagota o lo o latou leoina i le taimi nei.**
2. **Ina ia silasila totoa i tulaga tau suavai i le toese ona o lo o matauina le faatamaia o le suavai o lo o faaaogaina aemaise mo le tapenaga o taumafa.**
3. **Ina ia saunia se potu faapitoa i le toese (First Aid Station) e faaaogaina mo pagota e moomia Fesoasoani Muamua. Molimauina e le Komiti le faaletonu o le siosiomaga o lo o atagia ai le pepesi gofie o faamai ma afaina ai le soifua maloloina o pagota aemaise o le aufaigaluega.**
E talitonu foi le Komiti, o lo o ua i ai nei le Pulega fou o le Falepuipui ma ua amatalia fuafuaga o le tuueseeseina o Matagaluega nei, e talosagaina ai ina ia faautagia fautuaga 1, 2 ma le 3 ina ia faataua tusa ai ma iloiloga a le Komiti.

4. Ina ia silasila le Malo i ni avanoa mo le Vaega o Auupega Malolosi mo ni aoaoga faapitoa i atunuu i fafo aua le faalauteleina o le tomai o i latou o lo o gafa ma lea vaega o le auaunaga. Ia silasila foi i ni vaegatupe e faatinoina ai ni polokalame faalauiloa ina ia malamalama le atunuu i le taua o le logoina o le Ofisa o Leoleo pe a silafia ni auupega malolosi, matautia ma ogaoga e aumaia i totonu i auala faa-solitulafono.
5. E fautuaina foi le Malo ina ia silasila totoa i le faatinoina o galuega faatino a i latou o lo o mataituina (Border Control) le aumaia faa-solitulafono o meatau matautia ma ogaoga i totonu o le atunuu.
6. Ina ia silasila totoa le Malo i mafuaaga o Tupe Faatatau a le Matagaluega ua toe faafoi ae o lo o tele ma anoanoai ana galuega o lo o manaomia le faatinoina. E pei ona maitauina e le Komiti, e \$2,590,704.00 se tinoitupe na toe faafoi i le tausaga faaletupe 2007-2008 ma le \$737,138.00 i le tausaga faaletupe 2008-2009.
7. Maitauina foi e le Komiti le telegese o le faaooina mai o Lipoti Faaletausaga a le Matagaluega. O lea ua faatoa talanoaina Lipoti Faaletausaga nei 2007-2008 ma le 2008-2009, a o lenei ua faagasolo galuega o le 2014. E fautuaina ai e le Komiti ina ia silasila totoa i lenei faaletonu ina ia aua ne i toe tulai mai ae ia faataua le tuuina vave mai o Lipoti Faaletausaga a le Matagaluega i tausaga faaletupe taitasi.

IUGAFONO:

I le maea ai o Iloiloga a le Komiti, na faaiugafonoina ai e fautuaina le Fono Aoao, **Ina ia faamaonia le P.P.2013/2014 Nu.78, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2007-2008.**

P.P.2013/2014 Nu.79, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2008-2009.

Ma le faaaloalo tele faafetai i lau Afioga i le Fofoga Fetalai.

FOFOGA FETALAI: Malo faafetai saunoa i lau Afioga i le Taitaifono.

Tofa AVEAU TUALA LEPALE NIKO PALAMO: Lau Afioga i le Fofoga Fetalai.....

FOFOGA FETALAI: Tulai mai le sui usufono mamalu.

Tofa AVEAU TUALA LEPALE NIKO PALAMO: Faafetai lava i le Afioga i le Taitaifono o le Komiti. E lua lava vaega ia o le Lipoti ou te fia fesiligia.

O le vaega muamua, po o le a se fuafuaga ua oo i ai i le tulaga lea o le lava o meataumafa i totonu o le toese aua o lea sa fai le asiasiga?

O le vaega lona lua, e i ai le fautuaga lea na tuuina mai e leoleo i totonu o le lipoti lea i le faaaogaina o le fale lea e fai ai ni polokalame mo fanau ia e molia atu i totonu lea e faapea e pei o le fale lea e ave i fanau ua sauaina. Po o le a se mea ua oo i ai le vaega lea o le talosaga ma le faaaloalo lava.

FOFOGA FETALAI: Se i tuu atu le avanoa i le Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o lou tulai atu e fia faamalo i le Komiti ona o le lelei tele o le latou lipoti. E taua tele le lipoti lenei mo tulaga i le faaleleia atili o le Matagaluega o Leoleo ma Falepuipui. Ona pau lava sina mea lea ina ia sao le faaupuga, e leai ni tupe e toe faafoi, na o tupe faasao po o tupe faatatau ua le faaaogaina ona e leai ni tupe e tuuina atu i se Matagaluega, a o la e faatatau i lalo o le Matagaluega o Leoleo ma Falepuipui. O lona uiga ua le faaaogaina, ona faasao ai lava lea ma le faaaogaina.

FOFOGA FETALAI: Tulai mai le sui usufono mamalu.

Tofa TUISA TASI PATEA: Ua faafetai atu. O lona ua faamanino atu lona vaega, ae ona pau lava le agaga o le Komiti ona o le tele o ana galuega o lo o fia faaleleia.

O le tali atu i le fesili lea a le sui usufono mo Faleata Sasae, e le o lavea atu i le lipoti se tala e uiga i le fale lea e taua. Ou te faamalulu atu ai, atonu e mafai ona tali atu i ai le Afioga i le Minisita, a o meataumafa i le toese ua i ai le talitonuga ua tele le suiga ona o la foi ua i ai le Pulega fou e pei ona i ai le tuueseesega. Ua tagai malamalama foi i ai i fuafuaga uma ma le faatinoina o ia fuafuaga.

I le ava tele ma le faaaloalo, faafetai.

FOFOGA FETALAI: Malo faafetai.

Na faamaonia le Lipoti.

FOFOGA FETALAI: E tusa ai ma Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

P.P.2014/2015 NU.102, LIPOTI A LE KOMITI O TUPE MAUA MA TUPE TOTOGI I LE P.P.2014/2015 NU.5, LIPOTI FAALETAUSAGA A LE PULEGA O TUPE FAAVA O MALO A SAMOA MO LE TAUSAGA 2012 - Iloiloga

FOFOGA FETALAI: Tulai mai le Afioga i le Taitaifono o le Komiti o Tupe Maua ma Tupe Totogi.

Susuga Hon PAPALIITELE NIKO LEE HANG: Lau Afioga i le Fofoga Fetalai, ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana SAILILIGA, FAUTUAGA MA IUGAFONO.*

Faaluaina e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow, le sui usufono mo Aleipata Itupa i Lalo ma le sui usufono mo Falelatai ma Samatau.

FOFOGA FETALAI: Tulai mai lau Afioga i le Taitaifono mo le faalauiloaina o Fautuaga ma Iugafono a le Komiti.

Susuga Hon PAPALIITELE NIKO LEE HANG: O Fautuaga nei a le Komiti.

“FAUTUAGA:-

I le maea ai o Saililiga a le Komiti, e fautuaina ai le Malo e Faapea:-

- 1. Ia ave le faamuamua a le Komiti Faatonu ma le Pulega mo se nofoaga Tutotonu mo le Pulega o Tupe Faava o Malo a Samoa, aua le faatinoina ai o ana auaunaga ma galuega faatino. E faatauaina tele e le Komiti le auaunaga a le Pulega o Tupe Faava o Malo a Samoa ona o le maoa’e foi o lona sao e le gata i atinae eseese i totonu o le tatou atunuu, ae faapea foi i lana fesoaosani mo le Tala Faatatau o Tupe a le Malo i tausaga taitasi;**
- 2. Ia unaia ma faalauiloa atili le manulauti a le Pulega o Tupe Faava o Malo a Samoa, aua le faatosinaina mai o kamupani mai fafo mo le teuina o tupe i totonu o le tatou atunuu aemaise lava i atunuu o Asia ma isi vaega o le lalolagi.**

IUGAFONO:-

I le maea ai o Iloiloga a le Komiti, sa faaiugafonoina ai e fautuaina le Fono Aoao,

Ia faamaonia le P.P.2012/2013 Nu.41, Lipoti Faaletausaga a le Pulega o Tupe Faava o Malo a Samoa mo le Tausaga Faaletupe 2010/2011.

Ma le faaaloalo lava, faafetai.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

P.P.2014/2015 NU.103, LIPOTI A LE KOMITI O TUPE MAUA MA TUPE TOTOGI I LE P.P.2014/2015 NU.8, LIPOTI FAALETAUSAGA A LE FAALAPOTOPOTOGA O INISIUA TAU SOIFUA A SAMOA MO LE TAUSAGA 2013 - Iloiloga

FOFOGA FETALAI: Tulai mai le Afioga i le Taitaifono o le Komiti o Tupe Maua ma Tupe Totogi.

Susuga Hon PAPALIITELE NIKO LEE HANG: Lau Afioga i le Fofoga Fetalai, ou te tulai atu e faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

Faaluaina e le sui usufono mo Palauli Sisifo, le sui usufono mo Aleipata Itupa i Lalo, se tasi o sui usufono mo le Au Palota Taitoatasi ma le sui usufono mo le Vaa o Fonoti.

FOFOGA FETALAI: Tulai mai lau Afioga i le Taitaifono.

Susuga Hon PAPALIITELE NIKO LEE HANG: O Fautuaga nei a le Komiti.

“FAUTUAGA.

I le maea ai o Iloiloga a le Komiti na faaiugafonoina ai e fautuaina le Malo :-

- 1. Ia soalaupuleina e le Pulega ma le Komiti Faafoe nisi auala mo le faalauteleina atu o lana auunaga i le faatinoina o isi inisiua e ese mai i inisiua tau soifua e pei o Inisiua Tau Soifua Maloloina (medical insurance).**
- 2. Ia tofia ma faafaigaluegaina se Suetusi Faa-lotoifale (Internal Auditor) a le Faalapotopotoga o Inisiua Tau Soifua a Samoa, e faatinoina matafaioi o lo o faatinoina e le Soa-Komiti a le Komiti Faatonu a le Faalapotopotoga;**
- 3. Ia mataituina pea e le Pulega o le Faalapotopotoga faatasi ai ma le lagolago a le Suetusi Faa-lotoifale pe a tofiaina fuafuaga ma taiala o galuega faatino a le Faalapotopotoga ma lipoti atu i le Komiti Faatonu mai lea taimi i lea taimi. E talitonu le Komiti e lē o se faiga faavae talafeagai le mataituina e se Soa Komiti o le Komiti Faatonu o Fuafuaga ma Taiala (Manual of Instructions) ma isi fuafuaga mo le faatinoga o galuega faatino a le Faalapotopotoga, o le matafaioi patino lea a le Pulega o le Faalapotopotoga o Inisiua Tau Soifua.**
- 4. Ia toe iloilo faiga faavae a le Faalapotopotoga ina ia tuuitia ai pasene o tului (interest rates) o lo o faaee i tului o nonogatupe laiti a le aufai saofaga (loans on policies). E manatu le Komiti o lo o tulaga lelei tulaga tau tupe a le Faalapotopotoga i le taimi nei, ma e tatau ai ona silasila le Pulega ma le Komiti Faatino mo le toe iloilo o tului o pasene mo noagatupe.**

IUGAFONO:

I le maea ai o Sailiiliga a le Komiti na faaiugafonoina ai e fautuaina le Fono Aoao:-

Ina ia faamaonia le P.P.2013/2014 Nu.8, Lipoti Faaletausaga a le Faalapotopotoga Inisiua Tau Soifua a Samoa mo le Tausaga Faaletupe Faaiuina aso 30 Iuni 2013.

Ma le faaaloalo lava.

FOFOGA FETALAI: O lea ua tatou taunuu mai...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai...

FOFOGA FETALAI: Tulai mai lau Afioga i le Palemia.

LAFO MO LE FAAAUAUINA O ITULA FONO

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Ona ua manaia tele Lipoti a Komiti e ese le oa i manatu, o lea ou te tulai atu ai ua toe tasi lava ma le afa nai Lipoti ia. Pe mafai ona faauma pea aua ou te masalo pe uma lava i sina lua minute e tea ai le itula, a o le a faatu atu le lafo, *Ina ia faauma nai Lipoti ia tatou malolo ai foi lea.*

E le i faaluaina le lafo.

Na faamaonia le lafo ma tulai ai ua toe faaopoopo itula o Fonotaga seia maea Lipoti o lo o talanoaina nei.

Na toe faaauau felafolafoaiga i le P.P.2014/2015 Nu.103, Lipoti a le Komiti o Tupe Maua ma Tupe Totogi i le P.P.2014/2015 Nu.8, Lipoti Faaletausaga a le Faalapotopotoga Inisiua tau Soifua a Samoa mo le Tausaga 2013.

FOFOGA FETALAI: Ia, e tutupu lava matagi i liu o vaa. A outou lotu lava foi e tuli motu o le a tuli motu, a o le a lafo atu pea.

O lea ua oo mai i le felafolafoaiga a o lea e matau atu e leai se isi e fia saunoa.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

E manatu o lea ua maea le itu na ala ai ona faatu le lafo ma e talitonu o lea ua iu ai i inei le Lipoti lea na taua se i vagana ai le tulaga leaga o lea ua ta tonu lo tatou taimi malolo ma o le a tatou papa-aveloa.

P.P.2014/2015 NU.109, LIPOTI A LE KOMITI O LE SOIFUA MALOLOINA, GALUEGA TAU LE VA FEALOA, MATAUPU TAU LOTOIFALE MA ATINAE O AFIOAGA MA AGAFESOOTAI I LE P.P. 2012/2013 NU.36, FAAALIGA MANINO FAAUPUFALAI A LE FONOTAGA A TAITAI O ATUNUU O LE FONO AOA O A MALO AUFATASI I LE PUIPUIGA MA LE TAOFIOFIA O FAAMAI LE PIPISI – Iloiloga

FOFOGA FETALAI: Tulai mai lau Afioga i le Taitaifono o le Komiti o le Soifua Maloloina.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, ou te faatu le lafo, *Ina ia faautagia e lenei Fono Aoa o le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

Faaluaina e le sui usufono mo Palauli Sisifo, se tasi o sui usufono mo le Au Palota Taitoatasi, Susuga Hon Papaliitele Niko Lee Hang ma le sui usufono mo Sagaga le Usoga.

Afioga Hon GATOLOAIFAANA AMATAGA ALESANA GIDLOW: O Fautuaga nei a le Komiti.

“FAUTUAGA:

Ua maea ona auiliiliina e le Komiti lenei lipoti ma ua fautuaina ai:

1. Ia lagolagoina e le Malo auala eseese e fautuaina mai e le Matagaluega o le Soifua Maloloina e faalauiloa ma puipuia ai le atunuu mai faamai le pipisi.
2. Ia amatamea Taitai o le Malo e ala atu i sui Faipule i auala e faalauiloa ma puipuia ai le atunuu mai nei gasegase.
3. Ia faamalosia ma aloaia faa-Komiti a le Palemene le Komiti mo le Unaia o le Soifua Maloloina (SPAGHL) ina ia atili aliali ai le faamua o lo o ave e le Malo i galuega eseese e atiae ma faaleleia ai le soifua maloloina o tagatanuu o Samoa.
4. E fautuaina le Palemene ia taliaina lenei maliega aemaise auala eseese e faatino ai le faalauiloa ma le puipuia o faamai le pipisi.
5. E fautuaina le Matagaluega o le Soifua Maloloina ina ia faagasolo galuega alagataua aua le puipuia o Samoa mai nei faamai le pipisi (NCDs) e tusa ai ma aiaiga o leni maliega.

IUGAFONO:

I le maea ai o ana Sailiiliga, na faaiugafonoina ai e fautuaina le Fono Aoao, Ina ia faamaonia:

- P.P. 2012/2013 Nu. 36, Lipoti o le Faaaliga Manino Faaupufai o le Fonotaga a Taitai o Atunuu o le Fono Aoao a Malo Afaatasi i le Puipuiga ma le Taofiofia o Faamai le Pipisi.

FOFOGA FETALAI: Malo, faafetai i lau Afioga i le Taitaifono. Ia ua avanoa le Maota mo felafolafoaiga.

Tofa LEALAILEPULE RIMONI AIAFI: Faafetai i lau Afioga mo le avanoa, faafetai foi i le Taitaifono o le Komiti mo lenei Lipoti. E taua tele le vaega lea ua oo i ai le Lipoti aemaise lava i faamai le pipisi.

Muamua lau Afioga, o le a se fuafuaga a lau Matagaluega lau Afioga i le Minisita i le tatou fale foi lea sa gasolo mai ai ia latou ia ua maua i le faamai lea le pipisi i i Matagalalua, e taua tele lea auaunaga a le Malo, e matua taua i nai tagata o le tatou atunuu ua maua i le faamai aemaise o nai tina ma tama matutua sa autovaa mai ai. Ou te talitonu o le fale lea, na umi ona toe faaopopo ai le soifua o tagata ma ola umi ai pea ma ola fiafia ona o lenei auaunaga le faigofie, le omai o i ai le fomai, o lea ua toe faamama avega le Malo toe i ai ma le avanoa e tala ai a latou vai, a o lea ua faafuaseia lava ona tapunia, o lea la ua gasolo atu ai nei nai tagata ia latou foi le mamalu o le atunuu i le falemai, ua le maua se avanoa ma le maua ai le faigofie lea sa i ai muamua i le taimi lea.

E talitonu lau Afioga i le Minisita aemaise foi lau Afioga i le Palemia ma le Faigamalo, e tataua ona toe tagai lelei e toe faia se fuafuaga vave i le tatou fale lea ae toe faatulai mai. O a foi ni feeseeseaiga o i ai i va.....

FOFOGA FETALAI: Malie le sui usufono, se i avatu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea ua manino le mataupu, o le tele ia o le gaosa ma le faaletonu o le faagaoioiga o le fale lea, ma ua faafia foi ona alu atu savali ia te au i le tulaga lava lea, o lea la na faia ai le iuga, e sili atu ona faaoga pea ia uta i le falemai, o la ua lelei mea e agai atu i ai ma togafiti ai ia latou ia. A o le tele ia, o le isi lea Faalapotopotoga e aupito sili ona fetuiiai, o le Faalapotopotoga lea sa faafoea le mataupu lea.

Lau Afioga i le Fofoga Fetalai, o le tulaga lena, e i ai foi ia mau faaletonu sa i ai, na o le o atu o atu o atu ia te au ia ou valaau i uta i le falemai, a o le tele o le gaosa ma le fetuiiai, o le mea lea, e sili lava ona o sao i uta i le falemai, e leai ni faaletonu e tulai mai.

FOFOGA FETALAI: Tulai mai le sui usufono mamalu.

Tofa LEALAILEPULE RIMONI AIAFI: Lau Afioga i le Fofoga Fetalai, e pei ona tau maua i le faaiuga o lau lauga, o le mea lea ua tupu e sao le

Afioga i le Palemia, o lea la ua afaina ai nai tagata gasegase ia i latou ia e faatinoga ia mea, aua o lea o le a pei o le a aveese ai la le taua na faatuina ai, ona o le faaletonu tele o tagata sa faatinoina lea auunaga. Ae a pe a se i tagai pea i ai lau Afioga ma le Matagaluega, i se auala e faaauau ai pea i lalo o le tatou Malo e fesoasoani aua o se tulaga faigata ua i ai le faamai, ae aveese mai tagata ia po o ai lava ia tagata piopio e faia nei mea, ona o ese lea o latou, ae o le a aveese ai le taua o le auunaga lea na ala ai ona faatu le toatele o nai tagata ia na.....

FOFOGA FETALAI: Ia o le a tulai atu le Afioga i le Minisita e tali atu. Tulai mai lau Afioga i le Minisita mo le Soifua Maloloina.

Afioga Hon Tuitama Talalelei Tuitama (Minisita mo le Soifua Maloloina): Lau Afioga i le Fofoga Fetalai, ona ne i faaumiumi pea lea mataupu a o lea ua uma ona saunoa le Taitai o le Malo, o le tulaga tonu lea o lea e i ai. O le faalavelave lea na tupu, e manatua foi o le Clinic lea po o le Diabetes Clinic, o lea sa faafoe e le Diabetes Association i latou ia e aafia i le gasegase. Sa agai uma la i ai ia fesoasoani foi ia mai fafo tau tupe ma mea uma faapena, sa i ai foi taavale, sa faafoe ai e latou. Ua alu ai alu ai la, o le mea ua tulai mai, ia ua tele le faaletonu ua fevavaa'i ua tauaimisa, alu alu alu lea taitaifono ma ave lana taavale, ia ua femisaai foi i le taavale, ia ua leai ai la ni seleni e faagasolo ai le mea lea, na iu lea ina toe aapa mai le Matagaluega e laveai le tulaga lea, ona o le tulaga tonu lava lea o le silasila foi lena a le Matagaluega, e taua tele ia le galuega lea e faatino i lalo i i mo i latou ia, ua toatele le atunuu ua gasolo i ai, ona o le faigofie ona....e le tau o atu i uta tu i le queue foi lea e o faatasi ma isi mai, ae ua i ai lava fomai faapitoa lava latou ia, e nafa lava ma mea tau mai suka. Ua le gata foi la i le mai suka, ae ua o atu foi i ai ma le au toto maualuga ma mai fatu.

O le totogi o fomai ia sa tauaveina le mea lea o Specialists uma e leai se fomai foi lea faapea faatoa iu mai po o se Registrar sa faigaluega ai i i, o Specialists uma lea sa faigaluega i i. Ua amo nei la e le Matagaluega le tulaga lea tusa e toatolu Specialists e faigaluega ai, ua fai sina taugata. O lea la sa faatali se i uma le term lea sa uma atu nei, ia ona toe silasila lea o le Matagaluega i se auala e mafai ai ona faaauau ia le tulaga lea. O le taimi nei la, o lea o lo o talia ia le talosaga a se isi Faalapotopotoga o lea ua talosaga mai i le Matagaluega ma le Malo, e latou te fia tauaveina le auunaga lea. Ma o le taimi nei la o lo o faagasolo la ia feutagaiga i le faatinoga o le faamoemoe lea ona o le taua la o le vaega lea e saunoa i ai le sui usufono. E le o laaloa la le silasila a le Matagaluega lau Afioga i le taua o le vaega lea faapea foi le Malo, lea o lo o faagasolo nei feutagaiga ona o le tele o le vaegatupe e faafoe ai ia le tulaga lea. Atonu o se taimi, ia ona faafofoga foi lea i ai o le tatou Maota faapea foi lo tatou atunuu i le tulaga o le taunuuga o ia taumafaiga o lo o faagasolo i le taimi nei.

Lau Afioga i le Fofoga Fetalai, a o i ai pea i le mataupu lea, ia e fia fai foi lava sina faamatalaga e tusa ai ma le agaga, faafetai tele i lau Afioga ma le mamalu o le Palemene i le taunuu mai ma le taliaina, faafetai i le Taitaifono ma le Komiti o lea sa nafa ma ua ou faalogologo atu ia latou fautuaga matagofie e uiga i le mataupu lea, leaga o lea o le a tuu ia le mataupu, ae o lea o le a agai ese i le tulaga e le o i ai i totonu o le Lipoti lea. Lau Afioga, o le agaga tonu o le lipoti lea o le United Nation Political Declaration lea sa ou

taua, i le faamalamalamaga foi o le mataupu lea ina ua oo mai, lea sa tatou talanoaina i le Tala Faatatau Faaopoopo Lona Lua o le Tupe, sa laga ai foi le mataupu lea. Ma o le mea tonu lava lea ua agai mai ai le Komiti lea ina ia talia ma aloaia e le tatou faigamalo ma le Palemene le tulaga lea o le declaration, leaga o Faaluuluga o Malo taitasi sa latou avea le mataupu lea i New York i le 2011, lea la e i ai le declaration lea. E faatasi ai la ma lau Afioga, o le agaga foi lea o lea ua toe aumai foi e le Komiti le faatauaina lea o le SPAGHL ona o le faamoemoega o lenei taumafaiga atoa i tulaga o faamai e le pipisi, e faalagolago i le political will. O le mea tonu lava lea e matua momoli lau faafetai i le Komiti ona o a latou fautuaga matagofie, ma e faapea foi ona talosaga atu i le tatou Palemene i lau Afioga o lo o Taitaifono i le SPAGHL, ina ia faamalosi le tatou tino lea, e matua taua tele mo faamoemoega ia, o le taunuuga o faamoemoega o le Faalapotopotoga a Malo Afaatasi o le lalolagi, ina ia tuutiitia i latou e maumau soifua ona o le tulaga o faamai le pipisi, po o faamai ogaoga, e mafua mai ona o le fesuiaiga o le soifua o lo o tatou i ai nei. Ma le faaloalo tele lau Afioga i le Fofoga Fetalai.

FOFOGA FETALAI: Malo faafetai. Tulai mai le sui usufono mamalu.

Tofa LEALAIPEPULU RIMONI AIAFI: Faafetai lava i lau Afioga. E leai, e fia faamauina foi le faafetai i lau Afioga e tusa o le declaration lea a le UN. E le taumamaina le fononua e auai atu i ai ma e lauga ma avatu le feau a le tatou Malo, e taua tele, ou te lagolagoina. O le mea lea e talanoa atu ai, ona o le fale lea, le fale tonu lea e patino tonu lava i le mataupu lea ou te talanoa i ai i le taimi lenei o faamai e le pipisi po o le NCDs. O lea la ua e saunoa mai e taua o le a toe tagai i ai lau Afioga, ia ua foi se manatu. E taua le fale lea o le a toe faatino, ae faafetai i lau Afioga o lenei o le a e toe tagai lelei i ai e faaauau lenei auunaga taua, aua o le mea lea e foliga mai, e inu e isi le uisiki ae onana ai isi. E fai e tagata ia e vaaia le fale uiga le talafeagai faapea a o lea ua suffer ai nai tagata gasegase o lo o fia maua le ola soifua maloloina mai le Matagaluega. O lea la ua tulai mai ai, ua snap, le mea foi lea na e saunoa mai ai, ua snap le fale lea.

Afioga Hon Tuitama Talalelei Tuitama: Na o se mea e fia faasao lau Afioga.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ia, na o le pau lava le mea taua, e le o taofia le feosoasoani o la e fai, e le o slack foi le service. O mea o upu taufaasese, o la e lava o lo o fai pea le auunaga.

Lau Afioga o le mea lenei na ou toe tulai atu ai.

Afioga Hon Tuitama Talalelei Tuitama: E uiga tutusa lava le finagalo o le Palemia ma le faasaoga lea sa ou tulai atu e.... ona o lea e saunoa mai le sui usufono, e inu e isi le fagupia ae onana ai isi. Ma le faaloalo lava, na inu lava e le fagupia latou ma toe onana ai lava latou, aua o latou ia e faia galuega ia o tagata mai suka, ma o tagata e aafia i totonu o le Faalapotopotoga. E le o faia e se isi o la lava e fai e latou ma onana ai lava latou. Ma le faaloalo lava.

FOFOGA FETALAI: Tulai maia le sui usufono e faaiu mai le saunoaga. E manatu ua....

Tofa LEALAILEPULE RIMONI AIAFI: Faafetai i lau Afioga i le Minisita, faafetai o lena o le a faaauau. E le o le slack lea na ou fai atu ai o le snap. Manatua foi le snap a le Afioga i le Minisita lea na fai mai o le smoking ma na mea.

Lau Afioga i le Fofoga Fetalai ou te lauga lava ma faamanatu i lau Afioga le tatou SPAGHL, ae faafetai o lea ua toe faamanatu mai e le Komiti ae o lea o le a tatou faaauau lena galuega taua. Faafetai.

FOFOGA FETALAI: Malo. O le tatou SPAGHL o lo o talia pea le Afioga i le Ofisa Sili o Pulega o le Matagaluega o le Soifua Maloloina. O lena tou te silafia le mea lea tatou te faatalitali i ai ona o le tatou polokalame, ae o le SPAGHL ia ua ready any time. O le a le mea e finagalo i ai le Matagaluega o le a tatou agai i ai, ia tatou agai i ai. Ae masalo o la e maua e le Ofisa Sili o Pulega o le Matagaluega o lea tatou te faatali ona o le polokalame sa tatou tuuina atu.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P.2014/2015 Nu.131, LIPOTI A LE KOMITI O MATAUPU TAU
AOGA, SAIENISI, FESOOTAIGA MA FAAMATALAGA
TEKONOLOSI I LE P.P.2014/2015 NU.7, LIPOTI FAALETAUSAGA A
LE PULEGA O FALE MA MALAE TAALO A SAMOA MO LE
TAUSAGA 2011/2012 - Iloiloga**

FOFOGA FETALAI: Tulai mai lau Afioga i le Taitaifono o le Komiti o Mataupu Tau Aoga, Saienisi, Fesootaiga ma Faamatalaga Tekonolosi.

O le lē auai o le Taitaifono, tulai mai lau Afioga i le Sui Taitaifono.

Susuga IFOPO MATIA FILISI (Sui Taitaifono o le Komiti o Mataupu tau Aoga, Saienisi, Fesootaiga ma Faamatalaga Tekonolosi): Lau Afioga i le Fofoga Fetalai ou te faatu le lafo, *Ina ia faautagia e lena Fono Aoao le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Palauli.

Susuga IPOPO MATIA FILISI: Faafetai i lau Afioga i le Fofoga Fetalai.

“FAUTUAGA:

I le maea ai o ana Iloiloga, e fautuaina ai e le Komiti le Malo ma le Pulega ina ia:-

1. **Ia ave pea le faamuamua a le Pulega o Fale ma Malae Taalo a Samoa (SSFA) i le faaleleia atili o fale ma malae taalo uma i Tuanaimato faapea le Apia Paka (Park), e aofia ai ma le vaaia lelei o lona siosiomaga matagofie e pei o togalaau felanulanuai ina ia sili atu nai lo le tulaga o lo o i ai nei.**
2. **Ia toe silasila le Pulega i se alafua talafeagai o totogi faavaitaimi (Hire) o Fale ma Malae Taalo a le Malo ina ia faamalosia ai le totogiina mai o tupe a Asosi Taalo ma Vaega o lo o faaaogaina lenei auunaga. E manatu le Komiti, o le mulimulitai o lea alafua o le a fesoasoani lea i tupe maua a le Pulega mo nisi atinae ma galuega manaomia.**
3. **E fautuaina le Pulega ina ia usitaia faiga faavae ma taimi faatapulaaina mo le saunia o Lipoti Faaletausaga ma tuuina mai i le Palemene e tusa ai ma aiaiga faale-Tulafono**

IUGAFONO:

I le maea ai o iloiloga a le Komiti, na faaiugafonoina ai e fautuaina le Fono Aoaoina ina ia faamaonia:

- **P.P. 2014/2015 Nu. 7, Lipoti Faaletausaga a le Pulega o Fale ma Malae Taalo A Samoa mo le Tausaga Faaletupe 2011/2012.”**

Afioga Muagututagata Famausili Auimatagi Peter Ah Him: Lau Afioga i le Fofoga Fetalai.

FOFOGA FETALAI: Se i tulai mai lau Afioga i le sui usufono mo Sagaga le Usoga.

Afioga MUAGUTUTAGATA FAAMAUSILI AUIMATAGI PETER AH HIM: Faafetai i lau Afioga i le Fofoga Fetalai mo le avanoa. O le fautuaga lona lua lea lau Afioga i le Lipoti. Ou te fia fesili atu i le sui Taitaifono faamolemole, o le a tonu lava se fautuaga a le latou Komiti, se alafua talafeagai sa fai e le Pulega, ina ia faatino ai le galuega lea o le totogi faavaitaimi o hire o fale ma malae taaalo, ina ia faamalosia ai asosi taaloga? Ia e totogi ai foi tupe. Ou te fia malamalama po o le a tonu lava le latou fautuaga, alafua talafeagai, lau Afioga i le Fofoga Fetalai. O le fesili lena.

FOFOGA FETALAI: O lea ua ave le fautuaga a le Komiti i le Matagaluega e fai ni alafua talafeagai. Ou te manatu o le uiga moni lena o le fautuaga a le Komiti, e pule i latou po o le a sa latou fuafuaga i alafua talafeagai, e fuafua i ai mea e ave i ai le totogiina o lisi.

Tulai mai le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. Faafetai atu foi i le Komiti sa iloilo lena Lipoti. Na pau le fautuaga lau Afioga i le Fofoga

Fetalai e fia fesiligia ai pe na iloiloina e le Komiti Corporate Plan a le Pulega lenei ona e... atonu o se tasi o vaega e talitonu e ao ona silasila foi i ai lenei Komiti Faafoe, o le taimi nei pei lava foi ona masani ai le tele o professional sport teams i fafo, e i ai play season, o le tele o nei kalapu ta te vaai atu e o koleni, e o e fai play season i Fiti ma o i isi atunuu, ae ta te le o vaai atu lava o o ae omai, ae lelei mamao atu tatou facilities, e ono mafai ona omai ai le tele... e le gata o au lakapi, au netball o au soka, o au baseball ma isi taaloga. E manaia le tau o Samoa aemaise a tatou sport facilities. Pe mafai ona silasila i ai le tatou Pulega lenei i se package e galulue faatasi ai e le gata o Faletalimalo ae o le Pulega mo Tagata Tafafao Maimoa Mai e faatosina mai ai, aua e tasi lenei aoga tele, aua a omai nei kalapu e koleni e fai a latou play season i Samoa, e tasi foi lenei avanoa e o atu tatou alo ma fanau e matamata ma maua ai foi avanoa. Faafetai.

Afioga Muagututagata Faamausili Auimatagi Peter Ah Him: Lau Afioga i le Fofoga Fetalai faamolemole lava....

FOFOGA FETALAI: Tulai mai lau Afioga i le sui usufono mamalu.

Afioga Muagututagata Faamausili Auimatagi Peter Ah Him: Faamolemole lava lau Afioga i le Fofoga Fetalai, ona o au lea ou te aafia i mea ia o asosi taaalo, o lea sa ou faapea e tau mai ai i i le fesoasoani a le Komiti sa fai i le Pulega, i se latou fautuaga, alafua talafeagai. Ma le faaloalo lava, a o lea....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o mea lava ia o Corporate Plans ma mea ia o fuafuaga o tupe e tatau ona totogi o alafua, se o sikiu pisupo na a le Faalapotopotoga. O le mea sili lea ua pai i ai le tatou Komiti, ia taatia mai la i le Faalapotopotoga o lea e faalogologo atu le Minisita. O outou silasila mai i le Minisita, o taimi uma lava na outou saunoa ai e pei o le a le a le alu o lana peni. O lona uiga e afio atu nei le Minisita valaau uma, vaai le Corporate Plan, vaai alafua lea e manao i ai le tama lea, tuu i ai se alafua tele ia Muagututagata ma lana vaega, leaga o maua ma Muagututagata ma te koleni i le mea foi lea o le mea taufeaa, o le pii taufeaa. O le mea la lea e leai se mea e popole ai, o la ua manaia tele le fautuaga ma le tuualalo a le Komiti, taatia mai lea o le vaega tele i le Minisita ma le Matagaluega, o lea ua maua atu e le Minisita le agaga lea ua aumai.

FOFOGA FETALAI: Malo faafetai. Se i tulai mai lau Afioga i le Minisita.

Afioga Hon Lautafi Fio Selafi Purcell: Lau Afioga i le Fofoga Fetalai, na o le toe faaopoopo atu lava i le saunoaga matagofie a le Palemia. E leai se tulaga foi lea faapea o lea faatoa fai, o lea ua uma ona fai, ua uma ona ou talanoa i le Pulega ma le Faatonu Sili i le tulaga e faaleleia atili ai le auunaga aemaise foi o le aoina mai o tupe a le Matagaluega ia faatupulaia ai le latou tupe maua.

O nisi la nei o vaega ia tilotilo ai i tulaga tonu lava ia sa sausaunoa i ai sui usufono, ina ia tilotilo i ni auala e faaaoga atili ai tatou facilities, ia faaaoga i taimi uma po o tagata mai fafo po o tulaga faapena, ae o le a matua manino lava pe a tali mai le Matagaluega lau Afioga. Faafetai.

FOFOGA FETALAI: Malo. E manatu ua manino ma malamalama le folasaga a le Malo aemaise foi o le taumafai a le Afioga i le Taitaifono e tali mai.

Na faamaonia le Lafo.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti filifilia ia le silia le 90 aso talu ona faamaonia e le Fono Aoa le Lipoti.

E manatu o lea ua tatou taunuu i le tatou galuega faatulagaina o lenei aso. Sa i ai le faamoemoe o le tatou galuega lenei, o le a tatou tau faapepe ai foi i le po a nanei, a o lea ua matau ua mea lelei le tatou Pepa o Galuega o lenei aso. Ua manatu ai, e talitonu tatou sailiili malosi, ae o le a lafo atu pea i le Afioga i le Palemia.

Tulai mai lau Afioga i le Palemia.

LAFO MO LE TOLOPOINA

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e fitu a tatou Tulafono Tau Faaofi lea sa lauiliu i le taeao nei. E momoli atu ai le faafetai i a outou Afioga i sui usufono mamalu o le tatou Maota nei. E fitu Tulafono Tau Faaofi, ae ono Lipoti. E tele le galuega. O le galuega lea na tatou faia i le aso, e tusa ma aso Fono e tolu pe a faapea e sosolo lava i luga o tulaga masani o le toso ai lava, a o lea ua tagofia i se tulaga maoae le faatalanoaga. Ma o le tulaga sao lava, o lea ua maea mataupu sa faapea e tagofia i le taeao nei ma nanei ma taeao. O lea la ua tupu ae se manatu e tulai atu e faatu le lafo, *Ina ia toe faafoi le tatou tulafono i itula faa-Tulafonoina ina ia tolopoina ai nei loa Taulumaga seia aulia le itula e 9:00 i le taeao a taeao.*

Faaluaina e le Sui Palemia ma le Minisita mo Galuega Tau Alamanuia ma Atinae a le Malo.

Na faamaonia le lafo.

FOFOGA FETALAI: Faafetai atu i le paia ma le mamalu o le tatou Maota Fono i lenei aso, o lea ua saunoa atu le Palemia. E manatu e faapea foi se lagona o le Fofoga Fetalai. Na pau lava lea ia onosai mai, a aulia lava le Aso Faraile o le vaiaso lenei ua manaia tele, ua uma atu ai a tatou Fonotaga. O le a tatou le toe Fono po, o le a tatou alu lava i luga o le Fono ao, e lelei lena e faamama ai le tatou avega, e uma atu ua faavagavaga le masina o Fepuari i nisi o tulaga taua o lo o fotuai mai.

Ae momoli atu le faafetai tele i le tatou Maota i lenei vaega o le aso. E i ai le agaga tatou potopoto faatasi foi i le tatou aso Fono i le aso a taeao. A o le i faaiuina le tatou Fonotaga, tulai maia lau Afioga i le sui usufono mo Aleipata Itupa i Luga, lou lato i le ea ma lou lato i le tai, o lea sa matou tapuai atu, e fai se tatalo e faaiu ai le tatou Fonotaga.

Na tolopo Taulumaga a le Fono Aoao i le itula e 1:33 i le aoauli seia aulia le itula e 9:00 i le taeao o le Aso Lua, 27 o Ianuari 2015.